

四庫全書總目

上海大東書局印行

第 十 四 冊

- | | |
|------|--------|
| 卷七十七 | 地理類存目六 |
| 卷七十八 | 地理類存目七 |
| 卷七十九 | 職官類 |
| 卷八十 | 職官類存目 |
| 卷八十一 | 政書類一 |
| 卷八十二 | 政書類二 |
| 卷八十三 | 政書類存目一 |

欽定四庫全書總目卷七十七

史部三十三

地理類存目六

大滌洞天記二卷 浙江汪汝鍊家藏本

舊本題元鄧牧撰案牧以宋人入元不仕而卒據開禧書音核其書即牧所撰洞霄圖志內宮觀山水洞府古蹟碑記五

門而刪其人物每門又頗有刊削不皆全文卷首吳全節沈多福二序亦同惟增入洪武三十一年正一嗣敘真

人張宇初一序稱今年春某宮道士某持宮志請序將廣於梓蓋明初道流重刻時矣以其意刪節之而改其名

也

西嶽神祠事錄七卷 兩淮鹽政採進本

明孫仁編仁貴池人景泰辛未進士官至戶部右侍郎是書乃其官西安府知府時作以記西嶽神祠之事所錄

文章具載首尾年月撰入姓名較張維新華嶽全集所載頗為完整有體其中延喜華山廟碑一篇則剽泐已甚

非復洪氏隸釋之舊矣

石湖志略一卷文略一卷 浙江范懋柱家天一閣藏本

明盧襄撰襄字師陳吳縣人嘉靖癸未進士官至兵部職方司郎中石湖在蘇州府城西南宋范成大為執政時

有別墅在湖上孝宗御書石湖二字以賜其名始顯盧氏世居於此襄乃述其山川古蹟為志略又集諸人題咏

為文略然此書為范氏別業而作自應以是一地為主與州郡輿記為例各殊襄乃兼及人物多至二十有一人

匪獨詞涉誇張抑亦體傷泛濫矣

石鼓書院志四卷 浙江范懋柱家天一閣藏本

明周詔撰案是時有二周詔一為延津人嘉靖庚戌進士見太學題名碑一卽此周詔號臺山富順人嘉靖癸巳

官衡州府知府石鼓書院在衡州府治北石鼓山宋景祐開允集賢校理劉沆之請賜額置田與睢陽嶽麓白鹿號為四大書院講學家喜稱道之詔官於衡州因勸取舊志稍增損以為此編首地理次室宇次人物次祠輪而附錄文移於末潦草漏略殊無義例蓋書帕本也

淨慈寺志十卷

浙江巡撫採進本

明釋大壑撰大壑字元津杭州淨慈寺僧案淨慈寺在杭州城西南屏山舊無志大壑始創修之其書分形勝建置法嗣檀護著述僧制靈異七門自序稱斷碣磨崖真搜必錄蓋二十載而始成其用力亦勤矣

徑山集三卷

浙江巡撫採進本

明釋宗淨撰宗淨始末未詳徑山在臨安縣天目山東北唐代宗時僧法欽始造寺是書上卷記寺之建置中卷記禪宗下卷載藝文原刻校讎不精僧方一序謂其魯魚亥豕屢出為白璧蠅玷云

白鷺洲書院志二卷

浙江巡撫採進本

明甘雨撰雨有古今韻分註撮要已著錄初宋淳祐辛丑江萬里知吉州建書院於白鷺洲洲在二水之中故借李白詩一水中分白鷺洲句以名之非金陵之白鷺洲也時宋理宗方重道學為賜額立山長嗣後遂相承為古蹟萬歷辛卯黃梅汪可受為吉安府知府又重修之兩因換是志分沿革建置敘職祀典備諸名宦人物公移賢勞義助紀述書籍生祠記十三門生祠記者即可受生祠也至別立為一門此其作志之意不在書院矣

歷代山陵考一卷

兩淮馬裕家藏本

明王在晉撰在晉字明初太倉人萬歷壬辰進士官至兵部尚書事蹟附見明史王治傳是書僅從一統志鈔撮而成無所考證况既名山陵而趙宣子孟嘗君輩遺冢亦列其間尤非體也

方廣巖志四卷

江西巡撫採進本

明謝肇淛撰肇淛有史觸已著錄方廣巖在永福縣東宋給事中黃非熊嘗讀書山中作十咏以紀其勝肇淛時

爲工部郎奉使過家遊於是嚴因輯此志前爲義例一條作本紀以志方廣作外紀以志旁近嚴整作別紀以志方外作文紀詩紀以輯前人之作然本紀之名史家以載帝王事跡用之山水殊乖體例別紀信志寧之託生三元德涵之麗刑地獄佛氏之設儒者所不道詩紀未有國朝人所作則雍正中江續重修是書所附人也

石鼓書院志二卷

兩淮馬裕家藏本

明李安仁撰安仁字裕居遷安人萬歷中官衡州府知府是編因周詔舊志重修分上下部上部紀地理室宇人物名宦下部載藝文採據較詔志爲詳

關中陵墓志二卷

兩淮鹽政探進本

明祁光宗撰光宗後更名伯裕滑縣人萬歷戊戌進士官至兵部尚書是編乃光宗督學陝西時於歷代陵墓詳加考證各爲之圖而系之以說其距諸州縣城方隅道里皆備志之亦自覽聖賢家墓記之流也

金陵梵刹志五十三卷

編修汪如藻家藏本

明葛寅亮撰寅亮有四書湖南講已著錄是書志金陵梵刹依僧錄分攝以靈谷天界報恩三大寺統次大寺五中寺三十有二小寺百有二十其餘廢寺別爲一編卷首冠以御製欽錄二集御製者太祖之詩文欽錄者沿革之彙牘也未附以南藏目錄及諸經租額公費僧規公產諸條例其餘皆略如志乘之體編次頗傷雜難

徑山志十四卷

浙江巡撫探進本

明宋奎光撰奎光字培嚴萬歷壬子舉人官餘杭縣教諭是編蓋增補宗淨舊志而成分開山諸祖及制敕詩文名勝古蹟土產諸門殊多瑣瑣蓋一山一寺地本偏隅宗淨志已具梗概奎光必從而恢張之其尤者互矣

延壽寺紀略一卷

兩淮馬裕家藏本

明釋圓復撰圓復字休遠鄞縣人與屠隆同時延壽寺在鄞縣南三里舊號保恩院宋祥符間改爲延壽寺是書詳述知禮禪師本末及宋相會公亮置買莊田舊事他無所載蓋自備古刹之典故而已

金名四月全書卷目 卷十一
禹門寺志六卷 兩江總督採進本

明戴英撰英字上慎宜興人崇禎甲戌進士禹門寺在宜興之龍池山是編爾志山寺僧侶後紀碑銘序記詩文多

未雅馴

鄧尉聖恩寺志十八卷 江蘇周厚培家藏本

明周永年撰永年字安期吳江人鄧尉故有沈津志茲編乃踵而增之凡梵宇名釋序記語錄無不備載大約於寺

之建置本末尤為詳悉故以聖恩寺志為名書成於崇禎十五年而中有康熙中碑刻及宋學徐秉義詩文蓋後人

所續入也

天童寺集二卷 兩淮馬裕家藏本

明楊明撰明不知何許人天童寺在鄞縣東六十里管永康間義興禪師居此山有童子來供薪水久之辭去自稱

太白星因是山名太白寺名天童茲編敘述形勝綴以藝文前序無姓名疑即明所自作中稱換為七卷今止兩卷

似尚非完帙也

南溪書院志四卷 兩淮鹽政採進本

明葉廷祥郭以隆紀延譽陳翹卿同撰廷祥官九溪縣知縣以隆稱著縣事疑為承簿之類延譽翹卿則九溪教諭

訓導也其里賈均未詳南溪者朱子之父松作尉九溪實生朱子於其地理宗嘉熙初九溪令李修以時方崇尚道

學人爭攀附遂於其地建二朱先生祠即書院所自助也志中載書院額為帝鼎嘉熙元年所賜而李韶所作記在

嘉熙改元之歲已稱南溪書院則初建時已有此名但賜額在後耳其書僅紀書院之蹟所附詩文多不雅馴延譽之序

以朱松朱子及宋理宗皆跳行別書使君臣相竝則欲尊朱子而不知所以尊悖謬甚矣

破山興福寺志四卷 兩淮馬裕家藏本

明程嘉燧撰嘉燧字孟陽休寧人崇禎末布衣明史文苑傳附載唐時升傳末常熟縣西北十里有破山其麓有寺

曰輿福乃齊梁閒所建是書一卷二卷記山中古蹟而詩文附焉三卷志建置四卷志禪宗序次雅潔爲山志中差善之本

靈隱寺志八卷

兩淮馬裕家藏本

國朝孫治撰徐增重編治字字台仁和人增字子能吳縣人其書因明萬歷中呂黎白珩之志稍增損之體例與他志略同惟以宦遊寄寓之人概收之人物一門則事涉創造於義未安

滄浪小志二卷

浙江巡撫採進本

國朝宋榮撰榮字牧仲號漫堂商邱人由廕生官至吏部尙書是編乃榮爲江蘇巡撫時得宋蘇舜欽滄浪亭舊址重爲修葺因蒐輯前人傳記詩文而附以所作記一篇詩一首及尤侗范承勳詩各一首其爲一集當時頗稱其好事然其所採多爲舜欽而作與亭無涉又南禪寺雖附近亭而實非當日之故址一概泛載亦未免稍失斷限矣

杏花村志十二卷

浙江巡撫採進本

國朝郎遂撰遂字趙客號西樵子池州人按杜牧之爲池陽守清明日出遊詩有借問酒家何處有牧童遙指杏花村句蓋泛言風景之詞猶之楊柳岸蘆花洲日必指一村以實之則活句反爲滯相矣然流俗相沿多喜附會古蹟以夸飾土風故遂居是村即以古今名勝建置及人物藝文集爲是編蓋亦志乘之結習也至於併即氏族系亦附錄其中則併非志乘體矣

二樓小志四卷

浙江巡撫採進本

國朝程元愈撰汪越沈廷璐又補葺之與修賦偉二樓紀略一書相爲表裏皆記寧國府南北樓事北樓卽謝朓之高齋南樓卽文昌臺明嘉靖中知府朱大器所建也賦偉書旁涉他事殊爲龐雜此輯錄歷代題詠并記南樓建造始末差爲有緒越有讀史記十表已著錄元愈字借柳廷璐字元佩皆寧國人

青原志略十三卷

兩淮馬裕家藏本

因朝僧大然撰施閩章補輯大然始末未詳閩章字尙白號愚山宣城人順治己丑進士官至江西布政司參議
康熙己未 召試博學鴻詞授翰林院侍讀高原為吉州名勝自唐行 思禪師開山說法以後遂為巨剎至明王
守仁羅洪先歐陽德諸人於此講學故第三卷特立書院一門略記當時問對之語而其所採錄皆理之近於禪
宗者則緇流援儒入墨借以自張其教也

崇恩志略七卷 江西巡撫採進本

因朝僧智藏撰智藏字竺堂安福人崇恩寺在廬陵創自吳赤烏中屢經廢興康熙丙午智藏重修之因輯是書
一卷山水道場及歷代住持上堂語錄二卷記疏三卷詩對聯四卷序五卷啟書六卷雜著法語七卷法產大旨
在張皇佛教以外護為至榮體例無雜之甚

江心志十二卷 浙江巡撫採進本

因朝釋元奇撰江心寺在溫州府北永嘉江中即謝靈運詩所謂亂流趨正絕孤嶼媚中川者也宋高宗嘗幸其
地稱為名勝明熈成斌郡人王賜谷始創為之志元奇因舊本重加編輯凡紀蹟一卷敕書一卷藝文八卷世系
雜記二卷

白鹿書院志十六卷 安徽巡撫採進本

因朝廖文英撰文英有正字通已著錄初唐李渤與其兄涉讀書廬山蓄一白鹿甚馴因名白鹿洞宋初置書院於
五老峯下朱子守南康軍援熈麓書院例疏請敕頒遂為四大書院之一康熙中文英為南康知府因即舊志修輯
以成是書意求繁富頗失剪裁

靈谷寺志十六卷 兩江總督採進本

因朝吳雲撰雲號昉翁安福人靈谷寺在江寧鍾山之左明太祖遷梁寶塔於此改賜今名而號其山曰紫雲
有景泰間僧潔覺嘉靖間黃河一志康熙庚辰雲重輯為是編前有雲白序及寺僧寂曙所紀修輯緣起凡分二

十四類其門目皆因明志之舊僅略為刪補耳

白鹿書院志十九卷 安徽巡撫採進本

國朝毛德琦撰德琦有廬山志已著錄康熙甲午德琦為星子縣知縣因取廖文英原志重加訂正分類凡十曰

形勝曰輿復曰沿革曰先獻曰主洞曰學規曰書籍曰藝文曰祀典曰田賦形勝等七門 皆因舊志與復主洞書

籍三門則德琦所增也

通元觀志二卷 浙江巡撫採進本

國朝吳陳珍撰陳珍有春秋三傳同異考已著錄通元觀在錢塘縣宋紹興中劉鹿泉請於高宗建為修真之所

嘉靖中姜南始志之陳珍以姜志未備更為此書

孔宅志六卷 兩江總督採進本

國朝諸紹禹撰紹禹松江人青浦縣治之北地名孔宅舊有孔子廟相傳隋末孔子三十四代裔孫蘓州刺史禎

僑寓於吳乃立家廟并葬先聖衣冠於此後漸湮廢明陸應陽重修之始述為孔廟記陳功又作續記康熙中紹

禹增刪舊本以成是編案禎生於隋代不應尚存先聖衣冠即有之亦不應攜至吳中且隋時郡縣並無蘇州之名

其說殊未可盡信也

丹霞洞天志十七卷 兩江總督採進本

國朝蕭韻撰韻字明彝南城人康熙中舉人明萬歷中建昌府知府鄧齊雲嘗屬郡人左宗郢為麻姑山志久而版

煨康熙中湖東道羅森復令韻增補成之首系以圖次列表志記諸日而於題咏詞賦為九詳

武林志餘三十二卷 浙江巡撫採進本

國朝張賜撰賜字東傳號滌岑錢塘人是書搜輯武林著名勝於道觀祠廟名賢古蹟紀載尤詳其末一卷附錄方

物亦頗有考訂名志餘者欲以補前志所未備也然採摭頗富而體例未精往往失之冗雜所錄近人題詠亦殊少

別裁

東林書院志二十二卷 浙江總督 採進本

國朝高桂高隆高廷珍高陞許獻同揆桂等四人皆高攀龍之裔獻亦攀龍同縣人也其書分建置院規會語祀典列傳公移文翰典守著述軼事十門意在博搜廣採而體例允雜頗甚所附諸人又多牽附不特孫承澤濫廁其間即宋學平生亦僅刻意於文章未嘗聞其講學也

增修雲林寺志八卷 浙江巡撫 採進本

國朝厲鶚撰鷲有遼史拾遺已著錄是編成於乾隆甲子以靈隱舊志脫漏尚多且 聖祖仁皇帝省方南幸駐蹕山中 賜名雲林寺不宜仍用舊名故因前志而增補之首紀 宸恩次山水次禪祖次法語次檀越人物次

藝文詩詠而以遺事雜記終焉

宋東京考二十卷 浙江巡撫 採進本

國朝周城撰城號石匏嘉興人是書前有雍正辛亥王璠序稱城客大梁三載隨境討蒐以成此書其凡例有云建隆以前東京非宋靖康而後宋不東京蓋專紀汴都一百七十年之遺蹟而作也每條皆援引舊書列其原文蓋仿朱彝尊日下舊聞之體然多引類書其博瞻殊不及彝尊又多載雜事務盈卷帙如所引宋禪類鈔一近待爭辨賤由天一事因首有仁宗御便殿一語遂列之宮殿類中然則一代帝王何事不在宮殿內豈勝載乎他如造字臺吹臺繁臺卷中所引各書皆謂一臺而數名乃於繁臺則併入吹臺又別立造字臺名之類多彼此抵牾無所考證其精核亦不及彝尊也

鵝湖講學會編十二卷 江西巡撫 採進本

國朝鄭之僑撰之僑字東里潮陽人乾隆丁巳進士官至寶慶府知府鵝湖為宋陸講學之所今其地屬鉛山之僑官鉛山知縣時因作是編首卷為之僑所作圖傳贊考二卷至八卷皆四賢問答諸書及學規條約講義九卷為之

僑及雷鉉所立條約十卷十一卷皆自宋迄今詩文之有關於鵝湖者而之僑所作亦並錄焉十二卷則之僑所作鵝湖書田志也書中大旨多調停朱陸之異同其意蓋欲附於講學然實則惟以書院爲主故題詠名勝諸作亦皆收錄今仍附之地理類焉

右地理類古蹟之屬三十七部三百七十二卷皆附存目

豫章今古記一卷

浙江紹興杜家大關版本

不著撰人名氏考隋書經籍志有雷次宗豫章記一卷宋王象之輿地碑記目又云次宗作豫章古今志是編首引次宗語末云次宗於元嘉六年撰豫章記則必非雷書觀所紀至唐而止有皇唐大唐之語似爲唐人之作矣書分郡記寶瑞記寺觀記鬼神記變化記神祠記山石記冢墓記翹俊記等九部記載寥寥絕無體例疑依託者雜鈔成之也

西湖繁勝錄一卷

水樂大典本

舊本題西湖老人撰不著名氏考書中所言蓋南宋人也宋自和議既成之後不復留意於中原士大夫但知流連歌舞笑傲湖山故是書所述大抵嬉游之事以繁華靡麗相誇蓋亦耐得翁都城紀勝之類而瑣屑又甚焉

廬陽客記一卷

浙江江汝陳家藏本

明楊循吉撰循吉有蘇州府纂修議略已著錄正德元年循吉同年進士西充馬金爲廬州守請循吉修郡志以議不合歸後二年因採其風土大概述爲此編凡十一目簡潔古峭頗有結構蓋借此以馳騁其筆力然漏略太甚不足以備考證也

蜀都雜鈔一卷

兩江總督採進本

明陸深撰深有南巡日錄已著錄此乃深爲四川左布政使時所錄蜀中山川古蹟其論峨眉山當作峨眉又力辨禹生石紐爲元和志之誤頗爲有識其他亦多隨筆劄記之文

閩部疏

無卷數 兩江總督採進本

明王世懋撰世懋有却金傳已著錄是書記閩中諸郡風土歲時及山川鳥獸草木之屬亦地志之支流蓋世懋

曾官福建提學副使記其身所閱歷者也

涖故述一卷

兩淮鹽政採進本

明楊樞撰樞字運之自稱細林山人華亭人嘉靖戊子舉人官至江西臨江府同知是書乃所述松江一郡遺聞軼

事以補志乘之闕略者松江本以吳淞江得名明初因地多水災故去水刃以禳之此書標目則猶仍其本名也書

中於地理人物行誼藝能文字題詠以及詛詣瑣屑之事無不備載其藝文籍用宋孝王關東風俗傳例載陸續瀾

天圖以下凡百餘種悉其鄉人著作可為徵文考獻之資至於元楊維禎之名或從木或從示諸書參差不一樞以

歲月求之謂字本從木入明後以諸王有諱植者始改從示其言殊臆測無據又李至剛在永樂時以善於附會深

蒙傾險之譏而樞信明一統志之虛詞反目以德量寬宏惜松江舊志略而不載亦未免涉回護鄉曲之私也

秦錄一卷

編修程晉芳家藏本

明沈思孝撰思孝字繼山嘉興人隆慶戊辰進士官至都察院右副都御史兼兵部侍郎事蹟具明史本傳是書多

載陝西諸郡形勝風土閒引經史諸書為證其論復河套事極以曾銑之議為非未免有所回護云

晉錄一卷

編修程晉芳家藏本

明沈思孝撰所載多邊障形勝及防守扼要之處其田賦鹽課諸條與明會典亦略有同異至敘黃河所經州縣

及太原晉祠則大抵習見之文無足以資考證

長溪瑣語一卷

兩淮鹽政採進本

明謝肇淞撰肇淞有史鱗已著錄長溪今之流傳者其書雜載山川名勝及人物故事閒及神怪蓋亦志乘之支

流也

滇南雜記二卷 山東巡撫採進本

明許伯衡撰伯衡號聽菴崑山人萬歷庚子舉人官晉寧州知州兼攝昆陽州事伯衡嘗輯晉寧志後維採滇事爲此書體例與輿記略同惟不列仕宦人物姓名坊巷公署之類及雜事各自標目爲小異目大抵略於古蹟而詳於時事故下卷自丁產以下所載公牘爲最詳自序謂於滇事無損益而要而不爲游談其大旨可見矣

西事瑣八卷 福建巡撫採進本

明魏瀚撰瀚有易義古象通已著錄是書蓋其官粵西時所作一卷多言山川地理二卷多言風土三卷多言時政四卷五卷多言故事及人物六卷多言物產七卷多言仙釋神怪八卷多言制馭苗蠻之始末雖不立地志之名然核其編次固地志之類但不列門目耳其考訂頗不苟敘述亦爲雅潔無說部叢雜之習然如載舒宏志轉生之類稍涉荒唐明惠帝程濟諸事亦相沿譌謬也

泉南雜志二卷 編修程晉芳家藏本

明陳懋仁撰懋仁字無功嘉興人官泉州府經歷浙江通志稱其不以簿書廢鉛槧記泉南事多故牒所未備卽是書也其所載山川古蹟禽魚花木以及郡縣事實頗爲詳具中如淳化帖尼無著等一兩條亦稍有考證其官山一條破閩俗葬地之說持論亦正下卷則多記其在泉所施設之事皆得諸身歷者然如泉人之官嘉興及嘉興人之官泉者俱攙列姓名卽簿尉亦竝載之此非天下之通例懋仁以嘉興人而官泉州故兩地互記卽使修地志者人皆援此例則轄南山之竹不足供其私載矣凡著一書先存一厚其鄉人之心皆至薄之見也

閩中考一卷 浙江吳玉璣家藏本

明陳鳴鶴撰鳴鶴有東越文苑已著錄是書所考皆福州府境山川古迹稱得唐人閩中記於長樂農家得宋人三山志於徐煥參以聞見訂志乘之外譌其考證舊事如東冶非東冶泉山非泉州清源山而越山冶山皆泉之支麓治縣非東甌鐘峯石在南嶼不在旗山舊志本明新志誤刪其文因誤移其地亦頗精核惟後幅多採小說怪事及僧

家語錄未免傷於蕪雜

兩河觀風便覽四卷

江蘇巡撫採進本

不著撰人名氏中有稱萬歷二十年者而所列宗藩一門尚無福府則神宗中年之書也分十門一曰圖考二曰封域三曰官秩四曰宗藩五曰賦役雜差六曰戶口七曰河防八曰驛傳九曰儲積十曰兵防大抵鈔撮案牘爲之而於河南掌故一一具詳較地志諸書羅列山川侈陳人物濫載藝文者較爲近實特其大者多見於史而小者亦備載於通志不免爲已陳之故牘耳

增補武林舊事八卷

浙江巡撫採進本

明朱廷煥撰廷煥字中白單縣人崇禎甲戌進士官工部主事初宋末周密管錄南渡後百二十年典故及風俗游宴之盛爲武林舊事廷煥於崇禎閒司權杭州復採西湖志鶴林玉露容齋隨筆輟耕錄及密所著癸辛雜志諸書補綴其闕以成是編密書十卷此增補反爲八卷者密書別有一六卷之本廷煥據以推廣也自序謂增補數十則今案所增凡香藻恩澤開爐故都宮殿湖產災異六門共補一百五十四則與序不符殆序文字誤耶其中湖產一門旣非宋代所獨有與斷限之例殊乖其災異一門亦非土俗民風朝章國典泛濫尤甚均非密著書之本意殊屬駢枝明人點竄古書多不解前人義例動輒破壞其體裁往往似此也

帝京景物略八卷

編修汪如藻家藏本

明劉侗于奕正同撰侗字同人麻城人崇禎甲戌進士官吳縣知縣奕正字司直宛平人崇禎中諸生是編詳載北京景物奕正據求事迹而侗排纂成文以京師東西南北各分城內城外而西山及畿輔併載焉所列目凡一百二十有九每篇之末各繫以詩採摭頗疎王士禎池北偶談嘗議其不考薩都拉集失載安祿山史思明所造雙塔事考據亦多不精確其爲朱彝尊日下舊聞所駁正者尤不一而足其割裂藝元二字爲塑工姓名一條殆足資笑噱又侗本楚人多染竟陵之習其文皆么茲側調惟以纖詭相矜至如太學石鼓一條舍石鼓而頌太學

殊傷允濫又首善書院近在同時泛敘講學何關景物於體例亦頗有乖所附諸詩尤為猥雜方今奉
命重
輯日下舊聞考古證今務求傳信朱彝尊之所撰且為大略之推輪侗等弔詭之詞益可為覆瓿用矣

山左筆談一卷 編修程晉芳家藏本

舊本題明黃淳耀撰淳耀字蘊生號陶菴嘉定人崇禎癸未進上南都被後殉節死事蹟具明史儒林傳是編所紀
皆山東風土形勢山川占蹟及海運備倭諸事宜徵引拉雜殊鮮倫理案淳耀生平未嘗遊山東所著陶菴集內亦
無此書名此本見曹溶學海類編中疑亦出偽託也

楚書一卷 編修程晉芳家藏本

明陶晉樞撰晉樞字若樞秀水人崇禎開嘗侍親官楚因雜記湖南山水物產閒及古蹟然考證殊多疎漏如辨响
嶼碑信楊慎所錄者為真本則其他可知矣

山東考古錄一卷 大學士英廉家藏本

舊本題 國朝顧炎武撰載吳震方說鈴中然說鈴載炎武書 四種其三皆雜剽日知錄而此書之文獨日知錄
所不載末題辛丑臘望日庚申是日立春字畫作於順治十八年考王士禛居易錄記炎武嘗預修 山東通志或
是時所遺棄本亦未可知也

京東考古錄一卷 大學士英廉家藏本

舊本題 國朝顧炎武撰載吳震方說鈴中其文皆見炎武所撰日知錄及昌平山水記殆震方勦取別行偽立
此名也

諸狐一卷 兩江總督採進本

國朝顧炎武撰時有樂安李煥章偽稱與炎武書駁正地理十事故炎武作是書以辨之其論孟嘗君之封於薛
及臨淄之非營邱諸條皆與地理之學有所補正

天府廣記四十四卷

編修斷守
謙家藏本

國朝孫承澤撰承澤有尙書集解已著錄是書以京畿事實分類編輯凡建置府治學宮城池官殿各一卷壇廟四卷官署二十三卷其中倉場漕務附戶部選舉貢院附禮部之類又各以所屬繫錄人物二卷名勝川渠名蹟寺廟石刻陵園各一卷賦一卷詩三卷全用志乘之體承澤所作春明夢餘錄多記明事是編則上該歷代下迄於明爲例稍殊其中如因工部而及修築遂併淮黃形勢而詳述之則是南河而非北都因禮部而及儀注因併貴賤章服而縷載之則是會典而非地志且既以天府爲名自應以地爲限乃明建都在永樂時而內閣題名上溯洪武之初移石鼓入大都在元時而石鼓歌兼收韓愈章應物蘇軾鳳翔所作如斯之類皆務博貪多未免失之泛濫至於六科條下自載其奏疏名蹟類中自載其別業如斯之類亦未免明人自炫之習他如人物門成德傳未附戴德殉難時與馬世奇書有在都縉紳盡如光合萬孫北海天下事尙可爲之語含萬卽光時亨字以給事中從賊後爲福王所誅者也以德之剛直明決與時亨承澤決非氣類未必肯作是語如斯之類或不免有所依託李國禎降賊拷死具載諸書而以爲棄城遁去賊追殺之如斯之類或不免傳聞失實前卷以翰林院爲元光祿寺後卷又以翰林院爲元鴻臚寺如斯之類或不免小有抵牾核其全書大抵瑕多而瑜少也

四州文獻摘鈔四卷

山西巡撫
採進本

國朝畢振姬撰其邑人司昌齡所摘鈔也振姬字亮四高平人順治丙戌進士官至廣西按察使山西通志稱其所著有四州文獻藏於家此本有司昌齡跋曰四州文獻蓋潞澤遼沁之通考也其間有懸揣附會之說前無總序條類紛雜蓋草創未就而其徒所鈔次凡二十五冊余以前人舊文各有原書又繁不能盡錄乃節其論著之要者與其所纂物產釐爲四卷題曰四州文獻摘鈔據其所云則所存不及十之一尙麗雜如是則全書可以想見矣

甌江逸志一卷

大學士英
廉家藏本

國朝勞大輿撰大輿字宜齋石門人順治辛卯舉人官永嘉縣教諭是編前紀溫州舊事後記其山川物產大意欲

補郡乘之闕故命曰逸志然摺拾未富且皆不著所出本爲精核至謂錢玉蓮爲娼女更齊東之語矣

粵述一卷 大學士英廉家藏本

國朝閩敘接敘號鶴隄縣人太史題名碑作江都人疑其寄籍也順治乙未進士官至監察御史是編乃其督學廣西時所作敘述山川物產頗爲雅潔其訪狄青取崑崙關一事核以地理足訂宋史之誤惟好奇鑿字義如謂猺字當作僊卽說文之僊僊已爲無理又謂猺人住屋作兩層人居其上豬圈牛欄皆在臥榻之下說文家字山下從豕可會此義云云尤爲附會儒生喜談小學動稱六書爲萬事之根本其弊往往至此也

星餘筆記一卷 山東巡撫採進本

國朝王鉞撰鉞有粵游日記已著錄此其世德堂遺書之第三種也皆其官西寧知縣時記其風土物產如蟬蛇狒狒諸條於舊說間有駁正所記幺字旭字澄字阜字不字有字之類亦足補桂海虞衡志所遺然大抵地志所已載也以方爲邑合故取巫馬期戴星之義名曰星餘云

中州雜俎三十五卷 河南巡撫採進本

國朝汪价撰价字介人號三儂外史自稱吳人其里居則未詳也順治己亥賈漢復爲河南巡撫修通志价與其役踰年書成復採諸書所載軼聞瑣事關於中州者皆粹以成是編分天地人物四函天函子目五曰分野圖譜餘論雜識時令地函子目十六曰建都封國紀邑紀鄉紀山紀水紀室紀園紀寺紀塔紀觀紀廟紀墓紀碑紀橋紀俗人函子目二十一曰帝蹟聖蹟賢蹟官蹟文蹟武蹟忠蹟孝蹟義蹟節蹟障流羽流縉流術流流技流文史老史見史凶史異史人雜物函子目十四曰禽志獸志鱗志蟲志草譜木譜花譜穀品果品茶品飲案食案器考物考採摭繁富用力頗勤而多取碑官家言純爲小說之體又事皆不著所出人亦往往不著時代編次繁複漫無體例可謂勞而鮮功者矣

湖塘雜記一卷 大學士英廉家藏本

大邑日星...

史部

地類類存自六

八

國朝陸次雲撰次雲字雲士錢塘人康熙初由拔貢生官江陰縣知縣是書蓋續田賦衡西湖志餘而作如慶志塔夾城之類亦頗有考辨而近於小說者十之七八蓋類書之書體例亦如是也

姑孰備考八卷 安徽巡撫探進本

國朝夏之符撰之符字珪伯當塗人順治中修太平府志未成乃刪其八志二表而為此書百郡紀三卷以擬本紀次人物傳贊二卷以擬列傳次鄉音集三卷皆之符自作之詩非志非集殊乖體例又人物傳中列章弦佩於先賢而弦佩方序其書則其人未死亦豈蓋棺論定之義乎弦佩原序稱是書十二卷張總序又作九卷互相矛盾惟陶元鼎序作八卷與此本相合云

臺灣記略一卷 大學士英廉家藏本

國朝李麟光撰麟光號蒼洲武進人是編雜記臺灣山川附以暹羅別記一篇篇帙寥寥疑為刪削不完之本也海表奇觀八卷 浙江汪敏叔家藏本

不著撰人名氏凡標二十三門曰溯源曰疆境曰形勢曰分野曰氣候曰潮汐曰節序曰風俗曰黎俗曰占歷曰災祥曰名山曰水泉曰名宦曰人物曰列傳曰祠廟曰古蹟曰墳墓曰物產曰奇人曰奇事曰題味蓋即鈔撮瓊州府志而每條附以論贊詩句據其自序稱戊申官於瓊州又言家於齊魯考瓊州府志康熙七年戊申知府牛天宿山東人當即此人也

江南星野辨一卷 兩江總督探進本

國朝葉燮撰燮字星期吳江人康熙庚戌進士官寶應縣知縣其書歷引周禮爾雅及星經史志所載揚州吳越分野獨推劉基清類天文分野之書為得郡邑分度之詳案星土之說雖本周禮保章氏亦見於左傳諸占然先儒已不得其傳解多附會術家用以推驗偶應者十不得一不應者十恒逾九況疆域既已非古而猶執二十八宿尺尺寸寸而拓之其乖迕殆不待辨輿圖所列大抵具文博引繁稱徒為枝贅而已

嶺南雜記二卷

大學上英
康家藏本

國朝吳震方撰震方有讀書正音已著錄是漏記其客遊廣東時所見上卷多記山川風土兼及時事所載番禺
唐化鵬夫務條議花田立縣議廣西巡撫彭鵬林官販私鹽示諸條亦頗留心於利弊下卷則記物產而已書中
稱平南王尚可喜為逆藩伏讀 五朝國史列傳可喜之子尚之孝反覆悖亂終於伏誅謂之逆藩可也可喜則
終守臣節未可目之以逆是亦偶聞之未審矣

臺灣隨筆一卷

編修程晉
芳家藏本

國朝徐懷祖撰懷祖字燕公松江人自序稱乙亥之春再至閩漳復有臺灣之行蓋康熙三十四年所作其記臺
灣風土及自閩赴海水程俱不甚詳備但就其所身歷者言之耳

燕臺筆錄一卷

編修程晉
芳家藏本

此本載曹溶學海類編中題 國朝項惟貞撰惟貞字端伯秀水人朱彝尊之門人也然檢核其文實即朱彝尊日
下舊聞內風俗一門疑彝尊嘗屬之哀輻偶存殘章作偽者遂別標此名也且彝尊撰日下舊聞時溶歿已久又安
得而錄之學海類編多書買所竄入非溶原本此亦一誤矣

神州古史考一卷方輿通俗文一卷

安徽巡撫
保進本

國朝倪璠撰璠字魯玉錢塘人康熙乙酉舉人官內閣中書舍人是書自序云按今之版圖取自漢迄唐諸史地志
列於郡縣之首上搜舊聞旁披遺逸凡兩京十四省共一百五十餘卷謂之神州古史考又取唐以後者別為一編
名曰方輿通俗文然所梓者惟杭州一府九縣而已蓋未成之書也

案此書據其原序立入總志然所刻者惟一府入之總志為不倫而又不可列於郡縣之中故附存其目於雜
記此無類可歸之變例也

西粵對問

無卷數
江蘇
巡撫保進本

大邑

史部

地理類存目六

九

國朝江德中按德中字漢若徽州人官至廣西布政司參議是書記西粵山川風土物產頗資異聞然其徵據疎謬亦復不少如左傳有仍氏生女黥事不檢杜注美髮為黥之語而誤以為肌膚之黑又云雉黑色者為鳴雉按爾雅秩秩海雉注如雉而黑在海中不云名鳴也殆緣海字而誤歟殊失考

潯陽賦蘊六卷 江西巡撫採進本

國朝文行遠撰行遠字維楚江西德化人康熙中貢生是書專志九江一郡故實首有凡例自謂讀書時遇郡事蹟見隨錄自經史子集及稗官野乘小說之類靡所不採首卷分象緯地輿書院祠廟官室邱墓服食器用玩好草木鳥獸蟲魚十二目次卷分仕宦吏治典禮經費兵防盜賊六目三卷分交游縣局方技孝義閭閻忠節流寓人物栖逸九目四卷分真仙僧寶二目五卷分詩文書畫典籍名勝四目六卷分像教禪喜靈異感應果報鬼神六目其摭拾頗為繁富而分別門類殊多失當如既有僧寶又有禪喜既有鬼神又有果報感應靈異之類中所採取亦未見決擇蓋有意求多未免失之龐雜也

蜀都碎事六卷 兩淮馬駟家藏本

國朝陳祥裔撰祥裔本姓喬氏號藕漁順天人康熙中官成都府督捕通判採蜀中故實為碎事四卷雜引諸書或註或否間附以考證案語及前代題咏詩文復以所採未盡別為藝文二卷謂之補遺祥裔所自作詩亦併列於唐宋名作之間

續閩小紀一卷 江蘇巡撫採進本

國朝黎定國撰定國字子一江都人官客遊福建學使幕中因據所聞見輯為此書以舊書先有閩小紀故以續為名凡七十六條所載閩地風俗土產及瑣碎故實大約通志所已具別無創聞也

嶺海見聞四卷 兩淮馬駟家藏本

國朝錢以埏撰以埏遊宦廣東前後八載所作羅浮外史已著錄此編又其雜錄見聞之書也大致欲倣水經注洛陽

伽藍記而才不逮古人又採錄冗雜無所限斷記陸賈使粵乃泛及作新語事記南漢事甚略乃闡載劉鋹入宋後事皆與嶺海無關其他雜採小說不核真偽如述異記開元天寶遺事之類與聞見亦無涉至於荔枝銅鼓前後各出二條尤無體例矣

南漳子二卷

浙江巡撫採進本

國朝孫之騷撰之騷所輯尚書大傳已著錄之騷居於河清近南漳湖因以自號是書所紀皆其一鄉之故實乃自稱爲子核其體例實亦於古無徵

右地理類雜記之屬四十二部一百七十六卷

內二無部卷數

皆附存目

欽定四庫全書總目卷七十七

欽定四庫全書總目卷七十七

史部

地理類存目六

十

欽定四庫全書總目卷七十八

史部三十四

地理類存目七

古今游名山記十七卷 安徽巡撫採進本

明何鏗撰鏗有括蒼彙紀已著錄是書採史志文集所載游覽之文以類編輯首為總錄三篇曰勝記曰名言曰類

考次記兩京各省山川及古今游人序記

天下名山諸勝一覽記十六卷 兩江總督採進本

明慎蒙撰蒙字山泉歸安人嘉靖癸丑進士官至監察御史是書以何鏗所作古今游名山記重複太甚因刪汰繁

冗而增入通志及別集所載記文凡十之四視鏗書頗為簡明然文有加減而事不增損仍無資於考據其記文之

末各加評語亦不出坊刻積習自序稱其書名天下名山諸勝一覽記而第一卷首又題作游名山一覽記第二卷

以後則題作名山巖洞泉石古蹟殊不畫一蓋明代文士往往急行其書陸續付梓至書成後始有定名而已刊者

遂不復追改故名目往往錯互不獨此書為然也

名山游記一卷 兩淮鹽政採進本

明王世懋撰世懋有却金傳已著錄是編一曰京口游山記分上下二篇一曰游匡廬山記一曰東游記一曰游二

泉記一曰游鼓山記一曰游石竹山記一曰游九鯉湖記而附以游溧陽彭氏園記末有世懋跋一篇蓋為鼓山以

下三記作後合刻諸記仍以綴於末也

名山注 無卷數內府藏本

明潘之恆撰之恆有黃海已著錄是編首江土山志次蜀山志次淮上雜志次新安山水志次越中山水志次三吳

雜志或載前人行紀志傳題詠或自為序紀其他名勝漏略尚多疑就其所游歷者述之其書不分卷帙前後亦無

序跋而名山注三字僅題於卷似非完本也

五岳游草十二卷

兩江總督
採進本

明王士性撰士性字恆叔臨海人萬歷丁丑進士官至南京鴻臚寺卿事蹟附見明史王宗沐傳錢希言繪圖又稱臨海王中丞士性末之詳也士性初令確山游嵩岳擢禮科給事中游岱嶽華嶽恆嶽及參吳潘游衡嶽此外游名山以十數經歷者十州游必有圖有詩為圖若記七卷詩三卷不盡於記與詩者為雜志二卷亦名廣游記統題曰五岳游草蓋舉其大以該其餘也猶園稱峨嵋山有老僧性好游自恨一生不得徧探名岳年又駸駸向暮乃著於來生了此夙願臨化謂其徒曰吾今往台州臨海縣王氏託生為男計老僧化去之年月日時即士性之甲子云云殆因有此書而附會之然亦緣士性癖嗜山水故有是言矣

廣志釋五卷雜志一卷

編修江如
謙家藏本

明王士性撰此書又於五岳游草廣游記以外追釋舊聞以補未及者也首為方輿崖略次兩都次諸省附以雜志其四夷輶一種列目於雜志之前然有錄無書注曰考訂嗣出蓋未刊也凡山川險易民風物產之類巨細兼載亦間附以論斷蓋隨手記錄以資談助故其體全類說部未可盡據為考證也

黔志一卷

編修陸晉
芳家藏本

明王士性撰曹溶收入學海類編中核其所載即士性游記中之一篇書賈竊出別立此名以售欺者也

豫志一卷

編修程晉
芳家藏本

明王士性撰亦其五岳游草之一篇曹溶摘入學海類編者也

日畿訪勝錄二卷

編修程晉
芳家藏本

明姚士舜撰士舜所輯陸氏易解已著錄此錄乃萬歷甲午士舜游京師時尋訪都城內外諸勝因彙輯成編然所載古蹟實皆鈔撮孫國枚燕都游覽志蔣一葵長安客話諸書別無異聞不足資證據也

天目游記一卷

兩江總督採進本

明黃汝亨撰汝亨有古奏議已著錄是記乃汝亨與佛慧寺僧同遊天目山而作序是山景物頗詳然記中敘目而不敘為何年亦行文之偶疎也

紀游彙一卷

兩淮鹽政採進本

明王衡撰衡字綠山太倉人萬歷辛丑進士官翰林院編修事蹟附見明史王錫爵傳是編乃所作游記凡泰山一首香山三首盤山一首馬鞍潭柘一首雜記三首蓋隨時摭拾付梓者前有陳繼儒序詞亦佻巧

循滄集二卷

兩江總督採進本

明姚希孟撰希孟字孟長長洲人萬歷己未進士官至詹事府詹事事蹟具明史本傳是編乃所作游記以循滄名篇蓋用宋袁粲語也上卷十三篇皆游太湖洞庭所作下卷十五篇則平生所作南北游記皆在馬末為跋王文恪洞庭游記二篇及跋徐宏祖鹿門鴻寶冊一篇宏祖亦好游故以類附游記後焉其文體全沿公安竟陵之習務以纖佻為工甚至游廣陵記於全篇散語之中忽作儷偶一聯云洞天深處別開翡翠之巢笑語微聞更掣鸞鷺之鎖自古以來有如是之文格乎

山行雜記一卷

浙江鮑士恭家藏本

明宋彥撰彥華亭人與趙宦光同時嘗至京師歷遊玉泉香山因紀其園亭刹寺巖壑之勝蓋亦學游城南記諸書而作然考據多疎如中稱玉泉道上有壯節祠碑稱崇安侯譚公而無其名疑為靖難武臣戰死者崇安侯譚淵從成祖起兵於夾河戰沒子孫得世襲侯爵當時如鄭曉王世貞所著書內皆詳載其事而彥不能知亦殊昧於典故矣

名山記四十八卷圖一卷附錄一卷

浙江巡撫採進本

不著撰人名氏蓋因何鏗之書而增葺之凡北直隸二卷南直隸十卷浙江十卷江西四卷湖廣四卷河南三卷

名山記

史部

地理類傳

山東二卷山西一卷陝西一卷福建二卷廣東二卷廣西一卷四川二卷雲南一卷貴州一卷前為圖一卷略繪名勝之蹟末為附錄一卷別荒怪之說神異經十洲記之類也所錄古人游記十之三明人游記十之七採摭頗富而麗雜特甚如鄒道元水經注徐兢高麗圖經張敦頤六朝事蹟之類皆割裂句偃改易名目至於孔稚圭北山移文駱賓王冒雨尋菊序宗懷荆楚歲時周密武林舊事楊銜之洛陽伽藍記王觀揚州芍藥譜張銜梅品王世貞題洛中九老圖之類闖入者不可殫述不知其與名山何與其圖首有篆字題識曰崇禎六年春月墨繪齋新摹則出自坊賈之手可知胡維霖墨池浪語乃云名山記乃何濱巖所集近復補入景必窮幽語必造奇仁智者豈能足跡徧天下得此可以臥遊所謂補入蓋印此本殆維霖未細閱其書歎

廣州游覽小志一卷山東巡撫採進本

國朝王士禎撰士禎有古懽錄已著錄士禎以康熙甲子十一月祭告南海以乙丑二月八日至四月一日歸計置廣州五十一日因而游覽古蹟作為此志凡光孝寺六榕寺五羊觀海幢寺海珠寺越秀山蒲澗寺長壽寺南園三忠祠九處皆會城內地也

天下名山記鈔無卷數內府藏本

國朝吳秋士編秋士字西澗歙縣人其書取何鐘游名山記及王世貞之廣編刪而錄之無一字之考訂

泰山紀勝一卷山東巡撫採進本

國朝孔貞瑄撰貞瑄有大成樂律已著錄是編乃其初官泰安教諭時紀所游歷而作也大略仿岱史之舊自萬仙樓以下共五十餘則每景各敘其勝其餘諸山脈絡與岱宗相屬者如尼山防山龜蒙鳧繹之類亦咸入記載其捨身崖社首蒿里封禪數條持論頗不詭於正然於封禪舊典引據未能詳洽大抵議論多而考據少其文格亦尚洽竟陵未派云

匡廬紀游一卷大學士英廉購進本

國朝吳爾思撰爾思字道賢武進人所記廬山名蹟凡五十八條詞頗簡潔然大抵以摹寫景物爲長

滇黔紀游二卷 大學士英廉購進本

國朝陳鼎撰鼎有東林列傳已著錄是編爲其客游滇黔時所紀上卷紀黔下卷紀滇於山川佳勝敘述頗爲有致而不免偶出鄙語如紀貴州諸苗曰男子之麗者即古之潘安宋朝有不及焉女子之麗者漢之飛燕唐之太真亦無能出其上矣此種女子欲購之者牛馬當以千計男子皆不樂爲龍陽君有犯之者輒自殺又記楚雄姚安開化三郡曰余徧游三郡別時各有遺贈土儀之盛餽贖之豐有多至百金者云云其言殊陋又如記三塔寺黃華老人石刻一事黃華老人即金王庭筠所作四詩刻石在山西汾州故有人道高歡避暑宮句後李中陽始摹刻於點蒼山王士禎居易錄載之甚詳鼎乃以爲仙人之筆則考證之疎亦可概見矣

玉山遺響六卷 江西巡撫採進本

國朝張貞生撰貞生號賈山廬陵人順治戊戌進士官至翰林院侍讀學士玉山在泰和仁善鄉初名義山又改匡山土人稱子瑤山貞生嘗游息其中是編首載所作詩次載所題對聯次載所作記次爲茅屋隨割則山中之日記次爲他人所作詩賦傳記前有羅履序謂貞生所著文集尙未刊行此其家居一載之內流連山水隨筆記之以示其意之所寓者所錄雖皆詩文而其體例在游記地志之間故附之地理類焉

蒼河小記一卷 兵部侍郎紀昀家藏本

國朝畢曰滂撰曰滂有滇游記已著錄是編亦曰滂父忠告官雲南布政司參議時曰滂省觀至大理紀其山川名勝而作相傳靈鷲山即今點蒼山爲釋伽佛修造處寶川之鷄足山即伽葉道場故曰滂是書多引佛經爲證據右地理類游記之屬二十一部一百二十三卷 內二部皆附存日無卷數

南中志一卷 浙江范懋柱家天一閣藏本

舊本題曰晉常璩撰前有顧應祥序云此書附在華陽國志近世無傳升菴楊太史謫居於滇以其舊所藏本手錄

欽定四庫全書總目卷七十八

見示云云考隋以來經籍藝文諸志皆無此書宋李奎校正華陽國志原序具存亦不云附有此卷且漢王恢攻南越在建元六年張騫使大夏在元狩元年此云騫以白帝東越攻南越大行王恢救之年月之先後既殊事蹟亦不知何據又晉泰始七年分益州置寧州而此云六年牂柯郡下元鼎六年亦誤作元鼎二年牂牁不一楊慎好撰偽書此書當亦漢雜事祕辛之類也

高麗記無卷數 浙江池懋杜家天一閣藏本

舊本題宋徐兢撰案兢別有高麗圖經四十卷已著於錄此本所載即從圖經中摘鈔而成非兩書也

記古演說一卷浙江巡撫採進本

舊本題宋張道宗撰前有嘉靖己酉沐朝弼序則稱道宗為元人卷末題咸淳元年春正月八日滇民張道宗錄而書中又載元統二年立段信苜實為大理宣慰使司事頗倒牴牾不可詰其書大抵陰刺諸史西南夷傳而小變其文惟所記金馬碧鷄事稱阿育王有三子爭逐一金馬季子名至德遂至滇池東山獲之即名其山曰金馬段子名福邦續至滇池之西山忽見碧鳳即名其山曰碧鷄所謂金馬碧鷄之神即是二子其說荒誕與史傳尤異文句亦多不雅馴始出贗託況書中明言宋興以北有大敵不暇遠略使傳往來不通中國何以度宗式微之時轉奉其正朔然則非惟道宗時代恍惚難憑即其人之有無且不可遽信矣卷首有楊慎點校字其即慎所依託而故謬其文以疑後人歟

異域志一卷浙江范懋柱家天一閣藏本

不著撰人名氏篇首胡惟庸序曰竊蟲錄者予自吳元年丁未出鎮江陵有處士周致中者前元之知院也持是錄獻於軍門則此書初名竊蟲錄為周致中所作又開濟跋曰是書吾兄得之於青宮乃國初之故物今吾兄重編更其名曰異域志則此書名異域志乃開濟之兄所更定然考明太祖於元至正二十四年甲辰建國號曰吳丁未當稱吳三年不得稱元年又濟跋題王午長至為惠帝建文四年其時濟被誅已久不應作跋疑皆出於依託也其書

中雜論諸國風俗物產土地語甚簡略頗與金鏡所刻異域圖志相似無足採錄

異域圖志一卷 浙江范懋柱家天一閣藏本

不著撰人名氏後有明廣信府知府金鏡序謂宋亦有應天府疑是宋書然書中載明初封元梁王子於耽羅則為明人所作無疑其書摭拾諸史及諸小說而成頗多疎舛如古城役屬於安南乃云安南為古城役屬殊不足據其
他敘述亦太寥寥

百夷傳一卷 浙江范懋柱家天一閣藏本

明錢古訓撰古訓餘姚人洪武甲戌進士官至湖廣布政司參政百夷即麓川平緬宣慰司 案百夷即今羅夷譯洪武對音故無定字

武二十九年其曾思俞發訴與緬人構兵古訓時為行人與其同官桂陽李思聰奉詔往諭命發等聽命而還因述其山川人物風俗道路為書以進古訓旋以勞擢湖廣參政請澤州楊砥序之黃虞稷千頃堂書目以此書為李思聰作今據砥序及夏原吉後序則實古訓所作虞稷偶失考也

南夷書一卷 浙江范懋柱家天一閣藏本

明張洪撰洪字宗海常熟人洪熙初召入翰林官修撰是編乃永樂四年緬甸宣慰使那羅塔剌殺孟養宣慰使刁查及思樂發而據其地洪時為行人齎敕往諭因探撫見聞記其梗概所載洪武初至永樂四年平定雲南各土司事皆略而不詳其於雲南郡建置始末亦未能明晰知南詔為蒙氏改都蘭府歷鄒趙楊三姓始至大理段氏孟養麓川各有土司書中皆遺之唯載梁王拒守及楊直乘隙竊發諸事稍足與史參考耳書中瀾滄江作蘭滄江思樂發作思樂發與史互異蓋亦譯語對音之故也

西洋番國志 無卷數 浙江巡撫採進本

明章珍撰珍應天人其仕履始末未詳永樂中敕遣太監鄭和等出使西洋宣宗嗣位復命和及王景宏等往海外徧諭諸番時珍從事總制之幕往還三年所歷諸番曰占城曰瓜哇曰暹羅曰舊港曰啞嚨曰滿刺加曰蘇門答

刺曰那姑兒曰黎代曰喃勃里曰溜山曰榜葛刺曰錫蘭山曰小葛蘭曰阿枝曰古里曰祖法兒曰忽魯謨斯曰阿丹曰天方凡二十國於其風土人物詢諸通事轉譯漢語觀縷畢記至宣德九年編成所記與明史外國傳大概相同疑史採用此書也

瀛涯勝覽一卷 兩江總督採進本

明馬觀假觀不知何許人書中多記鄭和出使時事則作於永樂以後也所記海外諸番曰占城曰瓜哇曰萬港國曰暹羅曰滿刺加曰啞魯國曰蘇門答刺曰那孤兒曰黎代曰喃勃里曰錫蘭曰小葛蘭曰阿枝曰古俚曰溜山曰祖法兒曰阿丹國曰榜葛刺國曰忽魯謨國凡十九國而為篇十八其那孤兒國附見蘇門答刺後以其微也各載其疆域道里風俗物產亦略及沿革大抵與史傳相出入

朝鮮雜志一卷 浙江范懋柱家天一閣藏本

舊本題明董越撰越有朝鮮賦已著錄是書繁碎無體例以感所撰朝鮮賦校之皆賦中越所自註蓋好事者鈔出別行偽立名目非越又有此書也

海槎餘錄一卷 江蘇周厚培家藏本

明顧訥撰訥字匯堂吳縣人官至南安府知府是編乃其官儋州時所著凡風土物產悉隨筆記之共四十餘則皆地志所已具惟處置叛黎一節敘述頗詳為蠻司合志所未及云

日本考略一卷 浙江范懋柱家天一閣藏本

明薛俊撰俊定海人嘉靖二年日本國使宗設來貢抵寧波未幾宋素卿等亦至互爭真偽自相殘殺所過州縣大肆焚掠浙江瀕海之地人民苦之後因纂輯是書大略言防禦之事為多而國土風俗亦類入焉然見聞未廣所輯沿革疆域二略約舉梗概挂漏頗多屬國中兼及新羅百濟等國不知新羅百濟在宋時已為朝鮮所併其時並無是國矣又序世系但及宋雍熙以前而不載元以後國王名號亦疎漏也

日本圖纂一卷 浙江范懋柱家天一閣藏本

明鄭若曾撰若曾有鄭開陽雜著已著錄此書乃其在胡宗憲幕府所作以坊行日本考略一書舛謬難據因從奉化人購得南粵倭商祕圖持以詢諸使臣降倭通事火長之屬彙訂成編前為圖三幅附以論說後載州郡土貢道路形勢語言什器寇術而儀制詩表別為附錄視若曾萬里海防編內所載較為詳密其針經圖說止載入貢故道而闕道便利皆隱而不言蓋恐海濱窳穴得通倭之路有深意存焉惟其言明太祖洪武二年命趙秩往諭其國明史載在洪武三年又言太宗十九年寇遼東總兵劉江殲之於望海埚明史載在永樂十七年乃總督劉榮非總兵劉江均不相合然明史據明實錄及國史不得有誤殆是書傳聞未實也

朝鮮圖說一卷 浙江范懋柱家天一閣藏本

明鄭若曾撰先圖後考次詳其世紀都邑山川風俗土產道里貢式而以宋鄭興裔奏議一篇附焉蓋是時朝鮮亦被倭患故因日本而及之

琉球圖說一卷 浙江范懋柱家天一閣藏本

明鄭若曾撰體例與朝鮮圖說同地理則但標其針路末附宋鄭藻紀事一篇琉球奉明正朔從無寇掠殆以其國外偏於倭內密邇於福建而為預防之計歟

安南圖說一卷 浙江范懋柱家天一閣藏本

明鄭若曾撰體例亦與朝鮮圖說同但增疆域偽制二門疆域寥寥數語其偽制則紀黎莫二姓事也未附宋鄭竦紀略一篇若曾時距莫登庸事未遠故籌畫邊防併及安南然相距既遙所傳聞者略矣

西洋朝貢典錄三卷 江蘇巡撫採進本

明黃省曾撰首曾字勉之吳縣人嘉靖辛卯舉人明史文苑傳附見文徵明傳中是編紀西洋諸國朝貢之事自占城以迄天方為國二十有三國各一篇篇各有論凡道里遠近風俗美惡物產器用之殊言語衣服之異靡不詳載

考明史外國傳其時通職貢者尙不盡於此錄省曾止就內侍鄭和所歷之國編次成書餘固未暇及也未有二跋
一爲東川居士孫允伽一爲清常道人趙開美允伽稱此書初未付梓得其手彙錄之開美謂其章法句法頗學山
海經信爲奇書錢曾讀書敏求記亦載之然其精華已採入正史餘亦無他異聞也

夷俗記一卷

浙江鮑士
恭家藏本

明蕭大亨撰大亨號岳峯泰安人嘉靖壬戌進士官至兵部尙書是書專紀鞋靴風俗分匹配生育分家治姦治盜
聽訟葬埋崇佛待賓尊師耕獵食用帽衣敬上禁忌牧養習尙教戰陣貢市二十類蓋大亨嘗爲宣大總督故錄
其所聞如此然殊多失實不足徵信惟順義王互市之地明史載大同於左衛北威遠堡邊外宣府於萬全右衛
張家口邊外山西於水泉營而此書載大同互市有三堡一曰守口堡二曰得勝堡三曰新平堡則大亨所親見
較史爲詳云

朝鮮國志一卷

浙江范懋桂家
天一閣藏本

不著撰人名氏所存惟京都風俗山川古都古蹟五門中稱我康獻王知爲朝鮮人作引明一統志稱大明知爲作
於明時又多稱王氏諸王爲高麗王知爲明之中葉李氏有國改稱朝鮮之後也

東夷圖說二卷嶺海異聞一卷續聞一卷

浙江吳玉
屏家藏本

明蔡汝賢撰汝賢字思齊華亭人隆慶戊辰進士是編成於萬歷丙戌所紀皆東南海中諸國殊多傳聞失實如謂
琉球國人宵目深鼻男去髭鬚鵝鳥羽爲冠裝以珠玉赤毛今琉球貢使旅來自所其睹殊不如其所說海西諸國
統稱西洋汝賢乃以西洋爲國名則更謬矣至於異聞續聞尤多荒誕不經其圖像悉以意杜撰亦毫無所據

四川土夷考四卷

浙江汪汝
璠家藏本

明譚希思撰希思有明大政纂要已著錄是書乃希思在蜀時命布政使官屬取全蜀土司土府繪圖立說哀爲二
編列於萬歷二十六年首全圖次各土司土府分圖圖各有說凡七十八篇其中所列多沿邊城堡守禦名目而於

土司境壤山川形勢概未之及蓋專爲防守之策而設雖名爲土夷考其實乃險隘圖也所附之說僅據州縣冊簡略頗甚亦不足以備考核

日本考五卷

浙江鮑士恭家藏本

明李言恭都杰同撰言恭字惟寅岐陽武靖王文忠之裔以萬歷二年襲封臨淮侯杰字彥輔蔚州人嘉靖丙辰進士官至南京兵部尚書方言恭督京營戎政時杰爲右都御史會倭患方劇乃其據所聞爲此書記其山川地理及世次土風而於字書譯語臚載尤詳後倭陷朝鮮封貢議起杰以力爭不合徙南京而言恭子宗城卒爲石星所薦充正使往封至釜山而倭情中變易服逃歸被劾論戍蓋徒恃紙上空言宜其不能悉知情僞也

咸賓錄八卷

浙江鮑士恭家藏本

明羅曰褰撰曰褰字尙之江西人是編刊於萬歷中分列諸國之事以東西南北爲分欲誇明代聲教之遠故曰咸賓其實多非朝貢之國又敘事古今綵雜標題人地混淆亦頗無體例

別本坤輿外紀一卷

大學士英廉購進本

舊題本 國朝南懷仁撰載吳震方說鈴前集中案懷仁坤輿外紀別有全本已著於錄此本摘錄其文併刪其圖說乃叢書之節本猶明季坊刻竄亂古書之陋習也

西方要紀一卷

編修程晉芳家藏本

國朝西洋人利類思安文思南懷仁等撰利類思安文思皆以明末入中國南懷仁以順治十六年至京師此書則康熙初年所述凡二十條專記西洋國土風俗人物土產及海程遠近大抵意在夸大其教故語多粉飾失實

洱海叢談一卷

浙江巡撫採進本

國朝釋同撰撰同撰字翰菴雲南大理府文殊寺僧也是書紀滇南未入版圖之初引隋書西海阿育國王仲子封蒼洱之閒爲南詔之始祖其後世滅而復興者有段氏蒙氏高氏相承至明初始皆內附所載觀音大士結茅郡中及唐

永徽後現身七化之語皆近荒誕以繼徒爲地志自張其教固所不免耳

八紘譯史四卷紀餘四卷

江蘇巡撫採進本

國朝陸次雲撰次雲有湖塘雜記已著錄是書專錄荒外諸國古事皆採摭史傳復見不鮮近事多據瀛涯勝覽職方外紀諸書亦多傳聞失實所記西域山川物產其地自天威着定俱入版圖如謂高昌盛暑人皆穴處鳥飛或爲日氣所爍而塵謂火焰山烟焰燭天謂火蠶綿絮衣一襲止用一兩稍多熱不可耐謂白疊子其實成繭中有細絲謂哈密四味木其實如棗以竹刀取之則甘鐵刀取之則苦木刀取之則酸蘆刀取之則辛謂龜茲有山山泉行數里入地狀如醍醐甚臭人服之齒落更生今由嘉峪關南路至喀什噶爾即經三國故地安得有此事哉即其他可知矣後附譯史紀餘四卷一爲東海西海及異物二爲高麗日本占城安南琉球之詩三爲外國錢文四爲西番百譯緬甸暹羅四國之書亦皆耳剽之談不爲確據如人面魚食目一條此書作前朝使臣至日本事尙裕織志又

八紘荒史一卷

江蘇巡撫採進本

國朝陸次雲撰次雲既撰八紘譯史記其會通中國者因復摭小說稗官所載荒渺之說爲此書皆無稽之談也書首題卷之一則當不止此卷而次雲所刻雜著前列總目此書實止一卷豈欲續輯而未成歟

尙裕織志三卷志餘一卷

大學士英廉家藏本

國朝陸次雲撰所記皆諸苗蠻種落風俗前有題詞稱諸書所載同異攸殊余徵諸見聞詳爲考正措詞雖簡徵事彌該上卷爲尙裕羣言考正中卷爲蠻獠志下卷爲滇中尙裕所產志餘一卷則皆蠻中歌謠自吳淇粵風續所採出者也

安南紀游一卷

大學士英廉家藏本

國朝潘鼎珪撰鼎珪字子登晉江人是編成於康熙二十七年乃鼎珪游廣東時偶附海舶遇風飄至其國因紀其

山川風土之大略與諸書所記不甚相遠無他異聞

海外紀事六卷 浙江巡撫採進本

國朝釋大汕撰大汕廣東長壽寺僧康熙乙亥春大越國王阮福週聘往說法越歲而歸因記其國之風土以及大洋往來所見聞大越國者其先世乃安南贅婿分藩割據遂稱大越卷前有阮福週序題丙子蒲月蓋康熙三十五年也

連陽八排風土記八卷 浙江巡撫採進本

國朝李來章撰來章號禮山本名灼然以字行襄城人康熙乙卯舉人官連山縣知縣是書即其康熙戊子在連山時所作八排者獠寮所居以竹木為若欄謂之排也凡分圖繪形勢風俗言語剿撫建置約束向化八門門為一卷其目尚有第九卷題曰雜述上下外有錄無書豈為之而未成歟中多自敘政績其向化一門紀所判斷之案各為標目殆似傳奇尤非體例

中山傳信錄六卷 兩淮馬給家藏本

國朝徐葆光撰葆光字潑齋吳江人康熙壬辰進士官翰林院編修康熙五十七年 冊封琉球國世子尚貞為國

王以葆光為副使歸時奏上是書繪圖列說紀述頗詳

楚南苗志六卷 湖北巡撫採進本

國朝段汝霖撰汝霖字時齋號梅亭漢陽人由舉人歷官建寧府知府是書乃汝霖為湖南永綏同知時所作前五卷皆載苗人種類風俗物產言語衣服及歷朝控禦撫治之法末一卷附載瑤人土人及粵西六寨蠻而六寨蠻尤為簡略以非楚所治故也體例冗雜敘述亦不甚雅馴而得諸見聞事皆質實惟首載星野與苗蠻土人皆無所涉未免沿地志之陋格耳

右地理類外紀之屬三十四部八十三卷 內一部無卷數 皆附存目

欽定四庫全書總目卷七十八

欽定四庫全書總目卷七十九

史部三十五

職官類

前代官制史多著錄然其書恒不傳南唐書徐鉉傳稱後主得齊職制其書罕覩惟知之今亦無舉其名者世所稱述周官外惟唐六典最古耳蓋建官為百度之綱其名品職掌史志必撮舉大凡足備參考故本書繁重反為人所倦觀且惟議政廟堂乃舊舊典其閒如元豐變法事不數逢故著述之家或通是學而無所用習者少則傳者亦稀焉今所採錄大抵唐宋以來一曹一司之舊事與儆戒訓誥之詞今釐為官制官箴二子目亦足以稽考掌故激勸官方明人所著率類州縣志書則等之自鄧矣

唐六典三十卷

折江元改
陳家藏本

唐元宗明皇帝御撰李林甫奉敕註其書以三師三公三省九寺五監十二衛列其職司官佐敘其品秩以擬周禮書錄解題引韋述集賢記註曰開元十年起居舍人陸堅被旨修是書帝手寫白麻紙六條曰理教禮政刑事令以類相從撰錄以進張說以其事委徐堅思之經歲莫能定又委母舅徐欽韋述始以令式入六司其沿革並入註中後張九齡又委苑咸二十六年奏草上迄今在直院亦不行用程大昌雍錄則曰唐世制度凡最皆在六典或曰書成未嘗頒用今案會要則牛僧孺奏升諫議為三品用六典也貞元二年定著朝班次序每班以尚書省官為首用六典也又其年齊參論祠祭當以監察洎之亦援六典也此類殆不勝述草制之官每入院必首索六典則時制盡在故也二說截然不同考呂溫集有代陳相公請刪定施行六典開元禮狀一篇稱宣示中外星紀六周未有明詔施行遂使喪祭冠昏家猶疑禮之等威名分國靡成規請於常參官內選學藝優敏者三五人就集賢院各盡異同量加刪定然後特降德音明下有司云云與韋述之言相合唐人所說當無譌誤大昌所引諸事疑當時討論典章亦相引據而公私科律則未嘗事事遵用如明代之會典云爾范祖禹唐鑑論其既有太尉司徒

司空又有尚書省是政出於二也既有尚書省又有九寺是政出於三也蓋自唐虞至周有六官而無寺監自秦迄陳有寺監而無六官獨此書兼之故官多重複今考是書如林甫註中以諸州祥瑞預立條格以待奏報之類誠為可嗤然一代典章釐然具備祖禹之所論或以元豐官制全祖是書有所激而云然歟又唐會要載開元二十三年九齡等撰是書而唐書載九齡以開元二十四年罷知政事則書成時九齡猶在位後至二十七年林甫乃註成獨上之宋陳騭館閣錄載書局有經修經進經修不經進經進不經修三格說與九齡皆所謂經修不經進者卷首獨著林甫蓋即此例今亦姑仍舊本書之不復追改焉

翰林志一卷 兩江總督採進本

唐李肇撰案肇所作國史補結銜題尚書左司郎中此書結銜則題翰林學士左補闕王定保據言又稱肇為元和中中書舍人新唐書藝文志亦三肇為翰林學士坐薦柏耆自中書舍人左遷將作少監以唐官制考之蓋自左司改補闕入翰林後為中書舍人坐事左遷國史補及此書各題其作書時官也唐時翰林院在銀臺門內麟德殿西重廊之後為待詔之所新唐書百官志謂乘輿所在必有文詞經學之士下至卜醫伎術之流皆直於別院以備燕見者是也韋執誼翰林院故事亦謂其地乃天下以藝能伎術見召者之所處蓋其始本以延引雜流原非為文學侍從而設至明皇置翰林待詔供奉與集賢院學士分掌制誥其職始重後又改為學士別置學士院謂之東翰林院於是舊翰林院雖尚有以伎能入直如德宗時術士桑道茂之類而翰林之名實盡歸於學士院歷代相沿遂為儒臣定職肇此書成於元和十四年唐宋藝文志皆著於錄其記載賅備本末燦然於一代詞臣職掌最為詳晰宋洪遵輯翰苑羣書已經收入今以言翰林典故者莫古於是書故仍錄專本以存其朔焉

麟臺故事五卷 永樂大典本

宋程俱撰俱字致道衢州開化人舉進士試南宮第一廷試中甲科歷官徽猷閣待制封新安縣伯事蹟具宋史文苑傳玉海載元祐中宋匪躬作館閣錄紹興元年程俱上麟臺故事淳熙四年陳騭續為館閣錄蓋一代翰林故事

具是三書今宋錄已亡陳錄僅存而亦稍譌闕是書則自明以來惟說郭載有數條別無傳本今考永樂大典徵引是書者特多排比其文猶可成帙其書多記宋初之事典章文物燦然可觀蓋紹興元年初復祕書省首以俱爲少監故俱爲是書得諸官府舊章最爲詳備如東都事略邢昺傳載由侍讀學士遷工部侍郎不著加中散大夫宋綬傳載召試中書不著遷大理評事宋史韓琦傳載由通判淄州入直集賢院不著爲太常寺丞及太子中允王陶傳載爲太子中允不著編校昭文館書籍孫洙傳亦不著洙嘗爲於潛令及編校祕閣書籍而皆見於是書又如玉海引謝泌傳泌上言請分四庫書籍入掌一庫事在端拱初而其一百六十八卷又載此事於天聖五年前後自相刺謬據此書所載則在咸平之初又續通鑑長編載咸平二年七月甲寅幸國子監還幸崇文院而此日之後又有癸丑則是月之內不容先有甲寅顯然牴牾是書乃是七月甲辰如此之類凡百餘條皆足以考證異同補疎陳略於掌故深爲有裨原書文獻通考作五卷今所哀錄仍符此數疑當時全部收之通考又稱凡十二篇而不詳其篇目其見於永樂大典者有官聯職掌康祿三門皆與陳騷書標題相合疑騷書卽因俱舊日修之今卽以騷之篇目分隸諸條莫不一一條貫無所齟齬亦可謂神明煥然頓還舊觀矣騷錄載騷書會餞會及大宴學士院三條俱云出麟臺故事然引其事不載其詞殆姚廣孝等排纂之時刊除重複誤削前而存後當時編輯無緒卽此可見一端今亦無從補入惟俱北山集中載有後序一篇竝附錄之以存其舊焉

翰苑羣書二卷

浙江巡撫採進本

宋洪遵編選字景嚴鄱陽人皓之子也與兄适同中紹興十二年博學鴻詞科賜進士出身歷官徽猷閣直學士出知平江府孝宗時召除翰林學士承旨拜同知樞密院事江東安撫使資政殿學士提舉洞霄宮卒諡文安事蹟具宋史本傳是書後有乾道九年遵題記曰翰苑苑清地禁洽唐迄今爲薦紳榮選世蒙國恩父子兄弟接武而進實爲千載幸遇曷嘗稍遺事一編揭來建業以家舊藏李肇元稹章處厚章執諫楊鉅丁居晦洎我宋數公凡有紀於此者竝采之木仍以國朝年表中典題名附陳振孫書錄解題曰自李肇而下十一家及年表中典後題名共爲一

書此本上卷爲李肇翰林志元稹承旨學士院記韋處厚翰林學士記韋執誼翰林院故事楊鉅翰林學士院舊規丁居晦重修承旨學士院記李昉禁林讌會集凡七家下卷爲蘇易簡續翰林志蘇耆次續翰林志學士卒表翰苑題名翰苑遺事凡五種其遺事爲選所續不在其數實止四家除年表題名外所收不過九家與振孫所記不合考宋史藝文志載是書本三卷此本止上下二卷又文獻通考所載尚有唐張著翰林盛事一卷宋李宗諤翰苑雜記一卷若合此二家正足十一家之數豈原本有之而今本佚其一卷耶

南宋館閣錄十卷續錄十卷

永樂大典本

南宋館閣錄十卷宋陳騭撰續錄十卷無撰人名氏騭字叔進台州臨海人紹興二十四年進士第一慶元初官至知樞密院事兼參知政事忤韓侂胄提舉洞霄宮卒諡文節事蹟具宋史本傳陳氏書錄解題謂淳熙中騭長蓬山與同僚錄建炎以來事爲此書李壽爲之序續錄者後人因舊文而增附之今考是錄所載自建炎元年至淳熙四年續錄所載自淳熙五年至咸淳五年皆分沿革省舍儲藏修纂撰述故實官秩康祿職掌九門典故條格纖悉畢備亦一代文獻之藪也世所傳本譌闕殆不可讀惟永樂大典所載差爲完具今互相考訂補其脫漏者三十一條正其舛錯者一十六條而其紀載諸人爵里有與宋史互異者竝爲臚註以資參考惟前錄中沿革一門續錄中輿祿一門永樂大典所載亦全卷皆佚無從補苴蓋是書殘闕已在明以前矣今亦姑仍其舊焉

玉堂雜記三卷

浙江鮑士恭家藏本

宋周必大撰必大字子充一字洪道廬陵人紹興二十一年進士中宏詞科權中書舍人孝宗朝歷右丞相拜少傅進益國公躋上宗朝以少傅致仕卒諡文忠事蹟具宋史本傳此書皆記翰林故事後編入必大文集此乃其別行之本也宋代掌制最號重職往往由此致位二府必大受知孝宗兩入翰苑自權直院至學士承旨皆備爲之凡鑾坡制度沿革及一時宣召奏對之事隨筆記錄集爲此編所紀如奉表德壽署名賜安南國王嗣子詔書之類皆能援引古義合於典禮其他瑣聞遺事亦多可資談柄遺翰苑叢書所錄皆唐代及汴都故軼俱備蓋故事亦成於紹興

聞其隆興以後翰林故實惟稍見於館閣續錄及洪邁容齋隨筆中得必大此書互相稽考南渡後玉堂舊典亦庶幾乎蘊然具矣

宋宰輔編年錄二十卷

兩淮鹽政採進本

宋徐自明撰自明字誠甫號慥堂永嘉人嘗官太常博士終零陵郡守初北宋時神宗命陳繹爲拜罷圖一卷樞府拜罷錄一卷元豐閒司馬光復作百官公卿拜罷年表十五卷其後曾鞏譚世勣蔡幼學李燾各有撰述而不能無所闕略自明因摭拾舊事補其遺漏續作此書以宋世官制中書樞密爲二府俱宰輔之職故自平章事參知政事樞密使知樞密院事同知簽書樞密院事皆著其名位而詳其除罷黜陟之由編年系日起建隆戊午迄嘉定乙亥大都本之通鑑長編繫年要錄丁未錄東都事略而又旁採他書以附益之末末賅具最爲詳核又據宋朝大詔令玉堂制章備錄其鎖院制詞更有碑於文獻以宋史宰輔年表互相考校如建隆元年趙普拜樞副此錄在八月甲申而年表在戊子太平興國四年石熙載拜簽樞此錄在正月庚寅而年表在癸巳太平興國八年宋琪拜參政此錄在三月庚申而年表在癸亥雍熙三年辛仲甫拜參政此錄在六月戊戌而年表在甲辰此類極多亦足爲讀史者考異之助至宋世所降麻制例載某人所行之詞此錄開存姓名亦可備掌故其中如熙寧四年陳升之起復入相制乃元絳之詞載於宋文鑑中以升之力辭不拜其事未行竝其制詞不錄是也至如端拱元年呂蒙正拜相制爲李沆之詞治平二年文彥博除樞密使制熙寧二年陳升之拜相制皆爲王珪之詞元符三年曾布拜相制爲曾肇之詞亦竝見於宋文鑑而此反闕註皆不免有所掛漏然二百五十年閒賢姦進退畢具是編於以考國政而備官箴亦可云讀習典故者矣寶祐閒自明子居謫宰水幅嘗刻之縣學後漸亡佚明嘉靖閒大典呂邦耀始得鈔本於焦竑家而闕其兩卷後周藩宗室勤美以所藏殘本補足復梓以傳蓋亦僅存之本也

秘書監志十一卷

編修汪如藻家藏本

元王士點商企翁同撰士點有禁扁已著錄企翁字繼伯曹州人官著作佐郎其書成於順帝至正中凡至元以來

欽定四庫全書總目卷七十九

建置遷除典章故事無不具載司天監亦附錄焉蓋元制司天監隸秘書省猶漢制以太史令兼職天官之義也後列職官題名與南宋館閣錄例同其兼及直長令史皆纖悉詳錄則以金源以後以掾吏為士人登進之階往往由此起家游至卿相其職重於前代耳其所紀錄多可以資考核宋彝尊嘗據以辨吳郡即張應珍以大德九年改名歷任秘書少監非宋遺民證言安府志之誤則於史學亦多所裨矣

翰林記二十卷 浙江汪啟淑家藏本

不著撰人名氏案明史藝文志載黃佐翰林記二十卷而廖道南殿閣詞林記序有與泰泉黃佐纂翰林雜記六冊之語則是書自當出於佐手佐即撰泰泉鄉禮著錄於經部禮類者也所載皆明一代翰林掌故始自洪武迄於正德嘉靖閒每事各有標目凡二百二十六條本末賅具首尾貫串敘次頗為詳悉如所記殿閣卿寺轉銜與明會典諸書互有同異又會議繕寫諸條制度甚詳均足以備考核其七十八兩卷具列館閣題名九足以見一代人材升降之概廖道南殿閣詞林記自九卷以後多採佐書以足成之今以此本互相檢核其文不盡相合蓋道南又有所點竄以歸一家之體例此則佐之原本耳其文與道南之書互有詳略可以參考證明以繼李肇程俱陳騷王士點諸人所作唐宋元明以來詞林故事亦大略具備矣

禮部志彙一百十卷 浙江沈懋德採進本

明泰昌元年官修首列纂修姓氏自禮部尚書林堯俞至司務顧民昂等四十八次列批委纂修自東閣大學士前禮部尚書孫如游至儀制司員外郎張光房等六人次列巡按直隸蘇松等處御史據松江府知府揭薦生員俞汝楨纂修禮部志書公移竝禮部者聘赴書局批文則此書實出汝楨之手明史藝文志有俞汝楨禮儀志一百卷當即此書此題曰禮部志彙蓋其草創初成尙未定名之本也卷首汝楨名後竝列上海生員俞廷教名為薦舉公移所無殆入局以後續招協修故初稿不載歟其書首為聖訓六卷為洪武至隆慶詔諭次建官建署一卷次總職掌一卷次儀司職掌十六卷次祠司職掌十卷次客司職掌十卷次膳司職掌及司務職掌其二卷次歷官表四卷次奏疏五卷次列傳八

卷次儀司事例二十一卷次祠司事例九卷次客司事例九卷次膳司事例一卷次總事例七卷共為一百一十卷前列凡例三則共潮初制一則稱研討典故要在沿流溯源其理條貫一則稱典故之編不急於舊章而急於貫通其慎稽考一則稱網羅舊聞匪徇挂漏是懼而考正謬誤亦編摩第一義其言皆深得纂輯要領及其書敘述詳瞻首尾該貫頗有可觀如釋菜薦舉諸詔為明實錄所不載祈雪建宮諸諭為嘉靖祀典所未錄王妃冠服百官常服及大宴樂章較明史禮樂志為詳貢舉起送之額詔敕表章之式較明會典為備經筵傳班員額拾明集禮之所遺朝覲賞賚諸制補呈樣勝覽西域行程之闕雜索頤之文稍傷冗雜而取備掌故體例與著書稍殊固不能以是病之也

太常續考八卷

江蘇巡撫孫述本

不著撰人名氏考書中所錄益明崇禎時太常寺官屬所輯也凡祭祀典禮皆詳悉具載雖不免為案牘簿籍之文而沿革損益之由名物度數之細條分縷晰多明史禮志明會典明集禮及嘉靖祀典之所未載蓋總括一代之掌故則體實簡要專錄一官之職守則義取博賅言各有當故詳略迥不同也況集禮作於洪武會典作於成化嘉靖祀典惟載一時更崇之事自世宗以後百餘年之典制記載闕如此書職官題名終於崇禎十六年則一代儀章始末尤為完具固數典者所不可廢矣

土官底簿二卷

浙江江蘇徽州藏本

不著撰人名氏朱彝尊曝書亭集有是書跋但云鈔之海鹽鄭氏亦不言作者為誰其書備載明正德以前諸土司官爵世系承襲削除其命名與繕寫之式疑當時案牘之文而好事者錄存之也所載雲南土司百五十一家廣西土司百六十七家四川土司二十家貴州土司一十五家湖廣土司五家廣東土司一家共三百五十九家其官雖世及而請襲之時必以竝無世襲之文上請所奉進止亦必以姑准任事仍不世襲為詞蓋其相沿體式如此欲以示駕馭之權不容其據譜而索故物也然明自中葉後撫綏失宜威柄日弛諸土司叛服不常僅能羈縻勿絕而已我國家聲靈赫濯逆命者必誅舊籍所載大半皆已改土歸流其存者亦無不革心順化比於郡縣此書中所

列皆前代一時苟且之制本不足道以明史土司列傳祇記其征伐刑政之大端而於支派本末未能具晰是編詞雖俚淺而建置原委一一可徵存之亦足資考證焉其地雖在中外之間與郡縣牧守稍殊而受敕印襲爵祿納租賦供力役隨征調實與官吏不殊故明史不與外國同傳今亦附載於明代職官之末焉

詞林典故八卷

乾隆九年重修翰林院落成 聖駕臨幸 賜宴賦詩因 命掌院學士鄂爾泰張廷玉等纂輯是書乾隆十二年告成奏進 御製序文刊行凡八門一曰 臨幸盛典二曰官制三曰職掌四曰恩遇五曰藝文六曰儀式七曰解署八曰題名 臨幸盛典即述乾隆甲子燕欣庶歌請禮以為是書所緣起故弁冕於前官制職掌皆由西漢以至 國朝以待詔之選寫書之官皆自漢肇其端也恩遇斷自唐代以專官自唐代始也於 列聖及我 皇上寵渥之典別分優眷遷擢侍宴賚子詞科考試議敘贈卹八子目著 聖代右文遠逾前古也藝文惟收唐以來御製及應制諸作而詞館唱和不與焉美不勝收也儀式解署亦皆斷自唐代與恩遇門同例題名則惟載 國朝近有徵而遠難詳也考翰林有志自唐李肇始洪遵輯而錄之凡十一家然皆雜記之類也其分條列目竄為一編者自程俱麟臺故事始陳騷以下作者相仍然皆僅記一代之事朱彝尊作瀛洲道古錄又於 今制弗詳故張廷玉等進書表稱槐屬芸署不少前聞劉井柯亭獨饒故事但記載非無散見而舊萃罕有全書今仰稟 聖裁始成巨帙元元本本上下二千載始末釐然稽古崇儒之盛洵前代之所未有矣

欽定國子監志六十二卷

乾隆四十三年奉 敕撰先是國子祭酒陸宗楷等輯太學志進 呈而所述沿革故實濫載及唐宋以前殊失限斷乃 詔重為改定斷自元明蓋 本朝國子監及 文廟皆因前代遺址其構構實始於元初也首為 聖諭二卷以記 褒崇先聖 訓示儒林之大法次 御製詩文七卷備錄 列朝聖文 皇上宸翰次 諸學二卷紀 親祀 臨雍之禮次廟制二卷前列圖說後志建葺年月規制次祀位二卷詳載殿廡及崇聖祠諸位數次禮七卷分

記釋奠釋菜釋祿功告祭諸儀及祭器圖說次樂六卷分記樂制樂章律呂舞節二表及禮樂諸器圖說次監制一卷詳述條規次官師五卷載設官典守儀制銓除題名表次生徒七卷載員額考校甄用及外藩之入學者大經費四卷 恩賚歲支俸給備載焉次金石五卷冠以 欽頒彝器圖說 御製諸碑併元以來進士題名碑而殿以石鼓圖說次經籍二卷具載 賜書及版刻之目次藝文二卷則列諸臣章奏詩文及 諸論著識餘二卷曰紀事曰綴聞並摺摭雜記以備考核議大識小罔弗詳賅於以誌 國家重道崇儒作人訓俗之盛較諸監臣之初編如葦籥土鼓改而爲韶鈞之奏矣

欽定歷代職官表六十三卷

乾隆四十五年奉 敕撰粵自龍馬水火肇建官名然夏商以前書闕有闕遺制不盡可考其可考者惟周禮爲最詳迨秦漢內設九卿外制列郡而官制一變東京以後事歸臺閣雖分置尙書六部而政在中書其權獨重漢魏之制至唐宋而又一變明太祖廢中書省罷丞相盡歸其職於六部永樂開復設內閣而參以七卿唐宋之制至是而又一變矣其開名號品數改革紛繁大抵勢足以相維則乾綱不失權有所偏屬則魁柄必移故官制之得失可以知朝政之盛衰也 國家稽古建官循名核實因革損益時措咸宜我 皇上朗照無私 權衡獨秉舉直錯枉宮府肅清尤從來史冊所未有復 念歷朝官制典籍具存互備溯源流明其利弊庶前規可鑑法戒益昭乃一特命四庫全書館總纂官內閣學士今陞兵部右侍郎臣紀昀光祿寺卿今陞大理寺卿臣陸錫熊翰林院編修今陞山東布政使臣孫士毅總校官詹事府少詹事今陞內閣學士臣陸費輝等考證辨次輯綴是編分目悉準 今制凡長貳僚屬具列焉明綱紀也其兼官無正員而所掌綦重如軍機處之類亦別有專表崇職守也八旗及新疆爵秩前所未有者並詳加臚考著 聖代之勅建遠邁遠古也或古有而今無或先置而後廢並爲採掇別附於篇備參訂也每門各冠以表表後詳敘建置首列 國朝略如唐六典之例次以歷代則節引諸書各附案語以疏證其異同上下數千年分職率屬之制元元本本罔弗具焉考將相及百官公卿之有表始自馬班一史後

如唐書之宰相表宋史之宰相表明史之內閣七卿表俱沿其例然所紀僅拜罷年月與官制無關且斷代爲書不
相通貫尋檢頗難至鈔撮故實如孫逢吉職官分紀之類又但供詞藻於實政無裨是書發凡起例悉聚 睿裁包
括古今貫串始末旁行斜上援古證今經緯分明參稽詳密不獨昭垂奕禩爲董正之鴻模卽百爾臣工各明厥
職用以顧名而思義亦益當知所做助矣

右職官類官制之屬十五部三百七十五卷皆文淵閣著錄

州縣提綱四卷

永樂大典本

不著撰人名氏楊士奇文淵閣書目題陳古靈撰古靈者宋陳襄別號也襄字述古侯官人慶歷二年進士官至
右司郎中樞密直學士事蹟具宋史本傳史稱其莅官所至必講求民閒利病沒後友人劉彝視其篋得手書數
十幅皆言民事則此書似當出於襄然襄所著古靈集尙傳於世無一字及此書又所著易講義郊廟奉祀禮文
校定夢書等見宋史藝文志編建通志說郭中不言更有此書晁陳二家書目亦皆不著錄書內有紹興二十八
年語又有昔呂惠卿昔劉公安世語考襄卒於元豐三年距南渡尙遠不應載及紹興且劉呂皆其後進不應稱
昔其非襄撰明甚今永樂大典所載本蓋據元初所刻前有吳澄序止言前修所撰不著其名氏蓋澄亦疑而未
定知文淵閣書目所題當出偽傳不足據矣其書論州縣莅民之方極爲詳備雖古今事勢未必盡同然於防姦
釐弊之道扶摘最明而首卷推本正己省身凡數十事尤爲知要亦可爲司牧之指南雖不出於襄手要非究心
吏事洞悉民情者不能作也

官箴一卷

浙江鮑士恭家藏本

宋呂本中撰本中有春秋集解已著錄此乃其所著居官格言凡三十三則宋史本中列傳備列其著作之目不
載是書然藝文志雜家類中乃著錄一卷此本載左圭百川學海中後有寶祐丁亥永嘉陳昉跋蓋昉所刊行
或當日偶然題記如歐陽修試筆之類本非有意於著書後人得其手彙傳寫鐫刻始加標目故本傳不載歟本

中以工詩名家然所作童蒙訓於修己治人之道具有條理蓋亦頗留心經世者故此書多閱歷有得之言可以見諸實事書首卽揭清慎勤三字以爲當官之法其言千古不可易王士禎古夫于亭雜錄曰 上當 御書清慎勤三大字刻石 賜內外諸臣案此三字呂本中官箴中語也是數百年後尙蒙 聖天子採擇其說 訓示百官則所言中理可知矣至其論不欺之道明白深切亦足以資儆戒雖篇帙無多而詞簡義精固有官者之龜鑑也

百官箴六卷

內府藏本

宋許月卿撰月卿字太空後更字宋士婺源人始以軍功補校尉理宗時換文資就舉以易魁江東廷對賜進士及第官至浙江西運幹買似道當國召試館職語不合罷云閉門著書自號泉田子宋亡不仕道曠十年乃卒亦志節之士也是書仿揚雄官箴分胙列職各申規戒考宋史百官志無筵乃言路兼官二府掾乃樞密中書屬吏參知政事以門下中書侍郎爲之登聞院諫議進奏院隸給事中俱轄於門下省軍器監文思院俱轄於工部是書皆各自爲箴蓋以所掌之事區分故既列本職又及其兼官既列總司又及其所分掌非復出也又考永樂大典所載宋何異中與百官題名雖殘闕不完而所標官署職掌與此書頗有異同蓋自元豐變制以後品目至爲淆雜南渡以後分析併首益以靡恒此書據一時之制言之故互有出入也前有月卿進表稱百官箴並發凡言例其七帙而今止六卷校以次第實無遺漏殆原本凡例自爲一卷傳錄者合併之歟虞人之箴遠見左傳繩墨匡違其風自古月卿效法其體雖申明職守僅託空言而具列官邪風戒有位指陳善敗觸目警心亦未嘗無百一之裨焉

書簾術論一卷

浙江鮑士恭家藏本

宋胡太初撰太初天台人端平乙未其外舅陶某出宰香溪太初因論次縣令居官之道凡十五篇以貽之後十七年爲淳祐壬子太初出守處州越明年復得是箴於其戚陶雲翔遂鈔諸版以授屬 縣其自首曰盡己次日曰臨民曰事上曰察案曰御史曰聽訟曰治獄曰催科曰理財曰差役曰賑恤曰行刑曰期限曰勢利而終之以遠嫌條目詳

盡區畫分明蓋亦州縣提綱之類也書中臚列事友雖多涉宋代條格與後來職制不盡相合然其大旨以潔己清
心愛民勤政爲急務言之似乎平近而反覆推闡實無不切中事情世說新語載傅氏有理縣請其書不傳牧民者
能得是編之意而變通之則此一卷書亦足以補其闕矣

三事忠告四卷 桂林府同知李文藻刊本

元張養浩撰養浩字希孟號雲莊濟南人官至禮部尙書參議中書省事天歷中拜陝西行臺中丞卒諡文忠事蹟
具元史本傳養浩爲縣令時著牧民忠告二卷凡十綱七十二子目爲御史時著風憲忠告一卷凡十篇入中書時
著廟堂忠告一卷亦十篇其言皆切實近理而不涉於迂闊蓋養浩留心實政舉所閱歷者著之非講學家務爲高
論可坐言而不可起行者也明張綸林泉隨筆曰張文忠公三事忠告誠有位者之良規觀其在守令則有守令之
式居臺憲則有臺憲之箴爲宰相則有宰相之諷醇深明粹真有德者之言也考其爲人能竭忠徇國正大光明無
一行不踐其言云云其推挹可謂至矣三書非一時所著本各自爲編明洪武二十二年廣西按察司僉事揚州黃
士宏合爲一卷刻之總題曰爲政忠告陳璉爲序 案此本序文中稱爲政忠告而其標題亦稱三事忠告序蓋重刻所追改宣德六年河南府知府李
驥重刻改名三事忠告考書稱任人準夫牧作三事詩稱三事大夫皆在王左右之尊階施於廟堂忠告猶爲近之
御史縣尹不在是列如曰以三職所治爲三事則自我作古轉不及爲政之名爲該括一切矣蓋明人書帕之本好
立新名而不計其合於古義否也相沿已數百年不可復正今姑以通行之名著錄而附訂其乖舛如右

御製人臣儆心錄一卷

順治十二年 世祖章皇帝御撰凡八篇一曰植黨二曰好名三曰營私 四曰徇利五曰驕志六曰作僞七曰附勢

八曰曠官前有 御製序蓋因勅臣譚泰石漢大學士陳名夏等先後以囑怙伏法因推論古今來姦臣惡迹 訓

誡羣臣俾其知炯鑑也夫一氣流行化生萬品鸞鳳並育穀稗同滋實理數之不得不然故有君子必有小人雖唐
虞盛時四凶亦別名於朝列無論秦漢以下也不幸而遇昏亂之世則匪人得志其禍遂中於國家前明諸權倖是

也幸而遇綱紀修明之時則翔陽所照物無匿形雖百計彌縫終歸敗露則陳名夏諸人是也在我 世祖章皇
帝聖裁果斷 睿鑒英明足以駕馭羣材照臨萬象雷霆一震鬼域潛蹤雖有僉壬諒不敢復蹈覆轍而 聖人
慮周先事杜漸防微恐小人惟利是營多昏其智於陳名夏等不以爲積愆已稔自取誅夷反以爲操術未工別
圖揜蓋因 特頒宸翰普示班聯曲推其未發之謀明繪其欲施之策俾共知所聚黨而私議者已畢在 洞照
之中如九金鑄鼎先圖魑魅之形儻逢不若皆可以指而目之名而呼之山鬼之伎倆自窮而無所逞也 國家
重熙累洽百有餘年 列聖相承竝 乾剛獨斷從無如前代姦臣得以盜竊魁柄者豈非 祖宗貽謀有以垂
萬年之 家法哉

右聯官類官箴之屬六部十七卷皆文淵閣著錄

欽定四庫全書總目卷七十九

史部

職官類

七

身及日月合書卷之十一

欽定四庫全書總目卷八十

史部三十六

職官類存目

歷代銓政要略一卷編修程晉芳家藏本

舊本題宋楊億撰億字大年浦城人雍熙初年十一召試詩賦授祕書省正字淳化中命試翰林賜進士第天禧中官至工部侍郎翰林學士兼史館修撰卒諡曰文事蹟具宋史本傳此書宋史藝文志不著錄億本傳亦不載惟曹溶學海類編收之細核其文乃冊府元龜銓政一門總序也已為割裂作偽又億雖預修冊府元龜而據晁氏讀書志總其事者尙有王欽若同修者更有錢惟演等十五人作序者亦有李維等五人億於諸序不過奉敕點竄何所見而此序出億手此真隨意支配者矣

太常沿革二卷永樂大典本

元任栻撰栻始末未詳此書乃其為太常博士時所修前有危素序素時亦為太常博士故也上卷志沿革下卷皆職官題名始自中統迄於至正所載當時奏牘文移皆從國語譯出未經修潤又案元太常集禮一書中載官屬職掌曰都監曰祭祠局曰鑿儀局曰法物庫曰神廚局皆有事於大廟之官而以署令一人丞一人統之此上下兩卷中俱未載及轉以典書附於卷末義例殊不可解危素序云寺升院院有正從二品之異其增損官吏祿秩弗同具載此書然大要已具於元史矣

南臺備要二卷永樂大典本

元劉孟保等撰前有江南行御史臺都事索元岱序稱至元十四年立行臺於維揚以式三省以統諸道即今江南諸道行臺御史之在集慶者也中臺嘗併其官屬除拜合為一書刊布中外所謂憲臺通紀是已至正癸未某城董公守簡授湖廣行省中丞欲別為載籍以便觀覽題命據屬劉孟保等歷披案牘稽覈故實哀集成編則此

書乃補憲臺通紀之遺者也考憲臺通紀久已散佚永樂大典亦僅存其卷首故不著於錄而惟存此書之目焉

官職會通二卷 安徽巡撫探進本

明魏校撰校有周禮沿革傳已著錄此書又敷衍其說以明之六部配周之六官其所屬官因以附焉僅有天官

地官春官夏官四篇蓋亦未成之藁每述一官必曰今欲正某官之職云云然言之則成理行之則必窒自漢以

來未有以周禮致太平者也

南歷志二十四卷 浙江汪啟淑家藏本

明黃佐撰佐有秦泉鄉禮已著錄南都太學建於明太祖吳元年景泰中祭酒吳節嘗撰志一十八卷嘉靖初祭酒崔

銑重纂未就佐得其遺牘因復加修訂以吳志為本而增損成之凡事紀四職官表二雜考十二列傳六書法一

準史例頗為詳備惟音樂考一門多泛論古樂皆佐一己之見於太學制度無涉殊失限斷其第十八卷經籍考

當時以委助教梅篤成之務學問淹貫故敘述亦具有本末書成於嘉靖二十二年而中有萬歷中事蓋後人隨

時續添者也

虔臺志十二卷 浙江范懋柱家天一閣藏本

明蕭根等撰根爵里未詳宏治甲寅汀漳盜起楚粵之不逞者和之於是設巡撫都御史治贛州以控制諸省至

甲子罷置正德庚午盜攻武平縣乃復建焉嘉靖壬寅巡撫虞守愚命根等編纂虔臺始末為此書序次草創略

備故事而已贛州在陳以前曰南康至隋改為虔州宋紹興二十二年校書董德元上言虔州號虎頭城非佳名

廷議以虔有虔劉之意因改名贛州後人詞翰兼用古名然施於詩賦則可此記明代職官而用南宋以前之地

名殊於體例未安且名虔州時無御史臺於文義亦為杜撰明人著述往往如斯糾之不可勝糾也

呂梁洪志一卷 戶部尚書王際華家藏本

明馮世雍撰世雍江夏人嘉靖癸未進士官工部主事明時運道自徐州沂呂梁洪入濟設洪夫以牽輓歲命工

部屬官一員董其事謂之呂梁分司世雍嘗領其職因述前後建置始末及官署祠廟歷任姓氏以成斯志凡八篇篇首各有序末復繫以贊語

郎臺志略九卷

浙江范懋柱家天一閣藏本

明徐桂撰桂潛山人嘉靖乙未進士官郎陽府知府先是成化初原傑撫定荆襄流民置郎陽府設提督撫治一員鎮之嘉靖二十五年慈谿葉照以右副都御史領其任桂等輯比事略為此書前二卷載建置輿地公廨官職後七卷爲制奏政賦兵防著述此本有嘉靖以後事則金臺子淇等繼爲撫治又附益之也

虔臺續志五卷

浙江范懋柱家天一閣藏本

明陳燦撰燦里貢未詳官贛州府教諭此書乃嘉靖中巡撫南贛等處右副都御史談愷屬燦等所輯紀宏治以後設官沿革及分地統轄之制以續蕭根之書首一卷爲輿圖考後四卷則編年紀事據其凡例稱於虔臺志悉仍其舊凡所損益別爲一編蓋視舊志又稍變其例矣

南京太常寺志十三卷

浙江巡撫採進本

明汪宗元撰宗元號春谷崇陽人嘉靖己丑進士官至總理河道右副都御史是書乃宗元爲南京太常寺卿時所輯分謨訓規制職官禮書樂書舊制薦獻祭告祭器祿食夫役列傳爲十二門所記各祀祝文陳設及樂章樂器皆較明會典集禮諸書爲備至於薦獻品物應祀宮觀及署中藏經字號存貯什器皆條列不遺焉

南京太僕寺志十一卷

浙江巡撫採進本

明雷禮撰禮有明六朝索隱已著錄是書乃禮官南京太僕寺少卿時所作據其凡例稱首載洪武以後歷朝諭旨次以事例官司轄屬規制官田種馬草場冊籍條徭九志而列傳遺文終焉茲本祇十一卷草場以下全佚非完書矣

太僕寺志十四卷

浙江巡撫採進本

明顧存仁撰存仁字伯剛太倉人嘉靖壬辰進士官至太僕寺卿是書分官職題名馬政事例獨貧苑馬祠祀官署庫

藏點調軍馬圖文錄十一門然脫略太多如馬政一門上沿歷代而漢以後各史所載如梁之南牧左右牧北齊之乘黃左右龍各署皆闕而不敘文錄一門載漢之天馬歌唐杜甫之馳馬行是類何預太僕事詩集充棟又烏可勝收乎

浙省分署紀事本末六卷兩淮鹽政採進本

明茅坤撰坤有徐海本末已著錄是書之作蓋以湖州烏戍一鎮界連六縣跨帶兩省姦盜易於窟穴郡人致仕副使施儒以嘉靖十七年疏於朝請設縣不果議道通判後因通判權輕不足以彈制諸屬旋亦汰除萬歷元年始設同知以統之因作是書以紀其始末

甯臺雜記八卷兩淮鹽政採進本

明符驗撰驗有革除遺事已著錄是編乃其為巡按南直隸御史時所作專記南京御史臺故事因以上湖列朝設官命職之由分為十類曰天文曰院址曰院寮曰官制曰職守曰俸秩曰解字曰職官表曰宸翰曰碑記驗自為序述其凡例然輿地之書動陳星野已屬影響之談一官一署而首志天文其亦迂而鮮要矣

南京吏部志十五卷浙江巡撫採進本

明汪宗伊撰宗伊字子衡崇陽人嘉靖戊戌進士官至南京吏部尚書是編乃其為文選郎中時所作首聖訓次建官次公署次職掌次歷官表傳次藝文前有宗伊所作志引謂白之尚書失獄創為部志又諳之曾官吏部者侍郎李棠大理卿杜拯太僕卿殷邁鴻臚卿孫鑑應天府丞邱有巖郎中顧闕鄒國儒袁尊尼傳良諫主事蔡悉昂廷璧網羅散失以成此編頗為詳悉黃氏千頃堂書曰載宗伊尚有留銓志餘二卷蓋即補志中所遺者今其書未見云

吏部職掌無卷數兩淮馬裕家藏本

明黃養蒙撰方九功王象巖修蒙南安人嘉靖辛丑進士官至戶部右侍郎九功南陽人嘉靖丙辰進士官至南京工部右侍郎蒙有江昉考已著錄是編於明嘉隆以前吏部制度沿革載之最悉蓋排纂案牘而為之猶今之六部

則例也

念初堂集十二卷 江西巡撫 採進本

不著撰人名氏首題念初堂集其書則志太學之略也案鄧元錫函史下編載嘉靖間王祭酒材官司業時考稽

典訓作太學志六編編為之序序各有志並鈔撮其略云云蓋即是書也書列典制談訓禮樂政事論議人材六

門門各分上下二卷材江西新城人嘉靖辛丑進士官至太常寺卿掌國子監祭酒事元錫竟稱為祭酒非也

公侯簿三卷 浙江范懋柱家 天一閣藏本

不著撰人名氏前有嘉靖九年公牘一篇又有嘉靖二十六年公牘一篇蓋吏部驗封司所存冊籍相續編纂者

也鄧汝璧明功臣封爵考稱舊有底簿殆即指是書矣

詞林典故一卷附翰苑須知一卷 浙江巡撫 採進本

明張位撰位有問奇集已著錄此乃其官翰林學士時所輯詞館通行典例自經筵日講以迄輿從服色凡分三

十二門翰苑須知則庶常館規及俸祿錢糧數目當時刊版置院中人節著人給一冊然率據案牘原文不加潤

飾往往鄙俚可笑不足以繼翰林志翰苑羣書後也乾隆十有二年我 皇上嘉惠詞垣徵求文獻 特命輯詞林

典故一書本末源流繁然具備木天佳話榮冠古今是編殘闕之餘蓋不足以為典據今姑附存其目焉

明功臣封爵考八卷 浙江范懋柱家 天一閣藏本

明鄭汝璧撰汝璧有明帝后紀略已著錄是編成於萬曆丙子乃其為吏部驗封郎中時所輯紀明代諸臣封爵

凡分類二十日開國曰靖難曰征西曰征交趾曰征南曰征北曰征蠻曰征番曰禦寇 曰捕反曰備倭曰戰勝曰

戰歿曰歸附曰推戴曰海運曰營建曰迎立曰奪門曰外戚其以恩澤恩幸方術及追贈封者並附錄之分世封

除封為二類而採券文宗圖及鄭應吾學編本傳附入開以所見聞補其闕略起於洪武迄於隆慶據其自序蓋

以驗封司舊有功臣底簿病其弗全因續為補綴成此帙云

欽定四庫全書總目卷八十

史部 職官類存目

館閣漫錄無卷數 浙江范懋 杜家天一閣藏本

不著撰人名氏據焦竑國史經籍志載是書十卷題張元怵撰二人相去不遠必有據也元怵有紹興府志已著錄是書所錄皆明成祖至武宗時翰林除授遷改之事編年紀載亦間有論斷首題洪武三十五年者成祖革除建文四年年號仍稱洪武三十五年故也

掖垣人鑑十七卷附錄一卷兩淮鹽政 採進本

明蕭彥撰彥字思學涇縣人隆慶辛未進士官至湖廣總督是書乃萬歷二十年彥為兵科給事中時與同官王致祥等同輯明代六科名姓鄉貫出處始末共為一編以天順以前為前集成化以後迄萬歷為後集首冠以官制沿革及兩朝謨訓各一卷而以題名碑記諸篇附於其末

職官志一卷附后紀妃嬪傳外戚傳三篇副御史黃 登賢家藏本

不著撰人名氏所紀惟部院寺監諸司職掌不及武臣及外官蓋非足本也其敘歷朝官制至穆宗而止間有稱今上云云者蓋書成於萬歷中記載寥寥不足以存掌故末附后紀稱史官楊繼禮撰此書殆即繼禮史局殘本偶甯於世歟繼禮華亭人萬歷壬辰進士

楚臺記事七卷浙江汪敏 淑家藏本

明李天麟撰天麟字公振武定人萬歷庚辰進士由牧馬千戶所軍籍中式故自稱燕人官至監察御史巡按湖廣是書即在湖廣所作分地理圖說為四卷兵糧圖說為三卷又雜載章奏禮儀堂規供應等舊例猥雜煩瑣與書史簿籍無異其載贖僉銀數多寡以官階大小為準可見當時苞苴陋習而公然載之簡牘毫無顧憚尤足徵明政之不綱也

符司紀六卷副御史黃 登賢家藏本

明劉日升撰日升廬陵人萬歷庚辰進士官至應天府尹是編乃其官尚書司卿時所職具載典章事規及各官

牙牌各府衛金牌令牌之制後有附錄一卷為秦嘉植所續輯嘉植德清人續此書時官尚寶司丞其始末未詳
舊京詞林志六卷內府藏本

明周應賓撰應賓有九經考異已著錄應賓嘗以左論德少詹事兩掌南京翰林院事故著此書專記南院故事
永樂以後定都北京事有關於南院者亦錄之分紀事紀典紀官三門洪武初建翰林國史院於皇城內賜扁曰

詞林洪武十四年改翰林國史院為翰林院又別建解舍非故地矣獨詞林之稱自洪武以後皆沿之故應賓取
以為名焉

南京鴻臚寺志四卷江蘇周厚積家藏本

明桑學夔撰學夔濮州人萬歷壬辰進士官光祿寺少卿攝鴻臚寺事明初置侍儀司洪武九年改殿廷儀禮司
三十年始改為鴻臚寺永樂北遷乃以故署之在番都者加南京二字而禮儀亦因之有繁簡隆殺其後竟習簡
易故學夔創為寺志以復典章之舊然昧於取裁不諳體例屬官考語備載於冊而卿丞諸人之傳率全錄焦竑
獻徵錄舊文漫無刪節至以王守仁曾官此職遂以良知講學語書之累牘九支蔓之甚矣

官制備攷二卷浙江汪啟淑家藏本

舊本題明李日華撰日華有梅墟先生別錄已著錄是書因明代官制而上溯歷代之沿革大抵取簡書啟之用
外漏頗多不足以備考證末附文武爵秩數條並著京外官之稱呼尤未免於舛陋疑日華未必至此殆坊買託
名也

續宋宰輔編年錄二十六卷安徽巡撫採進本

明呂邦燿撰邦燿字元鞞錦衣衛籍順天人萬歷辛丑進士官至通政司右參議邦燿既刊行宋徐自明宰輔編
年錄復作是編以續之起寧宗嘉定九年終衛王昺祥興二年其體例皆仿原書而詳略失宜遠不及自明之精
核蓋此書大旨在紀拜罷歲月以備考證至其人行事本末則史家自有專傳原無庸復引繁稱自明於每人略

述梗概最為得體邦燿乃并朝廷之事廣為摭錄正史以外並據諸說以附益之泛濫殊甚又自明每人具職命官及罷免制詞足徵一朝典故嘉定以後雖無專書可考而見於南宋文集者尚有流傳邦燿不能蒐輯增補而反斥其有無不足重輒尤為寡識至如元順帝為瀛國公子不獨說本荒唐亦與宰輔編年全無關涉乃亦累牘連篇詞繁不殺真可謂漫無體要者矣

南京工部志十八卷 兩淮鹽政採進本

明朱長芳撰長芳上海人南京國子監生天啟初編修神宗光宗兩朝實錄博採志乘諸部寺舊無志者咸創為之南京工部尚書何熊祥因使長芳讀舊牘為此編

南京都察院志四十卷 兩淮馬察家藏本

明施沛撰沛始末未詳其修此書時則為南京國子監生時董其事者為操江副都御史徐必達亦天啟初因修兩朝實錄而作也

南京行人司志十六卷 浙江巡撫採進本

明翁逢春撰逢春吳縣人南京國子監生分詔命建官公署儀注奏疏年表列傳藝文八門董其事者為南京行人司左司副彭維成前有維成序序末私印作萬歷給諫四字考維成字元性廬陵人萬歷辛丑進士以刑科給事中謫是官故自標此目然既志行人宜以行人為斷是書乃載維成為給事中時奏疏是六科志非行人司志矣又載維成一切來往書牘居藝文十之五六是維成之別集非官書矣殆全不知體例為何事也

留都武學志五卷 兩淮鹽政採進本

明徐伯徵撰伯徵字儻臺海寧人萬歷己未進士官至揚州府知府明之武學建於正統壬戌因御史彭勗之請遷教授訓導等官以專教京衛武官之子有南京國子監祭酒陳敬宗所撰碑備載始末是編乃天啟三年伯徵官南京武學教授時所著分建置典禮制令職官選舉人物藝文七門

明文武諸司衙門官制五卷

江西巡撫採進本

不著撰人名氏前有題詞稱官制舊有成書久而多謬近兩淮運司翻刻者彼善於此而未嘗訂正亦非善本因照會典一統志及現行事宜採輯成編以廣其傳未署新喻縣丞陶承慶校正廬陵縣末學葉時用增補乃江西書賈刊行之本也所列官制大抵以萬歷初年為斷第五卷內附載上任選擇日期而並列天體赤口日等圖彌為猥雜殆不足議

官爵志三卷

浙江吳玉璠家藏本

明徐石麒撰石麒字寶摩嘉興人天啟壬戌進士授工部主事性魏忠賢削籍崇禎中官至吏部尙書南都被後不食死事蹟具明史本傳是志述有明一代官制歷引前代沿革互相參證引據頗為詳核然大抵為通典文獻通考所已具

古今官制沿革圖

無卷數兩江總督採進本

明王光魯撰光魯有開史約書已著錄是書載秦漢迄於宋元凡官制之升降沿革頗詳悉而限於尺幅考據亦多所未備明宏興路進校刊金履祥通鑑前編首列古今官制未著撰人姓名今校之悉與此合蓋即光魯本也

明官制五卷

浙江巡撫採進本

不著撰人名氏備錄明代直省各府州縣文武官員品秩暨道里遠近編戶多寡到任期限皆採之明會典及一統志諸書蓋坊間所刊以便仕宦之檢閱不足以言著書也

歷代銓選志一卷

編修程晉芳家藏本

國朝袁定遠撰定遠旦貫未詳此書其官吏部文選司郎中時作也歷敘各朝銓政選舉之法略而專當如敘魏晉九品官人之制而失載漢志限年之沿革宋分四郡餘郡之歲舉梁代中正之廢置後魏之中正與吏部並銓皆歷朝銓選之制悉略而不敘金元銓政載於史志甚詳亦概略之至謂明興立制入仕之途有三進士監生吏

欽定四庫全書總目卷六十四

員不知明初三途並用乃科舉薦能吏員三途其時應薦者或以賢良方正或以儒士或以秀才或以人才皆官至卿輔非盡在監之監生也

歷代宰輔彙考八卷

浙江巡撫採進本

國朝萬斯同撰斯同有聲韻源流考已著錄是編取秦漢以迄元明宰輔分職繫名以便檢核其於官制增損異同之處亦間附案語頗為簡明然不著拜罷年月視諸史表例頗為簡略又如唐代使相以其為藩鎮加官俱不載錄是也然如李克用朱全忠王智興李載義韓建等之位冠三師亦祇屬優以空銜並未嘗入輔左右而顧一概列之則義例亦未能盡歸畫一也

銓政論略一卷

江蘇巡撫採進本

國朝蔡方炳撰方炳有增訂廣輿記已著錄是書專論唐宋二代銓政頗為濛昧如謂侍郎起於隋不知梁天監三年已有侍郎之稱謂唐選官必試於吏部不知五品以上之不試至承接他姓以應調乃五代時弊政唐時鮮有宋時科目甚多專舉經明行修賢良方正二科更見挂漏唯所議明末專拘進士資格之弊立論頗確云

文武金鏡律例指南十六卷

內府藏本

國朝凌銘麟撰銘麟字天石杭州人是書成於康熙辛酉自文武儀注品級以及莅任居官事竄無不備載又發律例大旨而以相傳之家牘為之證據蓋亦為初仕者設也

南臺舊聞十六卷

浙江巡撫採進本

國朝黃叔燾撰叔燾有南征記程已著錄是書詳述御史典故凡十三門每事各註所出之書頗為詳備其曰南臺者據王士禎分甘餘話今都察院可稱南臺不可稱西臺語也

右職官類官制之屬四十二部三百五十四卷

內三無部卷數

皆附存目

牧民忠告一卷

直隸總督採進本

元張養浩撰養浩有三事忠告已著錄此卽三事之一種魏裔介摘出別行非完書也

官箴一卷 左都御史張若淮家藏本

明宣宗章皇帝御製自都督府至儒學凡三十五篇前有宣德七年六月諭旨一道稱取古人箴儆之義凡中外諸司各著一篇使揭諸廳事朝夕覽觀庶幾君臣交儆之道蓋當時嘗以頒行者嘉靖戊戌南京國子監祭酒倫以訓復刊布之後載宣宗御製廣寒殿記一首玉簪花賦一首詩二十七首詞曲二首不知何人所附叢雜不倫殊乖編錄之體

牧津四十四卷 浙江巡撫採進本

明祁承燾撰承燾字爾光山陰人萬曆甲辰進士官至江西布政司參政其書採輯歷代循吏事實分類編次首列緝概一卷分爲五目一考名二稽制三述意四論世五辨類以下凡四十四卷分經濟消弭匡定節義富機惠愛化導勤節集事政才政術真誠清德砥躬風力守正嚴肅敦厚忠信明決得情察姦矜慎平恕執持誠見宗體任人治賦救荒詰盜備治三十二類每類前各有小序徵采既廣不無煩碎叢雜之病

明職一卷 浙江巡撫採進本

明呂坤撰坤有四禮翼已著錄坤於萬曆壬辰以僉都御史巡撫山右作此編以申飭屬吏自弟子員之職至督撫之聯統十八篇於省府州縣職官利弊得失言之甚悉

仕學全書三十五卷 江西巡撫採進本

明魯論撰論有四書通議已著錄是書初名聞見錄以明代官制法令仿周禮六官分類編載各附論斷蓋亦備場屋對策之用者分上下二編上編爲六部大政下編則自京朝直省各官職守終於掖庭宗藩

政學錄五卷 直隸總督採進本

國朝鄭端撰端字司直棗強人順治己亥進士官至江南巡撫是編原本呂坤余自強兩家之書而參酌之內而

開部科道外而督撫司道守令應行事宜咸載利弊

為政第一編八卷

內府藏本

國朝孫鉉撰銜字可菴錢塘人其書所載皆州縣職事分時宜刑名錢穀支治四類條目瑣碎議論亦鄙蓋幕客之免園冊不足資以為治也

百僚金鑑十二卷

內府藏本

國朝牛天宿撰天宿字觀薇章邱人康熙中官瓊州府知府是編前為總論七卷以中外職官為次取古之稱職者略載事蹟而以歷代官制沿革弁諸條之首八卷至十卷別列廉潔度量用人刑賞恬退忠烈武功七門亦略披事實挂一漏萬十一卷則載古來箴銘訓頌之類而以己作參錯其中至十二卷則自敘其粵中政績而以去思碑終焉未免近於自炫矣

右職官類官箴之屬八部一百七卷皆附存目

欽定四庫全書總目卷八十一

史部三十七

政書類一

志藝文者有故事一類其開祖宗創法奕葉慎守是為一朝之故事後鑒前師與時損益者是為前代之故事史家著錄大抵前代事也隋志載漢武故事濫及稗官唐志載魏文貞故事橫牽家傳循名誤列義例殊乖今總核遺文惟以國政朝章六官所職者入於斯類以符周官政府之遺至儀注條格舊皆別出然均為成憲義可同歸惟我皇上制作日新垂謨冊府業已恭登新笈未可仍襲舊名考錢溥祕閣書目有政書一類謹據以標目見綜括古今之意焉

通典二百卷

內在本

唐杜佑撰佑字君卿京兆萬年人以蔭補濟南參軍事歷官至檢校司徒同中書門下平章事加太保致仕諡安簡事蹟具唐書本傳先是劉秩倣周官之法摭拾百家分門詮次作政典三十五卷佑以為未備因廣其所闕參益新禮勒為此書凡分八門曰食貨曰選舉曰職官曰禮曰樂曰兵刑曰州郡曰邊防每門又各分子目自序謂既富而教故先食貨行教化在設官任官在審才審才在精選舉故選舉職官次焉人才得而治以理乃興禮樂故次禮次樂教化隳則用刑罰故次兵次刑設州郡分領故次州郡而終之以邊防所載上溯黃虞訖於唐之天寶肅代以後間有沿革亦附載註中其中如食貨門之賦稅載周官貢賦而太宰所掌九貢之法失載載北齊租調之法河清三年令民十八受田輸租調而露田之數失載錢幣不載陳永定元年制四柱錢法權酷不載後周榷酒坊法選舉門不載齊明帝時制士人品第有九品之科小人之官復有五等法者續不載宋齊開治民之官以三年六年為小滿遂換法職官門如周禮地官有舍人土主人掌平宮中之政乃云中書舍人魏置又隋書大業時改內史監為內書監乃僅云改內史侍郎為內書侍郎又集賢殿書院載梁有文德殿藏書不知宋已有總明觀藏

欽定四庫全書總目卷八十一

書之所以此之類未免閒有挂漏兵門所列諸子目如分引退取之引退佯敗取之爲一門分出其不意擊其不備攻其不整爲三門未免稍涉繁冗而火獸火鳥之類尤近於戲劇州郡門分九州以敘沿革而信都郡冀州皆屬竟而誤屬冀又極詆水經及酈道元水經注爲僻書詭誕不經未免過當邊防門所載多數萬里外重譯乃通之國亦有僅傳其名不通朝貢者既不臨邊亦無事於防題曰邊防名實亦舛然其博取五經羣史及漢魏六朝人文集奏疏之有裨得失者每事以類相從凡歷代沿革悉爲記載詳而不煩簡而有要元本本皆爲有用之實學非徒資記問者可比考唐以前之掌故者茲編其淵海矣至其各門徵引尙書周官諸條多存舊詁如食貨門引尙書下土墳壚注謂壚疎也與孔疏所引說文黑剛土也互異又瑤琨簪傷注篠竹箭籥大竹亦傳疏所未備職官門引周官太宰之屬有司會逆羣吏之治而聽其會計註云逆謂受也受而鈎考之可知得失多少較賈公彥疏頗爲明晰似此之類尤頗有補於經訓宋鄭樵作通志與馬端臨作文獻通考悉以是書爲藍本然鄭多泛雜無歸馬或詳略失當均不及是書之精核也

唐會要一百卷

唐江表撰 宋家藏本

宋王溥撰溥字齊物并州祁人漢乾祐中登進士第一周廣順初拜端明殿學士恭帝嗣位官右僕射入宋仍故官進司空同平章事監修國史加太子太師封祁國公卒諡康定事蹟具宋史本傳初唐蘇冕嘗次高祖至德宗九朝之事爲會要四十卷宣宗大中七年又詔楊紹復等次德宗以來事爲續會要四十卷以崔鉉監修段公路北戶錄所稱會要卽冕等之書也惟宣宗以後記載尙闕溥因復沐宣宗至唐末事續之爲新編唐會要一百卷建隆二年正月奏詔藏史館書凡分目五百十有四於唐代沿革損益之制極其詳核官號內有職官忠諫舉賢委任崇獎諸條亦頗載事蹟其細瑣典故不能概以定目者則別爲雜錄附於各條之後又開載蘇冕駁議義例該備有裨考證今僅傳鈔本脫誤頗多八卷題曰郊儀而所載乃南唐事九卷題曰雜郊儀而所載乃唐初奏疏皆與目錄不相應七卷十卷亦多錯入他文蓋原書殘闕而後人妄摭竄入以盈卷帙又一別本所闕四卷亦同而有

補亡四卷採摭諸書所載唐事依原目編類雖未必合博之舊本而宏綱細目約略粗具猶可以見其大凡今據以錄入仍各註補字於標目之下以示區別焉

五代會要三十卷

兩江總督採進本

宋王溥撰五代干戈倣攘百度陵夷故府遺規多未暇修舉然五十年間法制典章尙略具於累朝實錄溥因檢尋舊史條分件繫類輯成編於建隆二年與唐會要並進詔藏史館後歐陽修作五代史僅列司天職方二者其他均未之及如晉段颺劉昫等之議廟制周王朴之議樂皆事關鉅典亦略而不詳又如經籍鏤版昉自長興千古官書肇端於是崇文善政豈宜削而不書乃一概刊除尤爲漏略賴溥是編得以收放失之舊聞厥功甚偉至於租稅類中載周世宗讀長慶集見元微之所上均田表因令製素成圖頒賜諸道而歐史乃云世宗見元微之均田圖是直以圖爲元微之作乖舛尤甚微薄是編亦無由訂歐史之謬也蓋歐史務談褒貶爲春秋之遺法是編務核典章爲周官之舊例各明一義相輔而行讀五代史者又何可無此一書哉

宋朝事實二十卷

永樂大典

宋李攸撰文獻通考作李攸按攸字好德義從洪範若作攸字與好德之義不符宋史藝文志亦作李攸通考傳寫誤也陳振孫書錄解題稱其官爲承議郎而不詳其里貫江陽譚稱政和初編輯西山圖經九域志等書廬帥孫義叟招原注下有關文書上轉三官張浚入朝約與俱以家事辭考西山屬成都府瀘州屬潼川路則攸當爲蜀人其曰張浚入朝蓋紹興四年浚自川陝宣撫使召還時也其書據江陽譚蓋上起建隆下迄宣和凡六十卷其三十卷先聞於時後以餘三十卷上之因語觸秦檜寢其書不報故晁陳二家書目俱作三十卷與譚相合而趙希弁讀書附志宋史藝文志乃俱作三十五卷今書中有高孝兩朝登極赦詔及紹興間南郊赦詔而紀元亦迄於紹興殆又有所附益兼及南宋之初歟攸熟於掌故經靖康兵燹之後圖籍散佚獨汲汲搜輯舊聞使一代典章粲然具備其用力頗爲勤摯所載歷朝登極南郊大赦詔令太宗親製趙普碑銘西京崇福宮記景靈西宮記大晟

樂記往往為宋文鑑名臣碑傳琬瑰集播芳大全諸書所闕漏他如宗室換官之制不見於宋史職官志郊祀勅
箭之儀不詳於禮志太廟崇甯廟圖紫宸殿集英殿上壽賜宴再坐立班起居諸圖宮架鼓吹十二案圖尤為記
宋代掌故者所未備至其事蹟之異同年月之先後記載之詳略尤多可與東都事略續通鑑長編及宋史互相
參訂又如石晉賂契丹十六州分代北山前山後足訂薛歐五代史稱山後十六州之誤周世宗兵下三關並載
淤口關亦足補薛歐一史祇載瓦橋益津二關之闕當時如江少虞事實類苑錦繡萬花谷多引用之宋史亦多
採用其文第原本久佚惟散見於永樂大典各韻下者尚存梗概而割裂瑣碎莫由考見其體例惟趙希弁讀書
附志稱祖宗世次登極紀元詔書聖學御製郊廟道釋五牒公主官職爵邑勳臣配享宰執拜罷科目儀注兵刑
律歷籍田財用削平僭偽陞降州縣經略幽燕之類具載本末云云蓋即當日之門目今據以分類編次釐為二
十卷雖未悉復原書之舊而綱舉目從咸歸條貫亦得其十之七八矣攸別有通今集二十卷宋史藝文志八故
事類今佚不傳又嘗上書秦檜戒以居寵思危尤為侃侃不阿則其人亦足重不獨以博洽見長云

建炎以來朝野雜記四十卷

兩淮鹽政
採進本

宋李心傳撰心傳有建炎以來繫年要錄已著錄心傳長於史學凡朝章國典多所語悉是書取南渡以後事蹟
分門編類甲集二十卷分上德郊廟典禮制作朝事時事故事雜事官制取士財賦兵馬邊防十三門乙集二十卷
少郊廟一門而未卷別出邊事亦十三門每門各分子目雖以雜記為名其體例實同會要蓋與建炎以來繫年要
錄互相經緯者也甲集成於嘉泰二年乙集成於嘉定九年書前各自有序周密海東野語皆論所載趙師舜犬吠
乃鄉斗所造以報捷武學生之憤許及之屈膝費士寅狗賣亦皆不得志報私讐者揆造醜詆所謂韓侂胄僭逆之
類悉無其實云云蓋撥拾羣言失真者固亦不免然於高孝光甯四朝禮樂刑政之大以及職官科舉兵農食貨無
不該且首尾完贖多有馬端臨文獻通考章俊卿山堂考索及宋史諸志所未載故通考稱為南渡以來野史之最
詳者王士禎居易錄亦稱其大綱細目粲然悉備為史家之巨擘言宋事者當必於是有所徵焉其書在宋有成都辛

氏刊本竝冠以國史本傳暨宣取整年要錄指揮數通今惟寫本僅存案張端義買耳三集序稱心傳告以朝野雜記丁戊二集將成則是書尙不止於甲乙二集而書錄解題及宋史本傳均未之及殆以晚年所輯書雖成而未出故世不得見歟

西漢會要七十卷

浙江汪啟淑家藏本

宋徐天麟撰天麟字仲祥臨江人開禧元年進士調撫州教授歷武學博士通判惠潭二州權知英德府事蹟附見宋史徐夢莘傳稱天麟爲通直郎得之之子夢莘之從子晁公武讀書志則稱爲夢莘之子考樓鑰攻媿集有西漢會要序曰徐思叔爲左氏國紀其兄祕閣商老爲北盟錄已而思叔之子孟堅著漢官考次子仲祥又作漢會要商老夢莘之字思叔得之之字也然則史不誤而晁氏誤矣其書仿唐會要之體取漢書所載制度典章見於紀志表傳者以類相從分門編載其無可隸者亦依蘇冕舊例以雜錄附之凡分十有五門其三百六十七事嘉定四年具表進之於朝有旨付尙書省藏之祕閣班固書最稱博瞻於一代禮樂刑政悉綜括其大端而理密文繁驟難得其體要天麟爲之區分別白經緯本末一一犁然其詮次極爲精審惟所採祇據本史故於漢制之見於他書者概不採掇未免失之於隘又如輿服門中於司馬相如揚雄諸賦鋪張揚厲之語一概摘入殊非事實亦爲有乖義例然其實串詳洽實未有能過之者昔人稱顏師古爲漢書功臣若天麟者固亦無媿斯日矣

東漢會要四十卷

浙江范懋柱家天一閣藏本

宋徐天麟撰天麟官撫州教授時既奏進西漢會要後官武學博士時續成此書於寶慶二年復奏進之其體例皆與前書相合所列亦十五門分三百八十四事惟西漢會要不加論斷而此書則間附以案語及雜引他人論說蓋亦用蘇冕駁議之例也東漢自光武中興明章嗣軌皆汲汲以修舉廢墜爲事典章文物視西京爲盛而當時載筆之士如東觀紀及華嶠司馬彪袁宏之類遺編斷簡亦閒有留傳他若漢官儀漢雜事漢舊儀諸書爲傳注所徵引者亦頗衆然可考故東漢一代故事較西漢差爲詳備天麟據范書爲本而方貫諸家悉加哀次其分門區目排比整齊實深

有裨於考證中間如獻帝子濟陰王熙山陽王懿濟北王邈東海王敦雖為曹氏所置旋即降為列侯然既以封建立國自當著之帝系皇子條下以表其實乃因范書無傳遂削而不書未免闕漏又天麟自序中稱劉昭因范氏遺緒註補八志而不知其為司馬彪續漢書志實非范書晁公武已議之則亦偶然失檢然其大體詳密即稍有踳駁固不足以為累也其書世所傳者皆據宋本傳鈔第三十七三十八兩卷全關三十六三十九兩卷亦各佚其半無可考補今亦竝仍之焉

漢制考四卷

兩江總督 陳進本

宋王應麟撰應麟有周易鄭康成註已著錄是編因漢書續漢書諸志於當日制度多詳於大端略於細目因摭采諸家經註及說文諸書所載鉤稽排纂以補其遺頗足以資考證又以唐時賈孔誥疏去古已遠方言土俗時異名殊所謂某物如今某物某事如今某事者往往循文箋釋於舊文不必悉符亦一一詳為訂辨如周禮疏不知步搖假紒及五夜儀禮疏不知偃頤之類不一而足應麟皆為旁引證明又周禮太史職註云太史抱式疏曰占文謂之式應麟則別引藝文志漢門法式以解之考式者候時之儀器史記曰者列傳旋式正棊漢書王莽傳天文郎案式於前日時加某皆指此器所引亦較舊義為長其中偶失考定者如鄉士鄭註云三公出城郡督郵盜賊道蓋漢時郡掾分部屬縣為督郵其分治各曹亦名督郵故朱博傳云為督郵書掾此督郵盜賊蓋掾主捕盜賊者其不加掾字猶巴郡太守張納碑陰書督盜賊掾李街也此職又主為三公導行故云督郵盜賊道道導字古通用也賈公彥疏乃謂使舊為盜賊之人督察郵行往來於義為誤應麟沿用其說未免千慮之一失要其大致精核具有依據較南宋末年諸人侈空談而鮮實徵者其分量相去遠矣

文獻通考三百四十八卷

內府 藏本

元馬端臨撰端臨字貴與江西樂平人宋宰相廷鸞之子也咸淳中漕試第一會廷鸞忤賈似道去國端臨因再侍養不與計偕元初起為柯山書院山長後終於台州儒學教授是書凡田賦考七卷錢幣考二卷戶口考二卷職役

考二卷征權考六卷市糴考二卷土貢考一卷國用考五卷選舉考十二卷學校考七卷職官考二十一卷郊祀考
二十三卷宗廟考十五卷王禮考二十一卷樂考二十二卷兵考十三卷刑考十二卷經籍考七十六卷帝系考十
卷封建考十八卷象緯考十七卷物異考二十卷輿地考九卷四裔考二十五卷其書以杜佑通典爲藍本田賦等
十九門皆因通典而離析之經籍帝系封建象緯物異五門則廣通典所未及也自序謂引古經史謂之文參以唐
宋以來諸臣之奏疏諸儒之議論謂之獻故名曰文獻通考中如田賦考載唐租庸調之制而據唐會要則自開元
十六年以後其法屢改載五代田賦之制而據五代會要尙有天成四年戶部奏定三京諸府夏秋稅法一事乃一
概略之楊炎定兩稅法奏疏最關沿革亦佚不載職役考載口算之制而漢書永建四年除三輔三年逋租過更口
算芻橐詔書不載征權考詳載鹽鐵而五代會要後唐長興四年諸道鹽鐵轉運使奏定鹽鐵條例不載又雜稅載
粟菜之稅而漢書永元六年流民販賣勿出租稅詔不載國用門載漕運興廢而後漢書建武七年罷護漕都尉建
初三年罷常山諸處河漕不載其載唐代東都及鄭州諸處漕運措置亦不及唐會要之詳歷代賑恤於漢既載本
始四年之詔而略三年郡國傷旱甚者民毋出租賦之詔選舉考詳載兩漢之選舉而漢書元封四年詔舉茂才異
等始元元年遣廷尉持節行郡國舉賢良永光元年詔舉樸實敦厚遜讓有行者光祿歲以此科第郎從官俱不載
學校考辨先聖先師之分而唐會要貞觀二十一年詔以孔子爲先聖顏回等爲先師之制不載至職官考則全錄
杜佑通典五代建置尤敘述寥寥核以王溥五代會要孫逢吉職官分紀僅得其十之一二郊社考多引經典而尙
書之肆類于上帝不載逸周書白虎通三輔黃圖所載周明堂之制最詳亦不及徵引又載歷代明堂之制而梁武
帝改作明堂詳於隋書禮儀志者不載地祇之祭祇引周官及禮記郊特性而禮運祭地瘞綯及考工記玉人兩圭
五寸祀地之文不載漢祀后土之制祇載漢舊儀祭地河東而漢官儀北郊壇在城西北諸制不載又雩祭引左傳
周禮註疏而禮記祭法雩宗祭水旱也爾雅舞雩雩也皆不載祭日月祇引禮記祠禮而大戴禮天子春朝朝日秋
暮夕月及尙書大傳古者帝王以正月朔迎日于東郊皆不載於漢制既載宣帝時成山祠日萊山祠月而建始時

罷此祠復立於長安城事又不載社稷門引各經註疏所論社制而周書作雒篇建社之制及蔡邕獨斷所載天子大社之制皆不載祀山川亦引經傳而儀禮觀禮祭山丘陵升祭川沈爾雅祭山曰股縣祭川曰浮沈皆不載又分代詳載而獨略北齊天保元年分遣使人致祭於五嶽四瀆宗廟考載後魏七廟之制祇引禮志改七廟之詔不知興建沿革詳於孫惠蔚本傳又唐初建七廟新唐書禮樂志多略而不參用舊唐書禮儀志王禮考載周之朝儀而不引周書王會解又詳載歷代朝儀而不載史記秦本紀始皇三十五年營作朝宮載漢代朝儀而不載續漢書禮儀志所載常朝之制又輿服之載於史志者必詳敘卿士大夫如漢制二千石車朱兩轎之類所以明差等也而一概從略樂考載五代廟樂不如五代會要之詳兵考載晉兵制至悼公四年而止其後治兵邾南甲車四千乘不載載魯兵制自昭公蒐紅始而成公元年作三甲襄公十一年作三軍昭公五年會中軍俱不載經籍考卷帙繁帙然但據晁陳二家之目參以諸家著錄遺漏宏多輿地考亦本歐陽忞輿地廣記罕所訂補大抵門類既多卷帙繁帙然未免取彼失此然其條分縷析使稽古者可以案類而考又其所載宋制最詳多宋史各志所未備案語亦多能貫穿古今折衷至當雖稍遜通典之簡賅而詳贍實為過之非鄭樵通志所及也

明會典一百八十卷

江蘇巡撫採進本

明宏治十年奉敕撰十五年書成正德四年重校刊行故卷端有孝宗武宗兩序其總裁官為大學士李東陽雋芳楊廷和副總裁官為吏部尚書梁儲纂修官為翰林院學士毛紀侍講學士傅珪侍讀毛澄朱希周編修潘辰並列銜卷首然皆武宗時重校諸臣其原修之大學士徐溥等竟不列名未詳當日何意也其體例以六部為綱吏禮兵工四部諸司各有事例者則以司分戶刑二部諸司但分省而治共一事例者則以科分故一百八十卷中宗人府自為一卷弁首外餘第二卷至一百六十三卷皆六部之掌故一百六十四卷至一百七十八卷為諸文職末二卷為諸武職特附見其職守沿革而已南京諸曹則分附北京諸曹末不別立條目惟體例與北京異者乃列出焉其官制前後不同者如太常司改為太常寺之類則書其舊名而註曰後改為某官其別開公署者如鴻臚寺本為儀

禮司之類則書其新名而註曰本爲某官其戶口貢賦之盈縮制度科條之改易亦相連併載以見變通輝燿之由大抵以洪武二十六年諸司職掌爲主而參以祖訓大誥大明令大明集禮洪武禮制禮儀定式稽古定制孝慈錄教民榜文大明律軍法定律憲綱十二書於一代典章最爲賅備凡史志之所未詳此皆具有始末足以備後來之考證其後嘉靖八年復命閣臣續修會典五十三卷萬歷四年又續修會典一百二十八卷今皆未見其本莫知存佚殆以嘉靖時祀典太濫萬歷時稅政孔多不足爲訓故世不甚傳歟

七國考十四卷

兩淮馬駱家藏本

明董說撰說有易發已著錄是編載秦齊楚趙韓魏燕七國制度分職官食貨都邑宮室國名羣禮音樂器服雜記喪制兵制刑法災異璣徵十四門皆採掇諸書以相佐證略如會要之體大致以戰國策史記爲本而以諸子雜史補其遺闕其所援引如劉向列仙傳張華感應類從志子華子符子王嘉拾遺記之類或文士之寓言或小說之雜記皆據爲典要而月令所載太尉大會之屬註者明日秦官乃反遺漏未免去取不倫又既以七國爲名自應始自分晉以後而秦之寺人上引車鄰楚之兩廣遠徵左傳則於斷限有乖新序載魏王欲爲中天之臺許瑄諫止未必實有其事卽有之亦議而未行而魏宮室門中乃出一中天臺莊子載無盛鶴列於麗譙蓋城闕之通名非魏所獨有乃於魏宮室中標一目曰麗譙琴操載韓殺藉政之父乃古來之常制非韓所始乃於韓刑法中標一目曰殺亦嫌於苟盈卷帙至於秦水心劔事本見續齊諧記乃云白帖秦舍督侯於靈臺本見左傳乃云列女傳亦往往不得其出典觀其前後無序跋而齊職官門註封君后妃附乃祇有封君而無后妃殆說未成之業偶爲後人傳錄歟然春秋以前之制度有經傳可稽秦漢以下之故事有史志可考惟七雄雲擾策士縱橫中間一二百年典章制作實蕩然不可復徵說能參考諸書排比鉤貫尙一一各得其崖略俾考古者有徵焉雖閒傷蕪漫固不妨過而存之矣

欽定大清會典一百卷

乾隆二十九年奉 敕撰伏考 國朝會典初修於康熙三十三年續修於雍正五年至是凡三經釐定典章彌備

條目彌詳考昔成周之制百度分治以六官六官統彙於周禮聖人經世之樞要於是乎在雖越數千載時勢異立政令不能不增法制不能不改職守亦不能不分難復拘限以六官而其以官統事以事隸官則實萬古之大經其能易也故歷代所傳如唐六典元典章明會典遞有損益而宏綱鉅目不甚相遠然其書之善否則不盡繫編纂之工拙而繫乎政令之得失蓋一朝之會典即記一朝之故事故事之所有不能刪而不書故事之所無亦不能飾而虛載故事有善有不善亦不能有所點竄變易如唐六典先須祥瑞之名目分為三等以待天下之奏報殆於上下相罔然當時有此制秉筆者不能不載也又如至正條格中偏駁不公之合經 御題指擢者人人咸喻其非然亦當時有此制秉筆者不能不載也國多批政安怪書多駁文乎至於周禮一經朱子稱其盛水不漏亦其時體國經野事事為萬世開太平故其書亦傳之萬世曾為法守非周公有所塗飾於其間也我 國家 列聖相承 文謨武烈垂裕無疆 規畫既皆盡善我 皇上執兩用中隨時損益又張弛皆衷於道增刪悉合其宜則是書之體裁精密條理分明足以方駕周禮者實 聖主鴻猷上軼豐鎬也夫豈歷代規條所能望見涯涘乎

欽定大清會典則例一百八十卷

乾隆二十九年奉 敕撰與 大清會典同時告成會典原本以則例散附各條下 蓋治歷代之舊體至是乃各為編錄使一具政令之大綱一備沿革之細目互相經緯條理益明考 周禮為一代之典制而六官所職其文頗略其見於諸書者如都城之廣狹左傳稱先王之制大都 不過參國之一中五之一小九之一逸周書作雒 解稱大縣城方王城三之一小縣城方王城九之一其文相合當為周之舊典而周禮無之又太子生之禮左傳稱接以太牢卜士負之士妻食之禮 記內則所載文雖稍詳其事竝同當亦為周之舊 典而周禮亦無之知周禮舉其要而度數節次之詳則故府別有其記載與六典相輔又左傳載王 以鞶伯宴而私賄之使相告之曰非禮也勿籍知當日王室之禮或改於舊必籍而記之以為故事其書雖不傳其文則宛見側出散在古籍者尚灼然可考也然則會典之外別為則例正三代之古義矣其開隨時損益之迹悉出 聖人之化裁蓋帝王初制顯庸有百世

不變之大經詩所謂不愆不忘率由舊章是也有因時制宜之大用記所謂一張一弛文武之道是也即政典之因革以仰窺 皇心之運量精一執中具昭於是豈徒備掌故而已哉

欽定續文獻通考二百五十二卷

乾隆十二年奉 敕撰馬端臨文獻通考斷自宋甯宗嘉定以前採摭宏富體例詳賅元以來無能繼作明王圻始摭拾補綴爲續文獻通考二百五十四卷體例糅雜頗舛叢生遂使數典之書變爲免圍之策論者病焉然終明之世亦無能改修豈非以包括歷朝委曲繁重難於蒐羅而條貫之哉我 皇上化洽觀文道隆稽古 特命博徵舊籍綜述斯編黜上海之野文補鄱陽之巨帙採宋遼金元明五朝事蹟議論彙爲是書初議 於馬氏原目之外增朔閏河渠氏族六書四門嗣奉 敕修續通志以天文略可該朔閏地理略原首河渠氏族六書更鄭樵之舊部既一時並撰即無容兩復陳故二十四門仍從馬氏之原目其中如錢幣考之載鈔銀象緯考之詳推步於所必增者乃增物異考之不言徵應經籍考之不錄佚亡於所當減者乃減亦不似王氏之橫生枝節多出贅疣大抵事蹟先徵正史而參以說部雜編議論博取文集而佐以史評語錄其王圻舊本閒有一長可取者沙中金屑亦不廢搜求然所存者十分不及其一矣至於考證異同辨訂疑似王本固爲疎陋即馬本亦略而未詳茲皆本本元元各附案語一折衷於 聖裁典核精密纖悉不遺尤一書所不逮焉蓋王圻著述務以炫博故所續通考及稗史彙編三才圖會之類動盈二三百卷而無所取材此書則每成一類即先呈 御覽隨事 指示務使既博且精故非惟可廢王氏之書即馬氏之書歷來推爲絕作亦陶鑄之而有餘也

欽定皇朝文獻通考二百六十六卷

乾隆十二年奉 敕撰初與五朝續文獻通考共爲一編乾隆二十六年以前朝舊事例用平書而述 昭代之典章錄 列朝之 詔諭 尊稱 鴻號於禮當出格跳行體例迥殊難於畫一遂 命自 開國以後別自爲書後續通典續通志皆古今分映即用此書之例也其二十四門初亦仍馬氏之目嗣以 宗廟考中用馬氏舊例附錄羣廟因

而載入 敕建請祠仰蒙 睿鑒周詳 繪音訓示申明禮制釐定典章載筆諸臣始共知尊卑有分名實難淆恍

然於踵謬沿譌之失乃恪遵 聖諭別立羣廟一門增原目爲二十五其中子目田賦增八旗田制錢幣增銀色銀

直及回部普兒戶口增八旗壯丁土貢增外藩學校增八旗官學 宗廟增崇奉 聖容之禮封建增蒙古王公皆

以今制所有而加市糴刪均輸和買和糴選舉刪童子科兵考刪車戰皆以今制所無而省至家緣增推步物異剛

洪範五行 國用分爲九目尊號冊封之典自帝系移入王禮 則斟酌而小變其例者也考馬氏所敘宋事雖以世

家遺蔭多識舊聞然計其編厚實在入元以後 故典章放失疎略不詳理宗以下三朝以國史北移更闕無一字

案理宗以後國史元兵載以北歸事見宋季三朝政要序今則 聖 聖相承功成文煥 實錄 記注具錄於史官公曠奏章全掌於籍氏每

事皆尋源竟委賅括無遺故卷帙繁富與馬氏原本相埒夫尙書兼陳四代而周書爲多禮記亦兼述三王而周禮

尤備蓋監殷監夏百度修明文獻足徵蒐羅自廣有不必求博而自博者矣

欽定續通典一百四十四卷

乾隆三十二年奉 敕撰杜佑通典終於天寶之末是書所續自唐肅宗至德元年訖明崇禎末年凡選舉六卷職

官二十二卷禮四十一卷樂七卷兵十二卷刑十六卷州郡十八卷邊防四卷食貨十八卷篇目一仍杜氏之舊惟

杜氏以兵制附刑後今則兵刑各爲一篇稍有不同考古者虞廷九官有土而無司馬凡蠻夷寇賊一隸於士魯語

臧文仲稱大刑用甲兵其次用斧鉞中刑用刀鋸其次用鑽筆薄刑用鞭朴則 兵刑可以爲一又左傳紀少昊以祝

鳩爲司馬爽鳩爲司寇而秋官夏官周禮亦分兩職則兵刑亦可爲二以事蹟多寡卷帙繁簡酌爲門目之分合其

宏旨仍不異也至於編纂之例唐代年祀稍遠舊典多亡五代及遼文獻靡徵史書大略則有搜 圖籍以求詳明代

見聞最近雜記實繁宋金及元著作本多遺編亦夥則嚴核異同以傳信總期於 既精既博不濫不遺宋史藝文

志有宋白續通典二百卷今其書已亡陳振孫書錄解題載其咸平三年奉詔四年九月書成起唐至德初迄周顯

德末又載王欽若言杜佑通典上下數千載爲二百卷而其中四十卷爲開元禮今之所載二百餘年亦如前書卷

數時論非其重複茲編仰稟 聖裁酌乎繁簡之中而九百七十八年內典制之源流政治之得失條分件繫編舉
目張誠所謂記事提要纂言鈞元較諸杜氏原書實有過之無不及未白所續更區區不足道矣

欽定皇朝通典一百卷

乾隆三十二年奉 敕撰以八門隸事一如杜佑之舊其中條例則或革或因如錢幣附於食貨屬政附於軍禮兵
制附於刑法於理相近於義有取者今亦無所更易至於古今異制不可強同如食貨典之推酌算繕禮典之封禪
前朝弊法久已爲 聖代所除卽一例從刪不復更存虛目又地理典以統包歷代分併靡常疆界參差名稱舛互
故推原本始以九州提其大綱今既專述 本朝自宜敬遵 今制況乎 威弧震疊式廓取東屆出日之邦西
括無雷之國山河兩戒並隸職方近復戡定再馳開屯列庠 皇輿廣闊更非九州舊界所能包故均以 大清一
統志爲斷不更以禹貢州域素 昭代之黃圖至杜氏述唐朝掌故與歷代共爲一書故皆分綴篇終其文節略亦
體裁所限不得不然今則專勒一編式昭 國典當法制修明之世 鴻猷善政史不勝書故卷目加繁益於舊爰
且杜氏所採者惟開元禮爲詳今則 謨烈昭垂各成完帙禮有 大清通禮 皇朝禮器圖式樂有 聖祖御製
律呂正義 皇上御製律呂正義後編刑有 大清律例兵有中樞政考地理有 皇輿表 大清一統志 欽定
日下舊聞考 盛京通志熱河志滿洲源流考 皇輿西域圖志又有 大清會典及則例總其綱領八旗及六部
則例具其條目故縷分條繫端委詳明用以昭示萬年誠足媲美平官禮又豈杜氏之擬拾殘文裒合成帙所可同
日語哉

欽定皇朝通志二百卷

乾隆三十二年奉 敕撰二十略之目亦與鄭樵原本同而紀傳年譜則省而不作蓋 實錄 國史尊藏金匱與
考求前代刪述舊文義例固不侔也至於二十略中有原本繁而今汰者三都邑略中 樵兼載四裔所居非但約略
傳聞地多無據且外邦與帝京並列義亦未安今惟恭錄 興京 盛京 京師城闕之制以統於尊諡略中樵分

三等二百十品多所臆定今惟恭錄 賜諡以昭其慎金石略中樵所採頗雜今惟恭錄 列聖寶墨 皇上奎章

兼及 御定西清古鑑三希堂帖淳化軒帖蘭亭八柱帖諸刻餘悉不登以條其蘊有原本疎而今補者二天文略

中樵惟載步天歌今則故遺 聖祖仁皇帝御製儀象考成靈臺儀象志 皇上御製儀象考成後編會通中西之

法以究象緯之運行地理略中樵以四瀆統諸水而州縣郡道以水爲別今則於其不入四瀆者大河以北如 盛

京 京畿諸水大江以南如浙閩粵諸水以及滇南漠北諸水自入南北海者並一一補載而河有重源今底定

西域而始知者亦恭錄 聖製以昭示來茲有原本冗瑣而今刪併者三藝文略中樵所列既多舛譌校讎略中樵

所舉亦未精確圖譜略中樵分記有記無二類而記無多至二十六門既多虛設如擊桐試馬鬪羊對雉諸圖尤猥雜無

取今並以 欽定四庫全書總目爲斷以折其中原有本之所未聞者三六書略中以 國書十二字頭括形聲之

變化併以 欽定西域同文志臚列蒙古西番托忒回部諸字絲牽珠貫音義畢該非樵之穿鑿偏旁所知也七音

略中以 國書合聲之法爲翻切之總綱而兩合三合之中有上下連書有左右並書有重聲大書輕聲細書以

欽定同文韻統爲華梵之通津以天竺五十字母配合成一千二百十二音又以西番三十字母別配合成四百三

十四音而各釋以漢音漢音不具則取以合聲非樵株守等韻所知也昆蟲草木略中樵分八類五朝續通志已爲

補漏訂譌至於中國所無而產於遐方前代所無而出於今日如金蓮花夜亮木之類見於 欽定廣雅芳譜書盤

櫻額堪達罕素達罕之類見於 聖祖仁皇帝幾暇格物編北天竺烏沙爾器火雞箸漠解知時草之類見於 御

製詩集如奇石密食鸞鷲爾之類見於 欽定西域圖志尤非樵之抱殘守匱所知矣蓋初始之作考校易疎論定

之餘體裁益密生於衰微之世耳目難周生於明備之朝則編輯易富樵當宋之南渡局於見聞又草創成書無

所質證故踳駁至於如斯以視邇遇 昌期仰蒙 聖訓得以蒐羅宏富辨證精詳以成一代巨觀者其瞠乎莫逮

亦良有由矣

謹案鄭樵通志八別史 欽定續通志亦八別史均以兼有紀傳故也至 皇朝通志惟有二十略則名爲

通志實與通典通考爲類故恭錄於政書之中

元朝典故編年考十卷

內府藏本

國朝孫承澤撰承澤有尙書集解已著錄原本不著名氏今知爲承澤作者大興志載承澤所著有元朝典故編年考與此本合也其書取元代朝廷事實分代編輯正史以外更採元人文集以附益之共爲八卷元史尤複編略殊之體裁此雖不能詳悉釐正而削繁增簡具有首尾差易省覽其第九卷爲元朝祕史第十卷附遼金遺事小序謂元有祕史十卷續祕史二卷前卷載沙漠始起之事續卷載下燕京滅金之事蓋其國人所編記書藏禁中不傳偶從故家見之錄續卷末以補史所不載云云考其所引茲載永樂大典元字韻中互相檢勘一一相同疑本元時祕冊明初修書者或嘗錄副以出流傳在外故承澤得而見之耳所記大都瑣屑細事且間涉荒誕蓋亦傳聞之辭輾轉失真未足盡以爲據然究屬元代舊文世所罕覩自永樂大典以外惟見於此書與正史頗有異同存之亦足以資參訂也

右政書類通制之屬十九部二千二百九十八卷皆文淵閣著錄

案纂述掌故門目多端其間以一代之書而兼六職之全者不可分屬今總而匯之謂之通制

欽定四庫全書總目卷八十一

欽定四庫全書總目卷八十二

史部三十八

政書類二

漢官舊儀一卷補遺一卷永樂大典本

案永樂大典載漢官舊儀一卷不著撰人名氏考梁劉昭注續漢書百官志引用漢官儀則曰應劭引用漢舊儀則不著其名隋書經籍志唐書藝文志作四卷宋史藝文志作三卷書錄解題始作漢官舊儀注曰衛宏撰或云胡廣宏本傳作漢舊儀四篇以載西京雜事不名漢官今惟此三卷而又有漢官之目未知果當時本書否今案永樂大典此卷雖以漢官標題而篇目自皇帝起居皇后親蠶以及璽綬之等爵級之差靡不條條件舉與宏傳所云西京雜事相合又前後漢書注中凡引用漢舊儀者竝與此卷所載相同則其為衛氏本書更無疑義或後人以其多載官制增題官字歟原本轉相傳寫節目淆亂字句舛譌殆不可讀茲據班固正史綜要參訂以獻其疑其原有注者略仿劉昭注百官志之例通為大書稱本注以別之又考前後漢書紀志注中別有徵引舊儀數條竝屬郊天禘祭耕藉飲酎諸大典此卷俱未採入蓋流傳既久脫佚者多謹復蒐擇甄錄別為一篇附諸卷尾以補本書之未備云

大唐開元禮一百五十卷兩淮鹽政採進本

唐太子太師同中書門下三品兼中書令蕭嵩等奉救撰杜佑通典及新舊唐書禮志稱唐初禮司無定制遇有大事輒制一儀臨時專定開元中通事舍人王巖上疏請刪削禮記舊文益以今事集賢學士張說奏禮記不刊之書難以改易請取貞觀顯慶禮書折衷異同以為唐禮乃詔右散騎常侍徐堅左拾遺李銳太常博士施敬本撰述歷年未就至蕭嵩為學士復奏起居舍人王仲邱等撰次成書由是唐之五禮始備即此書也其書卷一至卷三為序例卷四至七十八為吉禮卷七十九至八十為賓禮卷八十一至九十為軍禮卷九十一至一百三十為嘉禮卷一百三十一至一百五十為凶禮凶禮古居第二而退居第五者用貞觀顯慶舊制也貞元中詔以其書設科取士習

者先授太常官以備講討則唐時已列之學官矣新舊唐書禮志皆取材是書而所存僅十之三四杜佑撰通典別載開元禮纂類三十五卷比唐志差詳而節目亦多未備其討論古今斟酌損益首末完具粲然勒一代典制者終不及原書之賅洽故周必大序稱朝廷有大疑稽是書而可定國家有盛舉即是書而可行誠考禮者之圭臬也新唐書藝文志載修開元禮者尚有張烜陸善經洪孝昌諸人名而通典纂類中所載五嶽四瀆名號及衣服一門間有與此書相出入者蓋傳寫異文不能盡一既未詳其孰是今亦立仍原本錄之不復竄改庶幾不失闕疑之義焉

諡法四卷

內府藏本

宋蘇洵撰洵字明允眉山人官祕書省校書郎以霸州文安縣主簿修太常因革禮書成而卒事蹟具宋史本傳自周公諡法以後歷代言諡者有劉熙來與沈約賀琛王彥威蘇冕鳳家之書然皆雜綴附益不為典要至洵奉詔編定六家諡法乃取春秋廣諡及諸家之本刪訂考證以成是書凡所取一百六十八諡三百十一條新改者二十三條新補者十七條別有七去八類於舊文所有者刊削甚多其間如堯舜禹湯桀紂乃古帝王之名豈非諡號而沿襲前議概行載入亦不免疎失然較之諸家義例要為嚴整後鄭樵通志諡略大都因此書而增補之且稱其斷然有所去取善惡有一定之論實前人所不及蓋其斟酌損益審定字義皆確有根據故為禮家所宗雖其中間收侮字今或不能盡見諸施行而歷代相傳之舊典猶可以備參考焉官鑿作洵墓志載此書作三卷而此本實四卷殆後人所分析歟

政和五禮新儀二百二十卷

兩淮馬裕家藏本

宋議禮局官知樞密院鄭居中中等奉敕撰徽宗御製序文題政和初元三月一日蓋政和改元之年錢曾讀書敏求記誤以新元為心元遂以為不知何解謬也前列局官隨時酌議科條及逐事御筆指揮次列御製冠禮蓋當時頒此十卷為格式故以冠諸篇次為目錄六卷次為序例二十四卷禮之綱也次為吉禮一百一十一卷次為賓禮二十一卷次為軍禮八卷次為嘉禮四十二卷升婚儀於冠儀前徽宗所定也次為凶禮十四卷惟官民之制特詳焉

是書頗爲朱子所不取自中興禮書既出遂格不行故流傳絕少今本第七十四卷第八十八卷至九十卷第一百八卷至一百十二卷第一百二十八卷至一百三十七卷第二百零卷皆有錄無書第七十五卷九十一卷九十二卷亦佚其半然北宋一代典章如開寶禮太常因革禮禮閣新儀今俱不傳中興禮書散見永樂大典中亦無完本惟是書僅存亦論掌故者所宜參考矣

紹熙州縣釋奠儀圖一卷

兩淮監政採進本

宋朱子撰考朱子年譜紹興二十五年乙亥官同安主簿以縣學釋奠舊例止以人吏行事求政和五禮新儀于縣無之乃取周禮儀禮唐開元禮紹興合更相參考畫成禮儀器用衣服等圖訓釋辨明纖微必備此釋奠禮之初槩也淳熙六年己亥差知南康軍奏請頒降禮書又請增修禮書事未施行紹熙元年庚戌改知漳州復列上釋奠禮儀數事且移書禮官乃得頗爲討究時淳熙所鑄之版已不復存後乃得于老吏之家又以議論不一越再歲始能定議而主其事者適徙他官遂格不下此釋奠禮之再修也紹熙五年甲寅除知潭州會前太常博士詹元善還爲太常少卿始復取往年所被敕命下之本郡史文繁後幾不可讀且曰屬有大典禮未遑徧下諸州時朱子方召還奏事又適病目乃力疾鉤校刪削猥雜定爲四條以附州案俾杉學官是爲最後之定槩即此本也書首載淳熙六年禮部指揮一通尙書省指揮一通次紹熙五年牒潭州州學備准指揮一通皆具錄原文次州縣釋奠文宣王儀次禮器十九圖其所行儀節大抵採自杜氏通典及五禮新儀而折衷之後來二丁行事雖儀注少有損益而所據率本是書惟所列兩廡從祀位次有呂祖謙張栻則其事在理宗以後又有咸淳三年改定位次之文檢勘宋史禮志載咸淳詔書其先儒名數及東西次序與此書一一脗合與朱子益不相及蓋後大隨時附益又非其原本矣

大金集禮四十卷

兩淮馬倫家藏本

不著撰人名氏亦不著成書年月據黃虞稷千頃堂書目蓋明昌六年禮部尙書張瑋等所進今考書中紀事斷

至大定知爲章宗時書虞稷所載當不誤也其書分類排纂具有條理自尊號冊證以及祠祀廟會燕饗諸儀然悉備以金史諸志相校其藍本全出於此而志文援引舛漏失其本意者頗多若祭方丘儀是書有前祭二日太尉告廟之儀而金史遺落不載又金史云設饌幕于內壇東門之外道北南向考之此書則陳設饌幕乃有東門西門二處蓋壇上及神州東方南方之饌陳於東門外西方北方之饌陳於西門外金史獨載設於東門外者于禮爲舛如斯之類不一而足非得此書無以知史志之疎謬也則數金源之掌故著此爲總匯矣惟第十卷載夏至日祭方丘儀而圖丘郊天儀獨闕考金史自天德以後並祀南北郊大定明昌其制漸備編書者既載北郊儀注不應反遺南郊蓋傳寫脫佚非原書有所不備也

大金德運圖說一卷

永樂大典本

金尙書省會官集議德運所存案牘之文也案金史本紀金初色尙白章宗泰和二年十一月更定德運爲土臘月辰詔告中外至宣宗貞祐二年正月命有司復議本朝德運是書所載蓋即其事書前爲尙書省判次爲省劄列集議官二十二人其中獨上議狀者六人合具議狀者八人連署者四人其集議有名而無議狀者太子太傅張行簡太子太保富察烏葉案富察烏葉原作補察也今改正修撰富珠哩阿拉案富珠哩阿拉原作字允魯阿拉今改正費靡諳達登案費靡諳達登原作我滿案帶丁今改正四人疑原書尙有所脫佚其所議言應爲土德者四人言應爲金德者十四人中如諫議大夫張行信力主金德之議而金史行信本傳稱貞祐四年以參議官王滄言當爲火德詔問有司行信謂當定爲土德而斥滄所言爲狂妄其立說先後自相矛盾殊不可解又書中但有諸臣議狀而尙書省臣無所可否考史載興定元年十二月庚辰臘享太廟是終金之世仍從泰和所定土德而未嘗更改疑是成元兵深入宣宗南遷汴梁此議遂罷故尙書省亦未經奏覆也五德之運不見六經惟家語始有之而其書出於王肅偽撰不可據爲典要後代泥於其說多侈陳五行傳序之由而牽合遷就附會支離亦終無一當仰蒙我皇上折衷垂訓斥妄祛疑本宅中圖大之隆規破讖緯休祥之謬說闡發明切立千古不易之定論是編所議識見皆爲偏陋本不足錄然此事史文簡

略不能具其始末存此一帙尙可以補掌故之遺竝恭錄 聖製弁諸簡首俾天下後世曉然知嚮行以下皆妄生臆解用以祗曲說之惑焉

廟學典禮六卷

永樂大典本

不著撰人名氏諸家書目皆不著錄核其所載始于元太宗丁酉而終于成宗大德間蓋元人所錄也其書雜鈔案牘排綴成編未經文士之修飾故詞多雜糅又原序原目散佚無考亦無從得其門類幸其年月先後皆有可稽尙可排比成帙謹釐析其文勒爲六卷雖繁複之失在所未免而一代廟學之措置規畫梗概具存頗可與元史相參考如至元六年設舉學校官一條稱儒學提舉司秩從六品而百官志作從五品各路儒學教授秩八品而百官志作九品至元十九年郡縣學院官職員數一條稱總管府設教授一員學錄學正各二員散府設教授二員學錄學正各一員而百官志作總管府教授一員學正一員學錄一員散府上中州教授一員下州學正一員俱不相合蓋宋濂等修史之時據其末年之制而大德以前之舊典則未及詳考也又選舉志稱至元二十八年令江南諸路學及各縣學內設立小學邇老成之士教之其他先儒過化之地名賢經行之所與好事之家出錢粟贍學者竝立爲書院是明言小學書院設於世祖之時而此書載所立小學書塾乃在大德四年以成宗時人記成宗時事不應譌異如是或至元時雖有此議實未及施行至成宗乃補定其規制而史未及詳與元史一書自開局至告成僅閱八月其閒潦草闕略不一而足諸志尤不賅備畱此一編猶足以見一朝養士之典固考古者所必稽矣其中尙有當日文書程式後人不能盡解以致傳寫譌脫者竝詳核釐正無可考者則闕之人名地名官名譯語對音尤多舛異今皆一一核定俾不失其真以糾向來流傳之誤焉

明集禮五十三卷

浙江范懋村家天一閣藏本

明徐一夔梁寅劉子周於諒胡行簡劉宗弼董彞蔡琛滕公瑛曾魯同奉敕撰考明典彙載洪武二年八月詔儒臣修纂禮書三年九月書成名大明集禮其書以吉凶軍賓嘉冠服車輅儀仗齒簿字學樂爲綱所列子目禮十四

曰祀天曰祀地曰宗廟曰社稷曰朝日曰日月曰先農曰太歲風雲雷雨師曰岳鎮海瀆天下山川城隍曰旌靈曰馬祖先牧社馬步曰祭厲曰祀典神曰三皇孔子嘉禮五曰朝會曰冊封曰冠履曰婚曰鄉飲酒賓禮二曰朝貢曰遣使軍禮三曰親征曰遣將曰大射凶禮二曰弔贈曰喪儀又冠服車輅儀仗函簿字學各一樂三曰鍾律曰雅樂曰俗樂明史藝文志及昭代典則均作五十卷今書乃五十三卷考明典彙載嘉靖八年禮部尙書李時請刊大明集禮九年六月梓成禮部言是書舊無善錄故多殘闕臣等以次詮補因爲傳注乞令史臣纂入以成全書云云則所稱五十卷者或洪武原本而今所存五十三卷乃嘉靖中刊本取諸臣傳注及所詮補者纂入原書故多三卷耳如明禮志載洪武三年圜丘從祀益以風雲雷雨而是書卷一總序曰國朝圜丘從祀惟以大明夜明星辰太歲又所載圜丘從祀壇位及牲幣尊彝均止及大明夜明星辰太歲不及風雲雷雨是益祀風雲雷雨從祀圜丘在十一月而是書成於九月故未及纂入實有明據而卷一序神位版乃曰風伯之神雲師之神雷師之神雨師之神竝赤質金字不應一卷之內自相矛盾若此則其爲增入可知又明史禮志載洪武元年冬至祀昊天上帝儀注無先期告諸神祇及祖廟之文至洪武四年始制此制而是書儀注則有之知亦嘉靖諸臣詮補纂入者矣序爲世宗御製題爲嘉靖九年六月望日而世宗實錄載九年六月庚午刻大明集禮成上親製序文是月己未朔則庚午乃十二日與實錄小有異同疑十二日進書望日製序記載者併書於進書日也

明臣諡彙考二卷

浙江巡撫
採進本

明鮑應鼈撰應鼈字山父歙縣人萬歷乙未進士官至禮部祠祭司郎中是書載明代文武諸臣贈諡與

欽定明

史各傳俱符合首載各諡釋義爲當時禮官體例而所列諸諡如某人諡某字皆分注當日定諡取義之文于下使觀者具知其所以然較他家所記獨有根據其前代諸臣如謝枋得之諡忠節紀信文天祥之諡忠烈鄧文進之諡忠襄蘇械之諡忠壯史或不載世所罕知亦頗賴此書以存卷未附萬歷三十一年至三十七年擬諡者二十九人又三十八年至四十年擬諡者四人皆二諡竝列蓋神宗荒怠奏章率不批荅莫知進止故兩存也最後

列考談一篇凡五十七人皆據官冊以正野史文集之謬其中多有無諡而冒稱諡某者亦有字相同異美惡頗殊者或詭詞假借或傳寫舛謬外人無從而知非應鼉身為禮官親檢故籍不能一一釐正也其於一代易名之典可云精核矣

頓宮禮樂疏十卷

浙江巡撫 採進本

明李之藻撰之藻字振之仁和人萬曆戊戌進士官至太僕寺少卿是編首列頓宮祀典次列儀注次列名物器數共成八卷第九卷爲啟聖祠及名宦鄉賢祠附以鄉飲酒禮第十卷附以鄉射禮其中如釋奠儀之散齋演樂條牲諸禮及時祭儀注皆明會典及南雍志諸書所未載又迎神樂章謂明制本未舊一成三成相沿不易其樂章諸譜配以六律者唯填工尺一字頗能得其源流蓋樂律自宋仁宗時始省去坐立二部及堂上堂下之分南宋諸儒又以舊樂加平減之制無高上高尺之律於是所用者惟中和韶樂明代實沿其制之藁所譜又注明時俗之一凡清凡諸調與舊調相合者分毫不爽又於琴瑟操縵之法別成一譜其琴譜不越松風閣之舊規以數音譜出一字少用鉤剔蓋欲近於和緩以和韶樂瑟譜則以六律爲主行違其聲以應節又與元能朋來瑟譜之一聲一字者迥殊蓋歷律皆根於數之藁爛於算法世所行天學初函卽其所刻因數制律足自爲一家之學其末卷載鄉飲酒禮兼及鄉射禮者明初之制猶行射禮於頓宮迨其中葉此禮遂廢故明會典及南雍志諸書載之不詳之藁稽古證今考辨頗爲愆悉唯葵崇一門僅採史傳不及馬端臨學校考之備又儀器圖內犧尊諸制既不本於三禮圖又不以考古博古諸圖證其異同僅以時俗陳設者爲準未免稍略然禮以時王所制爲定是亦自有其義焉未可盡非也

明諭記彙編二十五卷

江蘇巡撫 採進本

明郭良翰撰良翰有周禮古本訂注已著錄茲編輯有明一代諭法最爲詳備首曰功令凡子目二曰會典事例曰近日事例次曰諭法無子目次曰尊諭凡子目九曰帝后曰皇妃諭六字曰皇妃諭四字曰皇妃諭二字曰東宮曰

公主曰親王曰郡王曰王妃次曰臣諡凡子目九曰文臣曰武臣曰異流曰夫人淑人曰追贈前朝臣曰外夷曰近題准諡諸文臣曰議論曰考誤其近題准諡一條即當代文臣所以不敢入各類者蓋即鮑應龍書所載之二十九人不子不奪莫知所定者也其議論一門則雜採明人諸說如李東陽以有黨諡文正彭韶以孤立諡惠安之類持論頗公其考誤一門以閣籍正野史異同尤爲可據亦考典故者所宜取證也

明宮史五卷

內府藏本

舊本題蘆城赤隱呂慈校次始末未詳蓋明季宦官也其書敘述當時宮殿樓臺服食宴樂及官闈諸雜事大抵冗碎猥鄙不足據爲典要至於內監職掌條內稱司禮監掌印秉筆秩尊視元輔權重視總憲云云尤爲悖妄蓋歷代奄寺之權惟明爲最重歷代奄寺之禍亦惟明爲最深二百餘年之中盜持魁柄濁亂朝綱卒至於宗社邱墟生靈塗炭實爲漢唐宋元所未有迨其末造久假不歸視威福自專如其固有違肆無忌憚筆之於書故迹其致亡之道雖亦多端要以寵任貂璫爲病本之所在也然其人可誅其事乃足爲炯鑑家語稱周明堂之四門有桀紂之象儀禮鄉射禮司射適堂西命弟子設豐陳祥道禮書稱舊圖刻人形謂豐國之君嗜酒亡國因狀之以爲戒也漢書敘傳載乘輿幄座張畫屏風畫紉醉妬姬已作長夜之樂班伯亦以爲警沈酒焉豈非借彼前車示其覆轍俾後來以此思懼乎我朝自列聖以來家法森嚴內豎不過供灑掃或違律令必正刑章不待於遠引周官委權冢宰而乾綱獨握宮掖肅清已足垂法於萬世乃猶防微杜漸慮遠思深特命繕錄斯編登諸冊府著前代亂亡之所自以昭示無窮伏考尚書有曰殷鑒不遠在夏后之世詩大雅有曰儀監于殷亦越漢之高帝使陸賈作新語亦曰著秦之所以失與我之所以得蓋時代彌近資考鏡者彌切也皇上於內殿叢編檢逢是帙關其謬而仍存之聖人之所見者大矣謹恭錄論旨弁冕簡端仰見衡鑒親操折衷衆論勒千古未有之鴻編皆義主勸懲言資法戒非徒以雕華浮艷爲藏弄之富也

國朝襲封衍聖公孔毓圻等擬進先是康熙二十三年 聖祖仁皇帝臨幸闕里 親祀 孔廟行九拜之禮 特命
雷曲柄繖於廟庭復 親製碑文遣官勒石於 孔廟大成門左周公孟子諸廟咸蒙 製文刊石並錄聖賢後裔
給世官以奉祠祀鉅典裔皇薄海忻舞毓圻以 聖天子尊師隆軌超邁古今立勒為成書垂示來葉二十四年
疏請纂修并舉進士金居敬等八人司其事得 旨俞允至二十七年成書十八卷奏 進蒙 指示應改正者
二十八條及臣工詩文尚有應遞選錄入者 諭毓圻等覆加校定會 詔發帑金重建 廟庭御製奎章摹鑄
樂石尊崇之典視昔彌加毓圻等乃續事編摩增輯完備凡修成事蹟二十卷藝文二十卷刊刻表 進即此本
也洪惟我 聖祖仁皇帝統接羲軒心源洙泗褒崇 聖教典禮優隆為亙古所未有非區區管闕齋測所可形
容然文物典章毓圻等得諸見聞頗能臚具伏讀是編 大聖人崇儒重道之至意猶可怖見其萬一是固宏載
諸金匱以昭示無極者矣

萬壽盛典一百二十卷

康熙五十二年三月恭逢 聖祖仁皇帝六旬萬壽 內直諸臣所纂錄也凡六門一曰 宸藻分 詔諭為一

卷 御製詩文賦頌為一卷二曰 聖德分 孝德 謙德 保泰 教化四目三曰 典禮分朝賀饗儀祭告頒

詔養老大酺六目四曰 恩賚分宗室外藩臣僚耆舊蠲賦開科賞兵恤刑八目五日 慶祝則有圖有記以及名

山祝釐諸臣朝貢之儀備列焉六曰 歌頌則內外祝 釐之詞靡不採錄焉仰惟我 聖祖仁皇帝德盛道隆福祚

悠久其時臣民泳涵 釐化敷天率土普洽懽心衢歌巷舞之盛實為從古所未有而伏讀 詔諭每以萬姓安天

下福為兢兢是書之成非徒以紀 昇平之鉅典正可以俾萬世臣民仰見 至聖持盈保泰之盛心為 景命延

洪之大本也書中圖二卷於遐邇臣庶迎 鑾呼祝之儀纖悉且備亦自有圖繪以來所罕覩其摹本初為宋駿業

所創後王原祁等重加修潤而成一展卷而閭閻殷阜之象重更歡躍之忱恍若目接而身遇之今悉依原本鈎摹
故幅度視他卷稍贏焉

欽定大清通禮五十五卷

乾隆元年奉 敕撰越二十一年告成首紀 朝 廟大典及 欽頒儀式其餘五禮之序悉準周官而體例則依仿儀禮惟載貴賤之等差節目之先後而不及其沿革惟載器物之名數陳設之方隅而不及其形製蓋沿革具於會典則例形製具於禮器圖式各有明文足資考證故不復述也考儀禮古經殘闕諸儒所說多自土禮上推於天子且古今異制後世斷不能行其一朝令典今有傳本者惟開元禮政和五禮新儀大金集禮明集禮大抵意求詳悉轉涉繁蕪以備掌故則有餘不能盡見諸施行也我 皇上聲律身度典制修明 特命酌定此編懸為令甲自 朝廷以迨於士庶鴻網細目具有規程事求其合宜不拘泥於成迹法求其可守不夸飾以浮文與前代禮書鋪陳掌故不切實用者迥殊記曰禮從宜 又曰大禮必簡三代聖王納民軌物其本義不過如斯 賜名曰通禮信乎酌於古今而達於上下為億萬年治世之範矣

南巡盛典一百二十卷

乾隆三十五年大學士管兩江總督高晉等恭撰 進欽惟我 皇上法 祖勤民歲巡方岳江浙東南都會民物蕃庶吏事殷繁 問俗省方允歷 聖慮是以 六龍時御 清蹕屢經凡行慶施惠勸課耕桑崇節儉隆典祀養

者年卹庶獄勵官方振文教飭武備者無不具舉而海塘防禦湖河疏蓄之宜皆因地制宜 親臨指授永為成法至於名區勝蹟 睿藻親題則不獨黎庶蒙 恩而山川且望 幸焉晉等爰舉辛未以逮乙酉 鑾輿四幸之

鉅典門分部系彙為是編復蒙 賜製序文 允付劄劄一展卷而我 皇上諮詢之切 詰誡之殷 惠澤之覃

布如在瞻就閒俾守土者有所遵循而淑疇者有所感發非徒申歌頌備典章而已也書成於庚寅之冬故所載

以乙酉為斷邇者 翠華六莅 典禮如初而東南士庶瘡痍 洪施延跂望 幸者視海瀾驚 臣等尤竊竦

隆儀叠舉續有排纂用快先睹之望焉

欽定皇朝禮器圖式二十八卷

欽定皇朝禮器圖式二十八卷

乾隆二十四年奉 敕撰乾隆三十一年又 命廷臣重加校補勒爲此編凡分六類一曰祭器二曰儀器三曰冠服四曰樂器五曰鹵簿六曰武備每器皆列圖於右系說於左詳其廣狹長短圍徑之度金玉瓊貝錦段之質刻鏤繪畫組繡之制以及品數之多寡章采之等差無不縷析條分一一臚載考禮圖世稱始於鄭元而鄭志不載蓋傳其學者爲之也阮謙以後踵而作者凡五家聶崇義匯合爲一而諸本盡佚然諸家遺述古制大抵皆約略傳注之文揣摩形似多不免於失真是編所述則皆 昭代典章事得諸目驗故毫釐畢肖分判無訛 聖世鴻規燦然明備其中儀器武備二類舊皆別自爲書今乃列之於禮器與古例稍殊然周代既祗保章馮相所職皆天象而隸於春官禮有五目軍禮居三而所謂前朱雀而後元武左青龍而右白虎招搖在上急繕其怒者戰陳之令乃載於曲禮蓋禮者理也其義至大其所包者亦至廣故凡有制而不可越者皆謂之禮周官所述皆政典而兼得周禮之名蓋由於此今以儀器武備併歸禮器正三代之古義未可以不類疑也若夫酌古宜今之精意奉天法 祖之鴻規具見 御製序文之中尤萬世臣民所宜遵道遵路者矣

國朝宮史三十六卷

乾隆七年奉 敕撰乾隆二十四年以原書簡略復 命增修越兩載而告成凡六門首曰 訓諭恭載 列朝聖訓 皇上諭旨以昭垂 家法次曰典禮備著 內廷儀節規制冠服輿衛之度其外朝諸大禮詳於會典者則略之次曰宮殿按次方位詳列規模凡 御筆榜書楹帖及諸 題詠址一一恭錄次曰經費凡獻賽禮宴服食器用之數纖悉必載次曰官制具載內臣員品及其職掌與其功罪賞罰之等次曰書籍部分錄略編目提要皆窮理致治之作而梵文具筴度藏淨域者不與焉伏讀 諭旨申明編輯是書之意拳拳於立綱陳紀聰聽明訓爲萬萬世遵循之本蓋修齊治平之道並具於斯矣

欽定滿洲祭神祭天典禮六卷

乾隆十二年奉 敕撰我 國家肇迹東土風淳俗厚於崇德報功之禮歷久不渝凡所以昭格 天神時修祀典

者著誠著慈具有舊儀迄今百有餘年精禮致饗夙夜維虔惟是古制相沿皆有口授祝詞儀注久而小有異同我皇上道秉欽崇敬深明察慮年祀踰邈或漸遠其初乃命王公大臣詳爲考證以國語國書定著一編首爲祭儀二篇次爲彙記故事一篇次爲儀注祝詞贊詞四十一篇殿以器用數目一篇器用形式圖一篇每一卷成必親加釐正至精至詳祈報之義對越之忱皆足以昭垂萬世乾隆四十二年復詔依文音釋譯爲此帙與大清通禮相輔而行用彰聖朝之令典末有大學士阿桂等恭跋具述致誠返福之義而於崇祀諸神不知其緣起者引禮記舍菜先師鄭元注不著先師名姓之例爲證於祝詞贊詞僅傳其聲者引漢樂府舞曲有音無義之例爲證並以傳信闕疑見聖心之敬慎視漢備儀禮附會緯書宋儒議禮紛更錯簡強不知以爲知者尤迴乎殊焉

八旬萬壽盛典一百二十卷

乾隆五十四年正月大學士阿桂等奏請纂修五十七年十月告成洪惟我皇上法天行健無逸永年久道化成治躋三五爲書契所未聞而五世同堂八旬延慶洪範所謂身其康強子孫其逢吉者亦千古帝王所莫及是以協氣翔洽驩心溥浹四海臣民莫不踴躍鼓舞祝眉壽而歌純嘏雖聖懷沖挹而敷天輻輳衆志難違慶典之隆遂炳炳麟麟照映萬禩是編所載皆聖壽七旬以後之事凡分八門首爲宸章皆恭錄御製紀年之作文自古稀說以下詩自庚子元旦以下俱按年編載若隨時紀事之作則各從本類分載各門次爲聖德分八子目曰敬德曰孝德曰勤德曰健德曰仁德曰文德曰儉德曰謙德次爲聖功分五子目曰安南歸降曰緬甸歸順曰廓爾喀降順曰附載平定臺灣曰附載平定肅州次爲盛事分子目十一曰慶得皇元孫曰五世同堂曰數世同居千叟宴曰賜科第職銜曰壽民壽婦曰辟醜曰班禪入覲曰民數穀數曰產四男三男曰收成分數次爲典禮分五子目曰慶祝曰朝會曰祭告曰鑿儀曰樂章次爲恩甄分六子目曰本年恩詔曰本年獨賦曰本年恩科曰本年東巡曰恩宴曰

賞賚次爲圖繪附以圖說次爲歌頌則臣工祝釐之詞也昔成周盛時制詩緝頌歌景福稱弗祿者不一而足然多虛擬之詞不能言言有據也茲編所載事皆徵實蓋德盛而後化神澤洽而後頌作功成治定而後禮樂興氣淑年而後嘉祥集其在詩曰宜民宜人受祿于天保佑命之自天申之其在書曰皇建其有極敘時五福用敷錫厥庶民惟時厥庶民于汝極錫汝保極義均備於是焉洵與聖祖仁皇帝萬壽盛典祖武孫謀後先焜耀竝萬代之隆軌矣

歷代建元考十卷 兩江總督採進本

國朝鍾淵映撰淵映字廣漢秀水人自來紀元諸書多詳於正統惟國初吳肅公改元考同及近時萬光泰紀元敘韻與淵映此書則併偽朝竊國以至草竊僭稱皆一一具載其例以年號相同者列前次以年號分韻排編次列歷朝帝王及僭國始末竝外藩亦開及之秩然有序雖載籍浩博蒐採難周如蜀王衍宋太祖年號與輔公祐同裴甫有維平之僭成都爲西夏之稱凡斯之類不免開有闕漏未可云毫髮無遺然較吳萬二家足稱賅洽矣

北郊配位議一卷 浙江巡撫採進本

國朝毛奇齡撰奇齡有仲氏易已著錄康熙二十四年太常寺卿徐元珙疏奏現行祀典北郊既改北向而三祖配位仍首東次西同於南郊請酌改所向奇齡時官檢討因撰是書其斥漢元始儀之誤謂孟春合祀天位在西地位在東皆因惑於曲禮席南向北向以西方爲上之文其實曲禮據常坐言之若禮坐之席則儀禮射禮皆筵賓席於戶西東上自與曲禮異考鄉射禮文乃席賓南面東上賈公彥疏云言東上因主人在東故席端在東不得以曲禮席南向北向西方爲上解之奇齡本此以折元始儀實爲有據至於元始儀配位西向南上亦相承曲禮西向東向以南方爲上之文奇齡以後漢改從北上爲正其論甚確然考北上之義亦本儀禮大射儀曰大夫繼而東上若有東面者則北上燕禮曰土既獻者立於東方西面北上此北上之異於南上者今奇齡知南向東上之本於

儀禮而獨未知西向北上之亦本於儀禮則未免知一而不知二奇論又謂 北郊既改從北向則 配位卽統於所向地道尙右 配位當以東爲上東乃北向之右也今考儀禮大射儀曰 諸公阼階西北面東上燕禮曰 卿大夫皆入門右北面東上則 北郊北向 配位以東爲上與儀禮北面東上義例全通奇論徒以地道尙右定之亦爲未審然全書考辨精核援引博瞻於宋明以來議禮之家要爲特出矣

廟制圖考一卷

浙江巡撫探進本

國朝萬斯同撰斯同字季野鄞縣人是書統曾經史折衷廟制謂廟不在雉門之外考工記左祖右社據王宮居中而言是廟在寢東蓋本蔡下朱子易祫之說又謂諸侯五廟太祖居中二昭居東二穆居西平行竝列蓋本賈公彥之說又謂自虞夏商周天子皆立七廟惟周增文武二祧爲九廟蓋本 劉歆王莽諸家之說又謂大傳小記祭法中庸詩序國語論語所言禘皆據宗廟大祭非圓丘蓋本 王肅之說於是上溯秦漢下迄元明凡廟制沿革悉爲之圖以附於經圖之後而綴以說其用功頗勤其義例亦頗明晰視明季本之書較爲賅備其中所論則得失互陳如朱子謂羣昭皆列北牖下而南向羣穆皆列南牖下而北向斯同則謂禮室中但有南牖無北牖朱子爲誤今考喪大記寢東首于北牖下註云病者恒居北牖或爲北墀是室有北牖明矣詩塞向墀戶經典釋文引韓詩云向北向窗也毛傳亦云向北出牖也孔疏云爲備寒不塞南窗故云北出牖則是室有南牖又有北牖明矣郊特性云薄社北牖蓋但開北牖而塞其南非凡屋本無北牖而特爲薄社開之也荀子宥坐 篇子貢觀於魯廟之北堂出而問孔子曰鄉者賜觀於太廟之北堂吾亦未輟還復瞻被九蓋註云北堂神主所在也九當爲北蓋音蓋戶扇也然則北堂既有北窗何獨疑於北牖耶明堂位刮楹達鄉註云鄉牖屬請夾戶窗也每室八窗爲四達然則太廟之制略似明堂四面且皆有牖又何獨於北牖而疑之耶凡此之類皆未深考者也至如朱子祭圖祖妣竝列斯同謂宗廟吉祭一尸統二主無女尸何以知六廟之妣蓋入太廟遂引曾子問七廟五廟無虛主惟祫祭爲無主卽知妣主亦入太廟凡此之類則援證精確爲前人所未發矣 雖大旨宗王黜鄭固守一隅然通

貫古今有條有理不可謂非通經之學也王士禎記斯同所著書目有廟制圖考四卷此本祇一卷殆傳鈔者所合併歟

右政書類典禮之屬二十四部一千五十一卷皆文淵閣著錄

案六官之政始於冢宰茲職官已各自爲類故不復及六官之序司徒先於宗伯今以春官所掌帝制朝章悉在焉取以託始尊王之義也

救荒活民書三卷

浙江范懋柱家天一閣藏本

宋董煟撰煟字季興鄱陽人紹熙五年進士嘗知瑞安縣是書前有自序謂上卷考古以證今中卷條陳救荒之策下卷備述本朝名臣賢士之所議論施行可爲法戒者書中所序如以常平不爲始自隋義倉爲始自唐太宗皆不能遠考本原然其載常平粟米之數固隋書所未及志也其宋代蠲免優恤之典載在宋史紀志及文獻通考續通鑑長編者此撮其大要不過得十之二三而當時利弊言之頗悉實足補宋志之闕勸分亦宋之政令史失載而此有焉他若減租貸種消暵卹災合格皆可爲史氏拾遺而宋代名臣救荒善政亦多堪與本傳相參證猶古書中之有裨實用者也

熬波圖一卷

永樂大典本

元陳椿撰椿天台人始末未詳此書乃元統中椿爲下砂場鹽司因前提幹舊圖而補成者也自各團竈墜至起運散鹽爲圖四十有七圖各有說後繫以詩凡晒灰打滴之方運薪試運之細纖悉畢具亦樓璿耕織圖會之謹農器譜之流亞也序言地有瞿氏唐氏爲鹽場提幹又稱提幹諱守仁而佚其姓考雲間舊志瞿氏實下砂望族如瞿廷發瞿震發瞿重發瞿時學瞿時懋瞿時佐瞿先知輩或爲提舉或爲監稅幾於世任鹽官其地有瞿家港瞿家路瞿家園諸名皆其舊迹然則是圖者不知爲誰至唐氏則舊志不載無可考見矣諸圖繪畫頗工永樂大典所載已經傳摹尙存矩度惟原闕五圖世無別本不可復補姚廣孝等編輯之時雖校勘粗疎不應漏落至此蓋

原本已佚脫也

錢通三十二卷

浙江巡撫探進本

明胡我琨撰我琨字自玉爵里未詳據書中所記時事年月是明末人也其書專論明代錢法而因及於古制首曰正朔一統次曰原曰制曰象曰用曰才曰行曰操曰節曰分曰異曰文曰閏凡十三門每門之中各爲小目其載明制起洪永訖萬歷徵引各史紀志列傳以及古今說部文集援據頗爲賅洽於明代錢法沿革條分縷析言之尤詳多明史食貨志及明會典明典彙諸書所未備其敘述古制如引桂海虞衡志記右江之銅引宋會典記利州諸監錢數亦足補唐宋各史所未詳他如錢篆門之黃河錢投河國錢諸品又董道洪遵李孝美顧烜各家舊譜所未載皆足以資考證中如劉仁恭九土爲錢之類乃一時謬製亦做圖其式未免稍雜然義取賅備不得不巨細兼收亦未可以叢脞議也

欽定康濟錄六卷

乾隆四年 御定初仁和監生陸曾禹作救饑請吏科給事中倪國璉爲檢擇精要釐爲四卷會 詔翰林科道輪奏經史講義國璉因恭錄進呈 皇上嘉其有裨於實用 命內直諸臣刪潤其詞制刷頒布因 賜今名其書凡分四門一曰前代救援之典所錄故實 上起唐虞下及元明宋朝代先後編次二曰先事之政分子目六三曰臨事之政分子目二十四四曰事後之政分子目五又附錄者四事皆先引古事後係論斷采金穰木饑天道恒然堯水湯旱聖朝不免其挽回氣數則在於人事之修舉周禮荒政十有二多主於省事以節財蓋預備之道已散見於各職故也我 皇上宵衣旰食軫念民依或歲星偶沴禾麥不登 賜蠲貸者動輒數十百萬 賜賑卹者亦動輒數十百萬即遇倉壘敗度備拯災以蝕 帑者尙恐封疆大吏因噎廢餐杜假冒之風或靳撫緩之費 諭旨宣諭至再至三合識之倫罔弗其喻 仁宏博濟賢邁唐虞是以國璉是編特邀 睿賞 等校錄之下仰見 勒求民瘼之心與 俯察邇言之意均迴軼千古也

捕蝗考一卷

編修程晉芳家藏本

國朝陳芳生撰芳生字漱六仁和人螽蟥之害春秋屢見於策書詩大田篇去其螟螣及其蝻賊無害我田稗田祖有神秉畀炎火毛鄭之說以炎火為盛陽謂田祖不受此害特之付於炎火使自銷亡竝非實火是漢時尚未詳除蝗之制故訓詁家有是說也至唐姚崇作相遣使捕蝗引詩此語以為證朱子集傳亦從其說於是捕蝗之法始稍稍見於紀述芳生此書取史冊所載事蹟議論彙為一編首備蝗事空十條次前代捕蝗法而明末徐光啟奏疏最為詳核則全錄其文附以陳龍正語及芳生自識二條大旨在先事則預為消弭臨時則竭力剷除而責成於地方官之實心經理條分縷析頗為詳備雖卷帙寥寥然頗有裨於實用也

荒政叢書十卷

山西巡撫採進本

國朝俞森編森號存齋錢塘人由貢生官至湖廣布政司參議是書成於康熙庚午輯古人救荒之法於宋取董煟於明取林希元屠隆周孔教鍾化民劉世教於國朝取魏禧凡七家之言又自作常平義倉社倉三考溯其源使知所法復究其弊使知所戒成書五冊其官河南僉事時所撰也未附耶囊賑濟事空及捕蝗集要其官分守荆南道時所撰也救荒之策前人之已詳至積儲尤為救荒之本森既取肯人良規班班具列而於三考尤極詳晰登之梨棗俾司牧者便於簡閱亦可云念切民瘼者矣

右政書類邦計之屬六部五十二卷皆文淵閣著錄

案古者司徒兼教養後世則惟司錢穀以度支所掌條目浩繁然大抵邦計類也故今統以邦計為目不復一

一區別

歷代兵制八卷

浙江范懋柱家天一閣藏本

宋陳傅良撰傅良有春秋傳已著錄是書上溯成周鄉遂之法及春秋秦漢唐以來歷代兵制之得失於宋代言之尤詳如太祖躬定軍制親衛殿禁戍守更迭京師府畿內外相維發兵轉餉捕盜之制皆能擷舉其大旨其總論之

中謂祖宗時兵雖少而至靖遠咸平後邊境之兵增至六十萬皇祐初兵已一百四十一萬謂之兵而不知戰給糧
晚服工役繕河防供養廟養國馬者皆兵也疲老而坐食前世之兵未有很多如今日者總戶口歲入之數而以百
萬之兵計之無慮十戶而資一廂兵十萬而給一散卒其兵職衛士之給又浮費數倍何得而不大蹙云云其言至
為深切蓋傳良當南宋之時目睹主弱兵驕之害故著為是書追言致弊之本可謂切於時務者矣

補漢兵志一卷

浙江巡撫
採進本

宋錢文子撰文字字季樂清人紹熙三年由上舍釋褐出以吏部員外郎兼國史院編修官歷宗正少卿後退
居白石山下自號白石山人宋初懲五代之弊收天下甲兵悉萃京師謂之禁軍輾轉增益至於八十餘萬而虛名
冒濫實無可用之兵南渡以後倉皇補苴招聚彌多而冗費亦彌甚文子以漢承三代之後去古未遠猶有厲兵於
農之意而班史無志因據其本紀列傳及諸志之中載及兵制者哀而編之附以考證論斷以成此書 卷首有其
門人陳元粹序述其作書之意甚詳蓋為宋事立議非為漢書補亡也朱彝尊跋稱其言近而旨遠詞約而義該
非低頭拱手高談性命之學者所能然兵農既分以後其勢不可復合必欲強復古制不約以軍律則兵不足恃
必約以軍律則兵未練而農先擾故三代以下但可以屯種之法寓農於兵不能以井田之制寓兵於農文子所
論所謂言之則成理而試之則不可行者即以宋事而論數十萬之眾久已仰食於官如一旦沐之歸農勢不能
靖惟有聚為賊盜耳如以漸而損之則兵未能遽化為農農又未能遽化為兵倉卒有事何以禦之此又明知其
弊而不能驟革者也以所論切中宋制之弊而又可補漢志之闕故仍錄之以備參考文獻通考載此書作補漢
兵制與此本不同然文字明言班書無兵志則作補兵志審矣通考蓋傳寫訛也

馬政紀十二卷

浙江巡撫
採進本

明楊時喬撰時喬有周易古今文全書已著錄是書紀明一代馬政上起洪武元年至萬歷二十三年分十有二
門一曰戶馬二曰種馬三曰使馬四曰寄養馬五曰折糧賣布鹽納贖戰功等馬六曰兌馬七曰擠乳御用上陵

出府并附給駟馬八曰庫藏九曰蠲卹十曰政例十一曰草場十二曰各邊鎮行太僕寺苑馬寺茶馬司馬於因革損益各悉原委馬政莫詳於明亦莫弊於明時喬目擊其躬身親其事故雖良集彙牘之文而所言深中時病其條理悉具自序中序末自署前太僕寺卿而名明史本傳惟載嘗爲太僕寺丞是書時喬自刊不應有誤疑史或誤書也

八旗通志初集二百五十卷

雍正五年 世宗憲皇帝敕撰乾隆四年告成 御製序文頒行凡八旗分志十七卷土田志五卷營建志三卷兵職志八卷職官志十二卷學校志四卷典禮志十五卷藝文志十卷封爵世表八卷世職表二十四卷八旗大臣年表八卷宗人府年表一卷內閣大臣年表二卷部院大臣年表二卷直省大臣年表五卷選舉表四卷宗室王公列傳十二卷名臣列傳六十卷勳臣傳十九卷忠烈傳十二卷循吏傳四卷儒林傳二卷孝義傳一卷列女傳十二卷考天地自然之數皆立體於九而取用於八故圓而布九宮方而分九野皆以四正四隅拱乎中央聖人法天地以立制故并以公田居中而家之數八兵以中權爲主而陣之數亦八世傳風后之經諸葛亮之圖獨孤及之記其法異世而同軌我 國家肇迹震維寓兵於民與古制符 太祖高皇帝初建四旗後分爲八亦與古制符至於臂指之相維奇正之相應千變萬化倏忽若神則與陰陽往來乾坤闔闢同一至妙而不測非古制所能盡矣迨 世祖章皇帝定鼎燕京取五行相尅之用以藍旗屬水而居南黃旗屬土而居北白旗屬金而居東紅旗屬火而居西以環衛 紫垣百有餘年規模無改故此篇以兵制爲經而一切法令典章職官人物條分而爲緯鴻綱細目體例詳明案籍披圖足以見 列聖開基 貽謀遠大又以見生聚教養日熾日繁萬萬年磐石之業卜鞏固於無疆焉 右政書類軍政之屬四部二百七十一卷皆文淵閣著錄

案軍伍戰陳之事多備於子部兵家中此所錄者皆養兵之制非用兵之制也故所取不過數家

唐律疏義三十卷

兩淮鹽政探進本

唐太尉揚州都督趙國公長孫無忌等奉敕撰風俗通稱臯陶謨虞造律尙書大傳稱夏刑三千周刑二千五百是爲言律之始其後魏李悝著法經六篇一盜法二賊法三囚法四捕法五雜法六具法商鞅受之以相秦漢蕭何益戶典廢三篇爲九篇叔孫通又益旁章十八篇張湯越宮律二十七篇趙禹朝律六篇合六十篇馬融鄭康成皆嘗爲之章句魏世刪約漢律定增十九篇就故五篇合十八篇晉復增損爲二十篇南北朝互有更改漸近繁密隋文帝開皇三年敕蘇威牛宏等更制新律除死罪以下千餘條定畱五百條凡十二卷一名例二衛禁三職制四戶婚五廩庫六擅興七盜賊八鬪訟九詐僞十雜律十一捕亡十二斷獄史稱其刑網簡要疎而不失唐太宗詔房元齡等增損隋律降大辟爲流者九十二流爲徒者七十一而大旨多仍其舊高宗卽位又命長孫無忌等值律學之士模爲義疏行之卽是書也論者謂唐律一準乎禮以爲出入得古今之平故宋世多採用之元時斷獄亦每引爲據明洪武初命儒臣同刑官進講唐律後命劉惟謙等詳定明律其篇目一準於唐至洪武二十二年刑部請編類頒行始分吏戶禮兵刑工六律而以名例冠於篇首本朝折衷往制垂憲萬年欽定大清律例明簡公平實永爲協中強教之盛軌臣等嘗伏讀而納繹之凡唐律篇目今所沿用者有名例職制賊盜詐僞雜犯捕亡斷獄諸門其唐律合而今分者如戶婚爲戶役婚姻廩庫爲倉庫廩收鬪訟爲鬪毆訟諸門其名稍異而實同者如衛禁爲宮衛擅興爲軍政諸門其分析類附者如鬪津畱雜諸條唐律入衛禁今析入鬪津乘輿服御物事應奏不奏駙使稽程以財行求諸條唐律俱入職制今分析入禮律之儀制吏律之公式兵律之郵驛刑律之受贓謀殺人諸條唐律入賊盜今析入人命毆罵祖父母父母諸條唐律並入鬪訟今析爲兩條分入鬪毆罵詈又姦罪市司平物價盜決隄防毀大祀丘壇盜食田園瓜果諸條唐律俱入雜律今分析入刑律之犯姦戶律之市廛田宅工律之河防禮律之祭祀蓋斟酌畫一權衡允當追今日而集其大成而上稽歷代之制其節目備具足以沿波而討源者要惟唐律爲最善故著之於錄以見監古立法之所自焉其書爲元秦定開江西儒學提舉柳賈所校刊每卷未附以江西行省檢校官王元亮釋文及纂例亦頗可以資參訂也

大清律例四十七卷

乾隆五年奉 敕撰 御製序文頒行凡律目一卷諸圖一卷服制一卷名例律二卷吏律二卷戶律七卷禮律

二卷兵律五卷刑律十五卷工律二卷總類七卷比引律條一卷前列凡例十則及順治初年以來奏議而恭錄

世祖章皇帝御製序一篇 聖祖仁皇帝諭旨一道 世宗憲皇帝御製序一篇 諭旨一道冠於卷首蓋我

朝律文自 定鼎之初即 詔刑部尙書吳達海等詳考明律參以 國制勒為成書頒布中外康熙九年大學

士管刑部尙書事對喀納等復奉 詔校正旋又 諭部臣於定律之外所有條例或刪或存詳為考定隨時增

改刊附律後逮雍正元年大學士朱軾尙書查郎阿等奉 詔續成我 皇上御極之初即允尙書傅爾丹之請

簡命廷臣逐條考正以成是編纂入定例凡一千餘條而 皇心欽恤道取協中凡讞贖 奏陳皆辨析纖微衡

量情法隨事 訓示務準其平以昭世輕世重之義又每數載而一修各以新定之例分附於後在廷之臣恭聆

玉音或略迹而原心或推見以至隱折以片言悉斟酌於天理人情之至信 聖人留心庶獄為千古帝王之

所無而是編亦為千古之玉律金科矣

右政書類法令之屬二部七十七卷皆文淵閣著錄

案法令與法家其事相近而實不同法家者私議其理法令者官著為令者也刑為盛世所不能廢而亦盛世

所不尚茲所錄者略存梗概而已不求備也

營造法式三十四卷 浙江范祖述家天一閣藏本

宋通直郎詠將作少監李誠奉敕撰初熙甯中敕將作監官編修營造法式至元祐六年成書紹聖四年以所修之

本祇是料狀別無變造制度難以行用命詠別加撰輯誠乃考究羣書并與人匠講說分列類例以元符三年奏上

之崇甯二年復請用小字鑄版頒行詠所作總看詳中稱今編修海行法式總釋總例其二卷制度十五卷功限十

卷料例并工作等其三卷圖樣六卷目錄一卷總三十六卷計三百五十七篇內四十九篇係於經史等羣書中檢

尋考究其三百八篇係自來工作相傳經久可用之法與諸作誦會工匠詳悉講究蓋其書所言雖止藝事而能考證經傳參會眾說以合於古者飭材庀事之義故陳振孫書錄解題以爲遠出喻皓木經之上考陸友仁硯北雜志載誠所著尙有續山海經十卷古篆說文十卷續同姓名錄二卷琵琶錄三卷馬經三卷六博經三卷則誠本博洽之士故所撰述具有條理惟友仁稱誠字明仲而書其名作誠字然范氏天一閣影鈔宋本及宋史藝文志文獻通考俱作誠字友仁誤也此本前有誠所奏劄子及進書序各一篇第三十一卷當爲木作制度圖樣上篇原本已闕而以看詳一卷錯入其中檢永樂大典內亦載有此書其所闕二千餘圖竝在今據以補足而仍移看詳於卷首又看詳內稱書總三十六卷而今本制度一門較原目少二卷僅三十四卷永樂大典所載不分卷數無可參校而核其前後篇目又別無脫漏疑爲後人所併省今亦姑仍其舊云

欽定武英殿聚珍版程式一卷

乾隆四十一年戶部侍郎金簡恭撰進 呈初乾隆三十八年 詔纂修四庫全書復 命擇其善本校正剞劂以

嘉惠藝林金簡質司其事因聚梨繁重乃 奏請以活字排印力省功多得 旨俞允併 賜以嘉名紀以 睿藻

行之三載印本衣被於天下金簡因述其程式以爲此書考沈括夢溪筆談稱慶慶中有布衣畢昇始爲活版其法

用膠泥刻字薄如錢屑每字爲一印火燒令堅先設一鐵版其上以松脂蠟和紙灰之類冒之欲印則以一鐵範置

鐵版上乃密布字印滿鐵範爲一版持就火煬之藥稍鎔以一平板按其面則字平如砥若止印二三本未爲簡易

若印數千百本則極爲神速云云活字之法斯其權輿然泥字既不精整又易破碎松脂諸物亦繁重周章故王楙

農書所載活字之法易以木版其貯字之盤則設以轉輪較爲徑捷而亦未詳備至陸深金臺紀聞所云鉛字之法

則質柔易損更爲費日損工矣是編參酌舊制而變通以新意首載諸臣奏議次載取材雕字之次第以及度置排

類之法凡爲圖十有六爲說十有九皆一一得諸試驗故一一可見諸施行乃知前明無錫人以活字印太平御覽

自隆慶元年至五年僅得十之一二者

案事見黃正色太平御覽序

由於不得其法此亦足見 聖朝制器利用事事皆超前代

也

右政書類考工之屬二部三十五卷皆文淵閣著錄

欽定四庫全書總目卷八十二

欽定四庫全書總目卷八十三

史部三十九

改書類存目一

杜氏通典詳節四十二卷 浙江巡撫採進本

不知何人所編驗其版式猶宋時麻沙刻本所列引用諸儒姓氏止於呂祖謙陳傅良葉適三人皆註有文集見行字則南宋人所為也於杜氏通典八門內汰其兵制一門於禮制門內又刪去喪服之制故六朝諸儒議禮之文藉通典以傳者多不見錄又其去取多不可解如通典卷一載後漢田制凡列荀悅崔寔仲長統三人之說而

是書獨存荀悅蓋力求簡約而略無義例者也

元典章前集六十卷附新集 無卷數內府藏本

不著撰人名氏前集載世祖即位至延祐七年英宗初政其綱凡十曰詔令曰聖政曰朝綱曰臺綱曰吏部曰戶部曰禮部曰兵部曰刑部曰工部其目凡三百七十有三每目之中又各分條格新集體例略倣前集皆續載英宗至治元二年事不分卷數似猶未竟之本也此書始末元史不載惟載至治二年金帶御史李瑞言世祖以來所定制度立著為令使吏不得為姦治獄有所遵守英宗從之書成名曰大元通制頒行天下凡二千五百三十九條計其時代正與此書相同而二千五百三十九條之數則與此書不相應卷首所載中書省制亦不相合蓋各為一編非通制也考元史以八月成書諸志皆潦草殊甚不足徵一代之法制而元經世大典又久已散佚其散見永樂大典者顛倒割裂不可重編遂使百年掌故無成書之可考此書於當年法令分門臚載探擷頗詳故宜存備一朝之故事然所載皆案牘之文兼雜方言俗語浮詞妨要者十之七八又體例奢亂漫無端緒觀省制中有置簿編寫之語知此乃吏胥鈔記之條格不足以資考證故初擬繕錄而終存其目焉

明祖訓一卷 浙江巡撫採進本

明洪武二年命中書編次其目十有三一祖訓首章一持守一嚴祭祀一謹出入一慎國政一禮儀一法律一內令一內官一職制一兵衛一營繕一供用至六年五月書成太祖自爲序復命宋濂序之此本佚濂序惟太祖之序載篇首序稱開導後人立爲家法大書揭於西廡朝夕親覽以求至當首尾六年凡七磨錄棄至今方定翰林編輯成書禮部刊印云云然則諸詞臣僅繕錄排纂而已其文詞悉太祖御撰也其中多言親藩體制大抵懲前代之失欲兼用封建郡縣以相牽制故親王與方鎮各掌兵王不得預民事官吏亦不得預王府事尤諄諄以姦臣壅蔽離間爲慮所以防之者甚至如云若大臣行姦不令王見天子私下傳致其罪而遇不幸者其長史司併護衛移文五軍都督府索取姦臣族滅其家又云如朝無正臣內有姦惡則親王訓兵待命或領正兵討平然則靖難之事肇發於此高煦宸濠遂接踵效尤是亦矯枉過直作法於涼之弊矣皇甫錄明記略云祖訓所以教戒後世者甚備獨無委任闈人之禁世以爲怪或云本有此條因版在司禮監削去耳然永樂大典所載亦與此本相同則似非後來削去錄所云云蓋以意揣之也

明朝典策二百卷

浙江巡撫探進本

明徐學聚撰學聚有歷朝瑣鑑已著錄是書採錄明代典故自洪武訖隆慶分類編纂上自實錄下訖碑乘條分類萃凡二百門卷一至三十三卷爲朝政大端三十四卷以下則以六部分標記載頗爲繁富然分隸不無錯雜如明制六部與卿寺院監不相統攝此書則以宗人府都察院以下皆歸入吏部又如廟號尊諡陵寢巡幸郊祀祈禱祠醮皆禮部職也較閱兵部職也耕蠶莊田勲戚田土皆戶部職也此書則一切歸入朝政大端中於體例皆爲未協又採摭浩博而皆不著其出典亦未免無徵不信李濂續通鑑長編凡所引證必著書名不如是之莫知所本也

經世實用編二十八卷

江蘇周厚培家藏本

明馮應京撰應京有六家詩名物疏已著錄是編乃萬曆甲辰應京下詔獄時所成分乾元亨利貞五集乾集十

卷元集一卷亨集二卷利集四卷貞集九卷首載明太祖心法祖訓以迄取士任官重農經武禮樂射御書數而終之以諸儒語錄正學考大都稟祖訓爲律令而以歷朝沿革附之其用意不無可取至以乾元亨利貞分集取美里演易之義則未免於僭矣

明典章 無卷數 浙江 巡撫採進本

不著撰人名氏輯太祖吳元年以後世宗嘉靖十五年以前朝廷制誥典制大抵從實錄鈔出編次殊無體例

會典鈔略 無卷數 內府藏本

不著編輯者名氏前有題詞稱會典一書卷逾二百嚮之價多攜之囊重士有自操槩以至歷官不獲一睹者其在里巷齊民尤可知已但全書紀載雖較其當訓行者概有大略因手鈔略節約十餘帙開附註通紀一二事以備參考云云是其書在陳建通紀之後矣

右政書類通制之屬七部三百三十一卷 內二部 無卷數 皆附存目

別本漢舊儀二卷 兩江總督 採進本

舊本題漢議郎東海衛宏徵仲撰宏所撰漢官舊儀已於永樂大典內繕出著錄語詳本條下此本書名與後漢書宏本傳合而四篇之數仍不合併與書錄解題三卷之數亦不相應其中多引胡廣語廣爲安帝時人宏爲議郎則在光武帝時先後相隔六十餘年不應宏書之內先有廣名又時時稱衛宏曰亦必非宏自著書之體其註中并引及周禮註疏註出鄭康成疏出唐賈公彥宏益不得見之矣蓋原書久佚後人從漢書註中摘錄而成觀其中竹宮去壇三里一句前後兩見則爲雜鈔致復無疑矣今宋代舊本猶存永樂大典中業已校錄刊刻重顯於世此後人哀集之本固可置而不論矣

貢舉敘略一卷 編修程晉 芳家藏本

舊本題宋陳彭年撰載普浴學海類編中實冊府元龜貢舉一門之總序以彭年爲作序五人之一遂題彭年之

名然原本不言此序出彭年也

兩淮鹽政
採進本

不著撰人名氏載歷代崇祀孔廟禮儀起魯哀公迄宋咸淳三年疑為元人作也凡三卷上卷分論號廟祀殿額
坐像冕服封爵位序配享八門中卷分從祀鄉賢二門下卷分釋奠樂章曲阜廟幸學謁廟告還奉安五門

明堂或問一卷

左都御史張
若性家藏本

明世宗肅皇帝御撰嘉靖十七年致仕同知豐坊疏請復古禮建明堂加興獻帝廟號稱宗以配上帝詔下禮部
會議尚書嚴嵩等皆以明堂為應建而於稱宗配享二事則依違其詞戶部侍郎唐胄抗疏言宜以太宗配享帝
怒下胄獄嵩乃再會廷臣議請以興獻帝稱宗配食帝以疏不言祔廟畱中不下復設為臣下問荅之詞作或問
一篇大略言文皇遠祖不應嚴父之義宜以父配稱宗雖無定說尊親崇上義所當行既稱宗則當祔廟豈有太
廟中四親不具之禮是年九月遂尊興獻帝為睿宗祔太廟又即元極寶殿為明堂大享上帝以睿宗配皆如帝
旨此本前有帝所自作小序後以配享詔書一通附之

正孔子祀典說一卷

左都御史張
若性家藏本

明世宗肅皇帝御撰嘉靖九年大學士張璠請正先師祀典帝因言聖人尊天與尊親同今全用祀天儀非正禮
謹號章服悉宜改正璠遂請改孔子稱先師不稱王用木主不用塑像盪豆用十樂用六份配位宜削公侯伯之
號止稱先賢先儒帝命禮部集議編修徐階疏陳不可帝怒滿階官因親製此文宣付史館大略謂孔子以魯僭
王為非寧可自憚天子之禮尋以羣臣爭執者眾復降諭曉示命禮部與祀典說通行刊布於是其議遂定案明
史禮志尚有帝所製正孔子祀典申記一篇此本所附救諭中亦有朕著說記之語而書中有說無記疑為傳寫
者所脫也

存心錄十卷

浙江朱彝尊家
藏本

不著撰人名氏皆記明初壇廟祭祀之制而附以災祥物異其前有序稱臣等承命作此錄以堅誠敬之心是奉
敕所撰而其文多殘損不完考明史藝文志有吳沈等編集存心錄十八卷精誠錄三卷皆在故事類中吳沈者
蘭溪人元國子博士師道子洪武時官東閣大學士嘗著辨言孔子封王之非禮後嘉靖中更定祀典實祖其說
則其人嫻於說禮可知而此書內所載禮節皆洪武三年以前之事則藝文志所謂存心錄者卽此書也惟此本
止十卷與十八卷之數不合檢核書首有私印一其文曰尙寶少卿袁氏忠徵印蓋猶明初舊本尙無脫佚又黃
佐南離志載嘉靖間存心錄版存者五十八面闕者三面所列亦止十卷與此本同是史志誤衍一八字也

日本東夷朝貢考一卷浙江范懋柱家天一閣藏本

明張迪撰迪字文海華亭人所輯日本朝貢事頗多闕略如永樂二年封其國山爲壽安鎮國之山兩遣使來貢
等事悉佚不載書末全錄宋元二史外國列傳以足其卷似是讓日本封貢時偶爲考紀云

臨雍錄一卷浙江范懋柱家天一閣藏本

明費閣撰閣字廷言丹徒人成化己丑進士官至禮部侍郎宏治元年三月孝宗舉行臨雍釋奠禮閣時爲祭酒
因錄其禮儀奏議及官禮部時乃編次成書付淮安知府徐鏞刻之至宏治九年林瀚兼祭酒事又刻於國子監
其書全錄吏牘之交無一字之刪潤詞不雅馴不足以稱崇儒大典考郊外農談曰鳳翔之麟游有虎臣者慷慨
有節氣成化末貢入太學適聞萬歲山架樓棚以備登眺臣上疏極諫憲廟奇之祭酒費閣不知也懼其買禍乃
會六堂鳴鼓聲罪銀鎗鎖之以待俄官校宣臣至左順門中官傳溫旨勞之曰爾言是也樓棚好拆卸矣命吏部
予臣七品正官閣大慚云云則閣爲祭酒本不愜於公論其著作益可知矣

大禮集議五卷浙江范懋柱家天一閣藏本

明席書編書遂寧人宏治庚戌進士官至武英殿大學士諡文襄事蹟具明史本傳嘉靖初書爲南京兵部侍郎
大禮議起書揣知帝意方向張璉桂萼乃上疏力主其說帝大喜時汪俊代毛澄爲禮部尙書猶堅執如澄議及

欽定四庫全書總目卷八十三

俊以力爭建廟去位帝特旨用書代之此編即其為禮部尚書時所編刻以進者也初侍讀學士方獻夫請刊大禮奏議二卷後吏部侍郎胡世寧復續增一卷至廟議已定書乃取原編定為奏議一卷會議一卷續議一卷復增廟議一卷未又附諸臣私議一卷私議者議而未奏者也然皆不外瓊等附合時局之說耳

科場條貫一卷

江蘇巡撫採進本

明陸深撰深有南巡日錄已著錄是書紀洪武至嘉靖間科舉條式於前後損益之制臚列頗詳

保和冠服圖一卷

浙江范懋柱家天一閣藏本

明張璠撰璠有諭對錄已著錄是書作於嘉靖七年在璠未更名以前故仍題原名先是世宗命璠製燕弁冠服為燕居所御又襲忠靜冠服以錫有位會光澤王請宗室冠服式命以燕弁為準定為此圖而救璠為之說前有諭旨及璠序其冠親王九祿世子八祿郡王七祿服用青身青緣前後方龍補襯用深衣玉色帶用青表緣裏緣履用皂緣結白鞞其鎮國將軍至奉國中尉左右長史至伴讀咸從忠靜冠服以品官之制服之其儀賓則不預焉名曰保和言各得其分則和也其冠圖為前後左右四面服圖為前後二面較三禮諸圖繪一面者為詳可為繪圖之式云

太廟敕議一卷

左都御史張若淮家藏本

明嘉靖中禮部頒行本也成祖既遷都北平而南京太廟仍舊不廢至嘉靖十三年南京太廟災禮部尚書湛若水疏請重建世宗敕羣臣集議尚書夏言及大學士張學敬等會疏稱國不當有二廟請以南京太廟香火歸併奉先殿其太廟故址仿古壇墀遺意高築牆垣令所司謹其啓閉帝從其議言因取所奉敕旨及會議題彙彙成此帙奏請刊行

改元考一卷

兩江總督採進本

明宗室朱常澍撰前有自序載嘉靖壬午魯國常澍識考明史諸王世表不載其名蓋魯荒王檀之元孫而懷王

常澁之從兄弟也此書專考歷代年號起漢建元迄明嘉靖自正統以及僭偽偏安無不具載然其中論謬之處不一而足如十六國春秋載蜀李雄以晉永興元年僭稱成都王改元建興次年即帝位改元晏平國號大成乃華陽國志偶譌大成爲大武而晉書載記遂嗣晏平及國號四字直曰改元大武此書竟以大武與晏平並列殊爲疎舛又後秦姚萇初稱秦王改云白雀三年僭帝號又改建初建初七年萇卒子興立即改爲皇初此書於白雀後誤增皇初而建初之號又誤移之姚興之下又西秦乞伏乾歸僭號河南王改元太初後降於姚興尋又倍之自稱秦王改元更始此書於太初之後更始之前誤增一宏始殊不知宏始乃姚興之年號非乾歸之年號也因乾歸降與時史冊用興年紀事而遂屬之乾歸固莽甚矣其他輾轉譌謬如於乞伏熾磐則脫永康之號而於慕容皝則多永壽之號大抵沿襲別本之譌而失於稽考至於明太祖以下至世宗皆直書名某而不避其諱常溯原本未必敢於如是或傳寫者所追加歟

重輯祖陵紀略二卷 兩江總督 採進本

明宗室朱自新撰祖陵者明高帝祖熙祖陵也在泗上初高帝未知熙祖葬所有朱貴者繪圖以獻即命貴充奉祀其八世孫邦翰因輯祖陵紀略一書述修繕祭祀之事嘉靖癸丑自新又重輯是編自新邦翰孫也

諭法通考十八卷 浙江朱彝尊家 曝書亭藏本

明王圻撰圻有東吳水利考已著錄圻著續文獻通考於禮考之末增諭法一目補馬端臨之闕然於明代諭典猶未之及此書所載上考列朝下至萬歷自君后妃主王公卿相以逮百官至於聖賢隱逸殉及異端宦寺篡逆之黨凡有諭者皆備書以資考證其卷首冠以總紀釋義二目猶續通考之例又所以自補其闕也有趙可懷序稱就續通考中抽出諭法一種另梓殆未詳閱其書歟

太常總覽 無卷數 兩淮 馬裕家藏本

明金贊仁撰贊仁嘉靖初道士以齋醮有寵官太常寺少卿是書嘗經奏進於典禮分別圖註條理頗詳然大抵

其時之贖祀也

明臣諡類鈔一卷

內府藏本

明鄭汝璽撰汝璽有明帝后紀略已著錄是書專載明代臣僚之得諡者始自劉基終於李珍凡六百六十一人各以諡法區分門類而不敘年代末附蘇祿朝鮮淳泥日本諸國王凡得諡者咸編入焉其不載親藩者則以帝后紀略已附藩封一門故也汝璽此書與功臣封爵考乃其官禮部儀制司及吏部驗封司時所作皆有案牘可考故紀載較他家為確云

明貢舉考九卷

浙江鮑士恭家藏本

明張朝瑞編朝瑞有忠節錄已著錄是書專考明代科舉之制首為場屋事例一卷於沿革之故言之頗詳附以貢舉紀略不入卷數二卷以下則起洪武三年庚戌迄萬歷十七年己丑其目錄止於萬歷癸未蓋丙戌以後又以次而增也每科載會試考官試題及所刻程文之目殿試之榜首尾全錄會試之榜則惟錄前五人鄉試之榜則惟錄各省第一人其有名臣碩儒足傳於後者皆附記於制策之末名姓籍貫之異同亦附註焉其考據頗為詳核惟貢舉紀略載狀元年老年年少之類類乎說部於體例為未安第一卷事例之中雜引諸儒之論至於引桂有三種紅為狀元黃為榜眼白為探花以證鼎甲三人名所自起尤為蕪雜矣

諡苑二卷

浙江范懋柱天一閣藏本

明朱睦㮮撰睦㮮有易學識遺已著錄是編上卷輯古諡法十二家曰史記諡法解曰周書諡法曰蔡邕獨斷諡法曰蘇洵諡法曰周公諡法曰春秋諡法曰廣諡法曰沈約諡法曰賀琛諡法曰扈家諡法曰鄭樵諡法曰陳思諡法其周公春秋廣諡沈約賀琛扈家六家因王圻續文獻通考之舊餘六家則睦㮮增輯也書影嘗疑漢蕭何諡曰文終不知於諡法居何等今考周公諡法下卷乃有終字則其傳已久然其書最不可解堯舜禹湯謂之諡此猶相傳有說帝皇王侯君公亦列為諡設帝當諡帝將曰帝帝王當諡王當曰王王乎又設帝當諡

王侯當日王帝侯帝王侯當諡帝當日帝王帝侯乎此等宜有所辨正一概因其原文不足以為考證王圻續文獻通考舛漏百出其與古書不合者皆校刻之誤乃據之以註異同尤為失考唐會要亦有諡法篇漏而不收亦為疎略下卷列明代王侯以下至於守令之諡不及鮑應龍書之賅備又頗舛誤參以諸書如徐溥諡文靖而曰文穆顧鼎臣諡文康而曰文簡喬宇諡莊簡而曰端簡馬昂諡恭襄而曰忠襄墨麟諡榮毅而曰文毅不一而足則亦不盡可據矣

王國典禮八卷

江蘇周厚靖家藏本

明朱勤美撰勤美字伯榮開封人鎮國中尉睦樛子為周藩宗正以文學世其家是書採輯宗藩成憲勒為一書分聖訓玉牒講讀冠禮婚禮爵秩冠服宮室儀仗祿米田地祀禮之國錫命慶祝入觀奏事宴饗喪禮事例管理宗子獎勵懲戒秩官儀賓兵衛倉庾支鹽諱禁凡三十類每類又各有子目

孔廟禮樂考六卷

兩淮馬裕家藏本

明瞿九思撰九思有春秋以俟錄已著錄是書於孔廟禮樂沿革同異考證頗詳勝他家鈔撮舊文有同簿籍者惟二卷以從祀諸弟子編為歌括殊乖體例

歷代貢舉志一卷

編修程晉芳家藏本

明馮夢禎撰夢禎字闕之秀水人萬歷丁丑進士官至國子監祭酒是書敘歷代貢舉之制如敘周官而於大司徒鄉老太宰內史選士之法不詳敘漢制而誤以董仲舒之舉賢良在建元之初魏晉以降中正九品之法盛行遼金元亦有進士科及薦舉制科載於各史志者甚悉夢禎一概略之未免過簡不足以資考證也

明典禮志二十卷

浙江巡撫採進本

明郭正域撰正域有批點考工記已著錄是書其官禮部尚書時所輯第一卷為登極儀二卷為朝儀三卷為宴享儀四卷為尊號五卷至七卷為冊封八卷為冠禮九卷為婚禮十卷為喪禮十一卷為耕籍十二卷為親蠶十三

卷為經筵日講諸儀十四卷為出閣讀書諸儀十五卷為巡狩十六卷為監國十七卷為儀仗十八卷為冠服十九卷為宮室共子目一百二十有七十二卷為雜典禮共子目六十有六敘次亦尚明簡而體例頗叢雜朝儀既自為卷而外戚朝見又入雜典禮中進實錄進玉牒受降獻俘宜捷皆國之大事亦入雜典禮中至於郊祀宗廟乃闕而不載尤不喻其故也

學科考略一卷

編修程晉芳家藏本

明董其昌撰其昌字元宰華亭人萬歷己丑進士官至禮部尚書諡文敏事蹟具明史文苑傳是書敘歷代立學之制兼敘孔廟封贈配享之始而貢舉之志兼及焉如敘太公廟起於唐而宋以後不載敘明經起於漢而唐宋明經之選亦不載殿試親策祇載漢唐及宋而遼金元悉不載殊為疎略此與馮夢禎歷代貢舉志似載於學海類編中疑亦鈔撮割裂而成也

明諡考三十八卷

山東巡撫採進本

明葉秉敬撰秉敬有字學已著錄是書採集有明一代諸臣之諡創為冠額之法以上一字為冠下一字為額復依四聲次第分列其例頗為杜撰而所載之諡亦多舛誤如宋濂正德間追諡文憲而作文惠又載陶琰鄭世威俱諡恭介而不及陳有年有年得諡在萬歷二十六年書中載趙志舉諡文懿在二十九年則不可謂非考據之疎矣末一卷所載祖父子孫得諡者亦多所遺漏未為詳贖

鑑堂考故一卷

浙江巡撫採進本

明張鼎撰鼎有吳淞甲乙倭變志已著錄此其官司業時所述明代國學典故兼及軼事大旨主於端師範抑倖進其言多切要中理惟所載國學官陳言國事一條於義未允師儒之官掌教化而已必以與聞朝政為美談是未考宋季三學之弊者也

案黃佐南雍志入職官而此及碑碣紀事別入政書者佐所志者以太學官制職掌為綱二書則但述故事

也

證法纂十卷 浙江汪啟淑家藏本

明孫能傅撰能傅字一之寧波人萬歷丙辰進士官至工部員外郎即嘗與張萱同編內閣書目者此書詳考易名之制首功令次諡法次尊諡次臣諡而以議論終焉大抵據內閣冊籍鈔錄成書其例頗與業秉敬諡考相同而不及其精密

秦璽始末一卷 編修程晉芳家藏本

明沈德符撰德符字景倩一字虎臣秀水人萬歷戊午舉人元世祖至元三十一年有獻傳國璽者御史克州楊桓考辨定為秦物見於輟耕錄德符以為不確因歷引宋李心傳之說及五代會要并晉史通鑑等書以證元所得之非秦璽然傳國一璽歷代傳聞紛如聚訟恭讀我皇上御製國朝傳寶記折衷定論大哉王言允足垂訓億禩若德符之斷斷爭辨猶不揣其木而齊其末耳

年號韻編一卷 浙江汪啟淑家藏本

明陳懋仁撰懋仁有泉南雜志已著錄是書仿表譜之法橫格分正統偏閏僭偽叛亂蠻夷五等直格下貫則同一年號年號前後之序則依韻部編次以便檢閱體例頗亦詳密其中凡前代年號有與明同者則削除不載如張重華方胤皆號永樂則以成祖故去之蓋不欲使僭亂之人與祖宗同號亦臣子之諛宜然不得皆以遺漏惟其所分之等更始則列正統附文乃居偏閏既已未安又道經有龍漢中皇之類流李說不載可也列之僭偽亦覺不倫視鍾廣漢歷代建元考不及遠矣書成於天啓中而中有崇禎年號當為刊版於崇禎故隨時補入歟

明三元考十四卷 浙江汪啟淑家藏本

明張宏道張凝道同撰宏道字成儒凝道字明儒武進人其書專紀明代鄉會殿試之元魁鼎甲或非元魁而後至貴顯及一門科名極盛者亦咸載焉始於洪武三年庚戌鄉試終於萬歷四十七年己未會試每科具詳京

欽定四庫全書總目卷八十三

省主試官大致與張朝瑞書互相出入

萬古法程一卷 浙江巡撫採進本

明袁應兆撰應兆有大樂嘉成已著錄是書統載學宮從祀先賢先儒名氏位次而考證其是非如所辨複姓皆題

一字之類自是下邑之謬不足以飾贖相爭其他所辨字畫則倉陋頗甚若辨句并強句字謂當作句宋人避康

王諱始改勾爲句不知說文句本從口廣韻註行從口不從厶具有明文也

碎雍紀事 無卷數兩淮馬裕家藏本

明盧上銘撰上銘字爾新東莞人崇禎中官南京國子監典簿是編敘述明代大學典故起洪武訖崇禎十年詳於

南監而北監亦附見焉

學典三十卷 副都御史黃登賢家藏本

國朝孫承澤撰承澤有尚書集解已著錄是書所載皆歷代建學設官行禮講學科舉之事自虞訖明分年編載惟

前代僅居八卷而明代之事多至二十二卷如釋奠之禮凡各史志紀所載者皆未收入既載國子監學興廢創置

而各朝學宮之職學宮之制又皆闕焉至泮宮習射及各經列於學官者如漢之石經唐之寫經石經後唐之鈔版

卷中皆未言及而明代一切章疏毫無關於學典者乃一概濫入蓋門戶之見既深無往不用其標榜也

文廟從祀先賢先儒考一卷 編修程晉芳家藏本

國朝郎廷極撰廷極字紫衡鎮黃旗漢軍此本題曰廣寧其原籍也官至江西總督是編歷考從祀先賢先儒名氏

之同異如辨顏幸之作幸而不知通典之作柳成淳臨安志之作韋辨南宮适之作韜而不知一作緇一作括辨司

馬耕之作黎耕而不知一作子耕未免考訂之疎惟所辨文翁之圖較家語多五人家語較文翁之圖多九人及正

殿配享東西兩廡位數引據頗爲典核

傾宮禮樂全書十六卷 兩淮馬裕家藏本

國朝張安茂撰安茂字蓼匪松江人順治丁亥進士官至浙江提學僉事其書分學校衰崇廟制釋奠從祀禮釋
詒祀樂樂律樂譜樂舞釋菜啓聖祠名宦鄉賢祠十四門大抵祖李之藻領官禮樂疏王煥如文廟禮樂書少增損
之其凡例稱李博而富其失也滯王簡而通其失也弱然觀其所作亦無以遠勝二書也

琉球入太學始末一卷

山東巡撫採進本

國朝王士禎撰士禎有古權錄已著錄先是康熙二十三年翰林院檢討汪楫中書舍人林麟焯冊封琉球歸奏中
山王尙貞請以陪臣子入國學 聖祖仁皇帝俯允所請士禎因紀其始末其中追敘明代琉球入國學事於洪武
二十五年祗紀中山而失載山南又二十六年中山復遣寨官子入國學永樂八年山南遣官生三人入國學俱
未及載蓋沿舊本太學志之誤也其書已見士禎帶經堂集中此蓋初出別行之本

國朝論法考一卷

山東巡撫採進本

國朝王士禎撰始於 國初下迄康熙三十四年大臣之 賜諡者咸錄焉凡親王十八人郡王十五人貝勒十
二人貝子十二人鎮國公十一人輔國公十六人鎮國將軍五人輔國將軍七人妃三人公主二人額駙二人藩
王七人民公九人侯伯十四人大學士二十七人學士四人詹事一人尙書二十七人侍郎九人都御史三人八
旗大臣一百六人總督十七人巡撫十七人殉難監司三人提督十七人總兵官八人前代君臣二十六人外藩
一人

辨定嘉靖大禮議二卷

浙江巡撫採進本

國朝毛奇齡撰奇齡有仲氏易已著錄是書力斥楊廷和之議而又不屑與張桂相雷同謂張桂較廷和議爲正
特不知根柢經傳凡爲辨二十四篇援據典確亦可備一說惟謂世宗旣嗣武宗卽當以武宗爲父引公羊傳爲
人後者爲之子作證然奇齡於所著春秋毛氏傳及曾子問講錄內論仲嬰齊卒一條則又力闢公羊之誣謂嬰
齊不得以兄子家爲父父仲遂爲祖又於經說中力排汪琬誤信公羊傳爲人倫之禍而此辨忽主此說前後矛

盾始不可解又謂世宗並當為所生持服三年則雖當時張桂諸人猶未敢創為此論奇齡乃忽發之考儀禮喪服經曰為人後者為其父母報傳曰何以期也不貳斬也何以不貳斬也特重於大宗者降其小宗也若世宗又為所生斬是貳斬矣即曰經文專為宗子言之不知宗子之尊孰若天子言宗子則通於天子矣奇齡又謂經文明云為人後者為其父母報則於所生父母不改稱也既於父母不改稱即不得改三年服制然儀禮雖不易父母之名而仍降在齊衰期服章內則終不得服以父母之服矣奇齡所引不足自證適以自攻耳考通典徐邈荅孔注曰史皇孫皇考之名特稱謂耳未足以明服之輕重其論可與喪服傳相發明奇齡乃取徐邈已廢之說收飾更張實乖典制其餘各條間有可采然不足救大本之乖謬也

制科雜錄一卷 浙江巡撫探進本

國朝毛奇齡撰皆記康熙己未 召試博學鴻詞始末中多露才揚己之詞且有恩怨是非之語猶是前代門戶餘習不盡足據也

彙征錄一卷 兵部侍郎紀昀家藏本

不著撰人名氏記康熙十七年薦舉博學鴻詞名氏爵里及 御試中選人數次第謹案是年正月 聖祖仁皇帝諭吏部曰自古一代之興必有博學鴻儒振起文運闡發經史潤色詞章以備顧問著作之選朕萬幾餘暇游心文翰思得博洽之士用資典學我朝定鼎以來崇儒重道培養人材四海之廣豈無奇才碩彥學問淵通文藻瑰麗可以追蹤前誥者凡有學行兼優文詞卓越之人不論已仕未仕令在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報督撫代為題薦務令虛公延訪期得真才以副朕求賢右文之意尋內外薦送一百八十六人應 詔至京者一百四十三人十八年二月初於 閣 賜宴試瑋瓊玉衡賦省耕詩入選者一等二十人二等三十人皆授翰林入館纂修明史其餘現任者回任候補者歸部未仕者回籍年老者 命吏部議給職銜文運昌明人才蔚起 熙朝盛典誠萬古為昭其開與選者承

明著作各有流傳卽未與選者亦皆觀感奮興不懈而及於古其所撰述今著錄於四庫者尙班班可考此編雖宏
牘之文然觀其所載亦足以見核樸菁莪之盛也惟釐卷諸臣如杜璣李喬馮海葉方鵠俱不載及年老 賜職諸
人具有姓名亦未臚列則記錄之疎耳

國學禮樂錄二十四卷

浙江巡撫
採進本

國朝李周望謝履忠同撰周望字渭澗蔚州人康熙丁丑進士履忠字方山昆明人康熙癸未進士是編乃周望
官祭酒履忠官司業時所輯自孔子世系及先賢先儒列傳列朝祀典禮樂圖譜并石鼓潘迪晉訓而以祭酒司
業題名終焉所列頗多疎漏如祀典中旣載晉泰始七年皇太子講經釋奠而元康三年之講經釋奠乃佚不錄
樂器之載於諸經註疏及歷代史志者甚詳茲僅列史記漢書寥寥數則至石鼓自唐以來辨論甚多如楊慎所
僞則字完於真本周秦石刻釋音則補以闔方皆有考據是編概不徵引而僅載晉訓一篇亦未免稍略矣

紀元彙考三十五卷

大學士程景
伊家藏本

國朝黃琳撰琳有經學淵源錄已著錄是書取歷代紀元之號自漢至明悉以朝代次第纂輯分正統列國僭竊
外夷四門凡史鑑之外裨官野史有關考訂者悉搜採補入其例以所紀之元爲綱以前後所同者詮註于下採
輯亦頗該洽然如後魏及遼金俱載入列國條下與西夏諸國相同殊屬比擬不倫又如紀遼太祖名爲耶律健
德考遼史及契丹國志並無此名又遼興宗之改元景福次年卽改重熙亦無崇興之號頗不免於疎舛

聖門禮樂統二十四卷

山東巡撫
採進本

國朝張行言撰行言字躬先江浦人是書卷首爲綱領不入卷數一卷至五卷詳載歷代祀典六卷載孔子世家
及宗子世表七卷至十五卷爲四配十哲先賢先儒列傳十六卷爲從祀啓聖祠先賢先儒列傳十七卷爲改祀
罷祀諸儒列傳十八卷至二十三卷爲樂經樂志樂器律品譜圖二十四卷載孔子及四配林廟諸圖其哀輶極
繁而徵引諸書仍不出尋常習見

欽定四庫全書總目卷八十三

學宮備考十卷

浙江巡撫採進本

國朝彭其位撰其位字素君吳縣人是書前八卷自孔子以及從祀諸儒各為之傳九卷則載歷代禮樂典制卷末附錄未從祀者申黨孺悲公孫尼子公明子儀公明子宣樂正子春檀弓河間王德文翁孔氏孟皮凡十人所考禮樂典制頗多挂漏

四譯館考十卷

浙江鮑士恭家藏本

國朝江蘇撰纂有奏議已著錄是書略記外藩朝貢之目恭載列祖敕諭及賜予物數皆實錄會典之所有其國俗土風則摺摭前代史傳為之多不確實後系以集字詩二卷皆纂所自作而以諸國字譯之詩既無關於外藩所譯之字又不能該諸國之字則亦戲筆而已不足以資掌故也

太常紀要十五卷

江西巡撫採進本

國朝江蘇撰是編乃纂為太常寺卿時以太常寺考及太常續考所載止於明代因考核近制勒為一書分祀訓祀儀祀例祀禮祀官祀賦六門其書成於康熙壬午於時皇清禮書尚未纂修故纂有此著也

紀元要略二卷補遺一卷

江蘇巡撫採進本

國朝陳景雲撰景雲有通鑑胡註舉正已著錄是書紀漢迄明帝王建元及歷年共子黃中又據歷代僭偽之號附以外國為補遺一卷景雲於分據諸朝各為紀載彼此互註不分大書附書體例最公然皆史傳所習見取便檢閱而已

歷代帝系年號二十卷

江西巡撫採進本

國朝劉宗魏撰宗魏字友韓號柚航贛州人乾隆戊辰進士官至監察御史是書以歷代帝系年號為名乃兼及割據僭竊下至李自成張獻忠亦入記載而所列割據僭竊又不能詳備體例頗為冗碎

右政書類典禮之屬四十八部三百五十七卷

內二無卷部數皆附存目

欽定四庫全書總目卷八十三